

حكاية ماحانونا

عن مسلسل يترى في عزو

مكتبتنا
كنوز من المعرفة

<http://www.makbtna2211.com/>

A
h
m
e
d
M
a
d
y

يوسف معاطي

أطلس

للنشر
والإنتاج
الأعلام
ش.م.م.



تقديم الناقد
د. إيريني ثابت

أطلس



Tuesday
Nov. 29
2011
Riyadh

شخصية ماما نونا

التي عشقناها في كل شيء.. في حنيتها ..
في طيبيتها .. حتى في دلعها الزائد عن الحد
للابن والأحفاد

وسألت يوسف معاطي

كيف كتبت هذه الشخصية؟

وكانت إجابة هذا السؤال حكاية كبيرة حكاها لي
في عدة ساعات ضحكت فيها كثيراً وبكيت أيضاً كثيراً
لكن في النهاية أصررت على أن يعرفها الجميع،
فكان هذا الكتاب بين يديك الآن

الناشر



حكاية ماما نونا

يوسف معاطى

المجلس للنشر والابتاع الإعلاني



رئيس مجلس الإدارة

عادل المصري

عضو مجلس الإدارة المنتدب

حسام حسين

مستشار النشر

أحمد جمال الدين

رقم الإيداع

٢٠٠٩ / ١٧٤٧

الترقيم الدولي

٩٧٧-٣٩٩-١٠٦-٧

الطبعة الأولى

مطابع العبور الحديثة

ت: ٤٦٦٥١٠١٣، ف: ٤٦٦٥١٥٩٩

الكتاب: **حكاية ممانونا**

المؤلف: **يوسف مسماطي**

الغلاف: **أحمد فكري**

الناشر: **أطلس للنشر والانتاج الإعلامي ش.م.م**

٢٥ ش وادي النيل - المهندسين - القاهرة

E-mail: atlas@innovations-co.com

تليفون: ٣٣٠٢٧٩٦٥ - ٣٣٠٤٢٤٧١ - ٣٣٤٦٥٨٥٠

فاكس: ٣٣٠٢٨٣٢٨

- إهداء -

إلى جدتى ...

حفيظه

تلك البريئة الحنونة الساذجة

القصيرة الودودة الخيره

والتي جاءت إلى الدنيا فى القرن التاسع عشر

لتهدينى فى القرن العشرين .. أروع هدية .

... أمى ...

تلك البريئة الحنونة الساذجة

القصيرة الودودة الخيره ..

التي جاءت إلى الدنيا فى القرن العشرين ..

لتركنى فى القرن الواحد والعشرين ..

وحيداً .. تائهاً .

أحاول بلا جدوى أن أرسمها بكلماتى ..

فتظل صورتها التى فى ذهنى .. أجمل بكثير ..

وأحلى بكثير .. ولكنى لا أياس وأحاول من جديد

يوسف معاطى .

لكن الغريب حقاً ، بل والمُذهل ، والذي يحتاج إلى وقفه ،
هو أن تجد إيناً لا يشبع أبداً من بنوته ، ولا يرضى بالتعبير
عنها مرة أو مرات ، ولا تنقطع لديه عاطفة البنوه ، كما لا
يتوقف عن حب التعبير عنها ...

(الست دى أم) هذا الرجل !

(الست دى أم) هذا الرجل !

كان يوسف معاطى يقوم بتقديم برنامج (الست دى أمى) لتكون بطولات الحلقات هى أمهات من خلفيات مختلفة .. ولكن من الواضح أن البرنامج لم يشبع عند يوسف شعور البنوة وإذا به يقدم شخصية الأم بقوة فى (يتربى فى عزو) من خلال شخصية (ماما نونه) ، ويقول البعض أن إشباع الأمومة يختلف من أم إلى أخرى فترضى واحدة بطفل واحد وتقول أشبعت أمومتى وتكتفى غيرها بإثنين وأما بعض السيدات فلا يقبلن بأبناء بعدد أصابع اليد الواحدة بل تبقى رغبتهن فى إنجاب أولاد وبنات والإهتمام بهم وإعطائهم محبة وتدليل وتربية مهما وهبوا من ذرية .. هذا ليس بغريب ولا مستبعد ، لكن الغريب حقاً ، بل والمذهل ، والذي يحتاج إلى وقفة هو أن تجد أبناً لا يشبع أبداً من بنوته ولا يرضى بالتعبير عنها مرة أو مرات ، ولا تنقطع لديه تلك العاطفة كما لا يتوقف عن حب التعبير عنها .. يوسف معاطى .. أراد أن يخلد شخصية والدته برسم شخصية أم تشبهها إلى حد كبير ويكون لها دوراً - ليس كبيراً - بقدر ما هو مؤثر فى دراما تليفزيونية رمضانية تشاهدها مصر والعالم الناطق بالعربية كلها .

غالباً ما يخجل الكثيرون من الرجال الشرقيين من التعبير عن عاطفة البنوة تجاه أمهاتهم .. وحتى إذا كان منهم من يحب والدته ويجلها ويحترمها فتجده يضع تلك العلاقة البنوية فى إطار السرية والخصوصية ولا يعبر عنها خارج إطار الأسرة وإطاره الخاص مع والدته .. أما أن يسير خطوة بخطوة نحو إنفتاح أكبر فى التعبير عن عاطفته تجاه والدته فهذا ما فعله معاطى من برنامج إلى دراما تليفزيونية لأخرى سينمائية حتى وصل إلى كمال التعبير المنفتح الذى يكاد يكون مكشوفاً فى شخصية (ماما نونه) التى هى ما هى إلا نسخة قريبة الشبه جداً من والدته ، وهذا هو السر الأكبر فى القبول العام الذى وجدته الشخصية على الرغم من إفسادها لوحيدها (عزو) .

السر فيما أثارته الشخصية الأم من حب هو صدق رسم الشخصية .. أم مصرية .. حقيقية .. تميزها طيبة كبيرة .. وفيض عطاء بلا حدود تحول من كثرته إلى نتيجة سلبية أفسدت الأبن الذى يأخذ ولا يعطى .. أم مصرية تربى بالفطرة وتؤمن أن

العطاء ، والعطاء فقط هو الأمومة ، أم حقيقية تخطئ وتدلل وتلتمس العذر في غير وقته ولكنها محبوبة من الكل .. عندها قدرة كبيرة على الحب بلا مقابل فهي تحب أولاد العائلة الكبيرة كلهم وكأنهم أبناءها .. وتغدق على أحفادها من الحب والعطاء بلا حدود فيحبها كل من حولها ولا يجروا أحد داخل الدراما على محاسبتها أو التفكير في أخطائها التربوية الفادحة .. حتى الشخصيات العقلانية التي تفكر بتحليل الأمور وإستنتاج للنتائج لم تحاسب (ماما نونه) .

شخصيتان من جيلين مختلفين : شخصية نوال العاملة الصارمة التي هي نفسها أم حازمة لثلاث أبناء من الذكور تأمرهم فيأثمرون وتنظم حياة الأسرة فيطيعون وتصدر أوامرها (لعزو) المدلل نفسه فيلتزم رغماً عن أنفه .. حتى دواء ماما نونه تفرضه عليها نوال وتنظم لها ميعاده .. ومع كل هذا لا تنتقد (نوال) الأم المثالية تصرفات (ماما نونه) بل تنتقد (عزو) وتوبخه هو .. الشخصية الثانية من جيل الأحفاد هي شخصية (حسام) ابن (عزو) السيف الذي يشهر في وجه (عزو) فيرعبه منذ بداية الحلقات إلى نهايتها وهو لا يوبخه فحسب بل يكاد يشتمه في بعض المشاهد ويلوم عليه ضياع ابنه الثاني وينتقد كل تصرفات (عزو) ، والعجيب أنه يعزو فشل أخيه إلى عدم تربية الأب له ، ولكنه لا يطبق المبدأ نفسه على أبيه الذي هو نتيجة حتمية لتدليل (ماما نونه) له ، أهذه الدرجة أحببت كل شخصيات العائلة (ماما نونه) ؟ . أم أن هذا هو حب معاطى لها ؟ . أم هذا هو مقدار حب معاطى لوالدته هو ؟ .
(كلنا مدللون)

هكذا قال لي معاطى عندما أنتقدت التدليل الزائد الصادر من شخصية (ماما نونه) تجاه (عزو) .. فأجاب معاطى في خجل : (كُلنا مدللون) .. ماذا يقصد هذا الرجل ؟ . أيدافع عن شخصياته ؟ . لكنه لم ينكر أن للشخصية ما لها من نقائص مثلها مثل أى شخصية واقعية ! . إذا هو يقول بطريقة غير مباشرة أنه حتى لو لم يكن هو (عزو) لكن أم (عزو) هي والدة معاطى .. هي الأم التي تدلل وتعطى بلا حساب وتؤمن - حتى ولو كانت خطأ - أن الأمومة هي عطاء فقط .. عطاء نفسى ومادى دون انتظار مقابل .. وهو ما يعرف على المستوى التربوى بإسم التدليل .. إذاً (ماما نونه) التي تدلل هي نفسها والدة معاطى التي يدافع عن تدليلها له بقوله (كلنا

مدللون) لا لأنه يعارض النظريات التربوية ولا لأنه يعتقد أن والدته كانت أقدر على التربية من غيرها بتدليلها له .. ولكن لأنه يحب هذه السيدة ويقدرها ويعترف بفضلها فهو يدافع عن وجودها ويقدم شخصية (ماما نونة) ليخلد قيمة العطاء وذكرى هذه السيدة التي أعطت دون مقابل .
أمومة فقط

أحد الصفات العجيبة في تلك الشخصية هي أنها شخصية أم .. أم فقط .. فهي أرملة وليست زوجة .. أى لا تقوم بدور الزوجة وليس الشخصية ملامح زوجة تعتنى بزوجها أو تتفاعل مع ذلك الدور بأى شكل .. فهي تظهر من بداية المسلسل إلى أن ينتهى دورها بالوفاة كأم فقط .. والغريب أنها تقوم بهذا الدور على عدة مستويات .. فهي أم - درجة أولى - (لعزو) إبنها الوحيد المدلل .. ولكنها أم أيضاً لكل الشخصيات الأخرى بدرجات متفاوتة توزع من عطائها وحنانها على الكل دون تمييز اللهم إلا (عزو) فقط الذى تخصه بالتدليل الزائد .

فهي أم لأبناء العمومة كلهم من أولاد إلى بنات وهم يذكرون جميعهم فضل تلك السيدة عليهم كأم .. ولا يختلف الشقى منهم مع الطيب فى أن لتلك السيدة وجود أساسى فى حياتهم ، وأنهم لا يستطيعون أن يضايقوها ولا أن يتصرفوا بأية طريقة قد تؤذى مشاعرهما .. وحتى إذا إنتقدوا (عزو) فهم لا ينتقدوا (ماما نونة) حتى فى غيابها ، فهي بالنسبة لهم كانت وما زالت القلب الكبير والمحبة الخالصة .

وبالطريقة نفسها ، وكما هو الحال مع جيل (عزو) من أبناء عمومته ، تمثل (ماما نونة) أما حنونة للجيل التالى المتمثل فى أبناء (عزو) المختلفين تماماً عن بعضهم البعض .. وكما هي أم لثلاثة من جيل (عزو) (نوال) وأخويها هي أيضاً أم (لداليا) وأخويها (حسام) و(إبراهيم) من جيل أبناء (عزو) .. وكما يدين لها أبناء الجيل الأكبر يدين لها أبناء الجيل الصغير أيضاً .. حتى (حسام) الشخصية الجادة العنيفة إلى حد كبير المتلزم وبالرغم من رفضه لأى نوع من عدم الجدية ورفضه التام لوالده (عزو) وتصرفاته المشينة وما آل إليه بسبب تدليل (ماما نونة) له .. بالرغم من كل هذا نجد (حسام) يحترم (ماما نونة) ويطيعها ولا يجادلها ولا يعترض على ما تقول بل ويستمع لتوسلاتها من أجل (إبراهيم) مثلاً .. و(إبراهيم) أيضاً الإبن المتذمر الذى لا يرضى بأى شئ ، لا

بوالده ولا حتى بوالدته المستسلمة لسلب حقها وحقه والتي تتزوج على غير إرادة (إبراهيم)، بالرغم من رفضه لكل ذلك إلا أنه يقبل (ماما نونة) وما تقوله وما تطلبه ويرضى بالحياة في قصر (عزو) لا من أجل والده بل من أجل توسلاتها هي .
عجيبه تلك الشخصية يا معاطى !. أم بسيطة لا تملك من أساليب التربية شيئاً يذكر .. ليست محنكة ولا خبيرة .. لا تنتهر أحداً ولا تتسلط على صغير أو كبير .. تستخدم أسلوباً واحداً مكرراً مع الجميع حتى مع ابن زوجة (عزو) الطفل الصغير .. أسلوب الحب والعطاء والتدليل .. ومع هذا تنجح مع الجميع ، ويجبها الكل ويطيعها الأبناء والأحفاد ، وفوق كل شيء يحترمها كل من حولها .
لماذا ماتت (ماما نونة) ؟ .

كل سؤال ليوסף معاطى : هل خطت لموت شخصية (ماما نونة) في هذا التوقيت من المسلسل ؟!. وما القيمة الفنية والدرامية لـ...؟! . وقبل أن أكمل أجاب بسرعة : إطلاقاً .. لم أخطط على الإطلاق لهذا إلى أن كتبت المشهد وبكيت عليه .. أصابتنى الدهشة ، وعلى الرغم من أنني أعتبر نفسي من القادرين على تخطي مثل تلك المواقف إلا أن ما عقد لساني وأسكتني هو وجه الرجل الذي كادت دموعه أن تسقط مرة ثانية وهو يتذكر ما حدث في كتابة المشهد الأخير في حياة (ماما نونة) .. وبالرغم من تراحم الأسئلة في داخل رأسي ورغبتى الملحة في البحث عن إجابات لتلك الأسئلة ، إلا أنني أشفقت على نفسي مما قد يحدث إذا طرحت تلك الأسئلة فأثرت الصمت ولكن إلى حين ..

لم أستطع مجابهة فضولي النقدي الذي ظل يطن في أذني بسؤال محوري هو كيف ينهي معاطى دور هذه السيدة دون تخطيط وفجأة وبدون هدف درامي خاص بالمسلسل ؟ . كما أن فضولي الشخصي قادني إلى سؤال آخر وودت لو أتمكن من التوصل إلى إجابته أيضاً وهو هل توفيت والدة معاطى ؟ إذا كانت الإجابة بلا فلا يمكن بأي حال من الأحوال أن تموت (ماما نونة) إذاً فالإجابة غالباً نعم .. وإذا كانت الإجابة نعم ، إذاً (فماما نونة) ينبغي أن تعيش لتخلد حياة تلك السيدة التي يجبها معاطى .. وهذا رد الفعل الطبيعي لتلك المشاعر شديدة القوة من قبل المؤلف نحو والدته .. ولكن أن تموت (ماما نونة) حتى على المستوى الشخصي فهو سؤال ملح يحتاج إلى إجابة ..

لم يكن من الصعب معرفة المشهد الذى كتب فيه معاطى المشهد الخاص بموت شخصية (ماما نونة) ..

المكان : كوفى شوب يجلس فيه معاطى لكتابة السيناريو .

الزمان : حوالى الثانية صباحاً .

الشخصيات : الكاتب معاطى ، والعاملون بالكوفى شوب ، وإثنين من زبائن الليل .

الأحداث :

تبدأ الأحداث بفنجان القهوة بجانب معاطى وأوراقه وأقلامه حوله .. ينظر فى آخر ما كتب من أحداث .. يتذكر آه إنها المشاهد الصعبة سوف يأخذ (عزو) السى دى عنو من (ماما نونة) وسوف تحدث بينهما مشادة .. بدأ فى الكتابة .. تطورت معه الأحداث وجعل (ماما نونة) تضرب (عزو) على وجهه .. ولكنه يأخذ السى دى ويجرى مسرعاً .. يسير معاطى مع (عزو) فى سيارته وذهابه إلى اللقاء المنتظر لتسليم السى دى ولكن معاطى يصر على أن يسمع (عزو) فى أذنه كلمات (ماما نونة) يذهب المشاهدون مع (عزو) ومعاطى ويسرون فى شوارع القاهرة يتحسبون رد فعل (عزو) ويتظنون ما سيفعله .. ويتناسون (ماما نونة) جزئياً .. أما معاطى الذى أرسل المشاهدين مع (عزو) خارج القصر لم يزل هو بروحه وفكره مع (ماما نونة) .. لا يتركها وحيدة بل يفكر فى مصيرها فى الوقت الذى يفكر فيه بمصير (عزو) أيضاً .. حلقة صعبة على أى كاتب وربما ستثبت الأحداث أنها كانت الأصعب بالنسبة لمعاطى ..

أخذ رشفة من القهوة وحاول أن يركز تفكيره مع (عزو) فذهب به إلى (الأوتيل) وأخرجه من مأزق تسليم السى دى بدون مشاكل ووضع على الطريق الصحيح ببساطة شديدة حين جعله يدعى أن السى دى الذى معه هو فيلم كارتون .. وهرب (عزو) بسرعة ليسبقه معاطى ويعود (ماما نونة) .. القصر ومن فيه يستعدون للإفطار .. وفجأة تكتشف (نوال) أن (ماما نونة) لا تجيب ولا تقوم .. تستدعى الطبيب .. يعلن وفاة (ماما نونة) .. ينهار يوسف معاطى .. يبكى بحسرة وألم على (ماما نونة) .. عامل الكوفى شوب فى حالة من الذهول .. يقترب من معاطى ليسأله عما به .. يخاف من هول الموقف ومن حالة الإنهيار والبكاء التى يعانى منها معاطى .. موبایل معاطى يرن .. لا يرد .. حالة من القلق ..

يكمل معاطى السيناريو وتتصل (نوال) (بعزو) لتخبره أن (ماما نونة) متعبة .. هو لا يصدق .. (عزو) لا يصدق أنها متعبة .. ومعاطى لا يصدق أنها ماتت .. يعود (عزو) للقصر ومعه معاطى الذى لم يكن قد ترك القصر كلية .. كان أفراد الأسرة قد حضروا للبيت وهم يعزون (عزو) الذى يضحك منهم ويصعد لـحجرة (نونة) وهى مغطاة الوجه ويكلمها ويستمر فى حديثه معها وهى لا تجيب ولكنه يعتبرها نائمة .. هو يرفض تماماً حقيقة موتها ومثله مثل كاتبه الذى يرفض الحقيقة التى كان هو الذى أقرها .. يرفض موت (نونة) ويستمر فى البكاء عليها .. ويكتب ويبكى .. (عزو) ينام بجانب (نونة) ويستمر يحدثها إلى أن يغفو .. تدخل (نوال) و(فوزية) والمغسلة ويخرجن عزو من حجرة النوم ..

يوسف لم ينته بعد .. ما زال يكتب .. ويبكى .. (عزو) ينزل الشارع غير واع بما يفعله .. ومعاطى يكتب المشاهد الحزينة واحداً بعد الآخر وهو فى حالة من إنعدام الوعى أيضاً .. أعظم مشاهد المسلسل يكتبها يوسف بخط ردى بسبب دموعه وإنفعاله .. مشهد (عزو) يأكل البليلة بشراسة وإنعدام وعى .. دموعه تتساقط أخيراً فى طبق البليلة كما تتساقط دموع معاطى على أوراقه .. معاطى سبق (عزو) فى إدراك وفاة الأم بعام كامل .. عام بالضبط .. فقد توفيت والدة معاطى فى التوقيت نفسه العام الأسبق .. أخيراً بكى (عزو) وتم التوحد التام بين البطل والكاتب ..

(عزو) ليس معاطى ولكن فى هذا المشهد توحد الإثنين .. (عزو) ومعاطى مصابات بمرض السكر .. تناول البليلة كارثة بالنسبة لكليهما وتعد نوعاً من الانتحار غير المباشر .. حالة الحزن العميق لوفاة الأم واحدة لدى الإثنين .. ولكن (عزو) الوحيد عند بائع البليلة لا يشبه معاطى الذى قلب سكون الكوفى شوب إلى حالة من القلق بسبب بكائه وإنهياره ودموعه .

إستدعاءات متوالية لأصدقاء معاطى من نجوم لآخرين حتى يهدءوا من روعه .. واحداً بعد الآخر يجلس فى مقابل معاطى ثم يتناول الأوراق .. يقرأ المشاهد ويعرف أن (ماما نونة) ماتت وأن الكل يبكيها وأن (عزو) الآن يبكيها أيضاً ، فيقوم ويجلس بجانب معاطى فى العزاء ويبدأ البكاء .. تحول الكوفى شوب إلى سرادق .. وجلسة الأصدقاء إلى جلسة عزاء .. والكتابة إلى بكاء ..

كاد المسلسل أن ينتهى وإنتهى مشهد الكتابة ..

وعاد سؤالى لى : لماذا ؟ . لماذا تتوفى (ماما نونة) ؟ . لأن معاطى يريد لا أن يخلد الشخصية فحسب بل أن يخلد مشهد وفاتها .. فهو يعيد رسم المشاهد حول وفاة والدته مرة أخرى .. التوقيت ذاته .. الحزن ذاته .. تلك هى الذكرى السنوية الأولى لوفاة والدة معاطى .. هو يحزن من جديد .. لا يكفى الحزن الذى كان العام الماضى .. بل ينبغى أن يحزن ثانية حتى يفى والدته بعض حقها عليه .. كما قلت من قبل ، قد يكتفى البعض بالتعبير عن مشاعر البنوة وحب الأم مرة أو مرات وبالحنن عليها وبكائها مرة ومرات .. أما معاطى فلا يصمت عن التعبير ، ولا يسكت عن البكاء ولا ينتهى من تكرار الحزن .

معاطى ليس (عزو) ولكن مشاعر البنوة عند (عزو) هى مشاعر معاطى .. معاطى الأنانى فى حب والدته حتى لكان يتمنى أن يكون وحيداً مثل (عزو) .. أو هو قد أخذ من والدته ما يأخذه الإبن الوحيد فكان بشكل أو آخر (عزو) والدته . ولذا يحق لوالدته عليه لا أن يبكيها فحسب ، بل ويبكى كل المشاهدين عليها أيضاً .

د. إيرينى ثابت

- فى حىاة كل منا .. ماما نونا -

قالوا إن الواحد لا يعرف قيمة أمه إلا حينما ينجب .. وأنا لا أحب هذه المقولة .. فالأم هى أولى وأعظم قيمة نراها طول عمرنا .. سواء أنجبنا أم لم ننجب !! . وقالوا إن الطفل لا يرى شيئاً أول أربعين يوم بعد ولادته .. وإنما .. يسمع .. يسمع فقط ونحن كلنا سمعنا أمهاتنا .. هى أول صوت وأول مشهد وأول ضحكة وأول هدهده .. والأذن تعشق قبل العين دائماً .. وليس أحياناً .. لا يوجد مبدع واحد أو قمة من قمم الفن والفكر والأدب ليس عنده ذلك الغرام الإستثنائى بتلك المرأة الأسطورة .. الأم ..

ومن يومها كلما انبهرت بقمة من القمم .. فنان .. سياسى .. أديب .. أغمض عيني ولا أتخيله هو .. دائماً أتخيل أمه .. تلك المرأة التى أنجبت لنا هذا العبقري .. ترى ما شكلها .. أحاول أن أرسم ملاحظتها .. هل هى تشبهه .. هل هو يشبهها .. ماذا أخذ منها؟! .. وماذ أعطته .. وكيف سيطرت عليه وشكلته حتى صار فذاً .. هكذا؟! .. وإذا كنت أنا قد قلت شيئاً بسيطاً عن الأم .. فلقد سبقنى كثيرون فأسمحوا لى أن أصحبكم معى فى سياحة عاطفية بين أمهات عرفنا أبناءهن وأحببناهم .. وهم الذين سيكلموننا عن أمهاتهم .

يقول الأستاذ يحيى حقى فى كتابه ..

(خليها على الله) يوم أديت إمتحان الشفوى لآخر مادة فى شهادة الليسانس عدت من الجزيرة إلى شارع السيوفية تحت شمس محرقة فإذا بى حين وصلت الدار أعجز عن صعود السلم لا أذكر كيف حملت إلى مسكننا ولكننى أذكر بوضوح إننى إرتميت بملابسى وحذائى راقداً على الكنبه مسنداً رأسى إلى ركبة أمى .. أنفاسى متلاحقة تلهث فى جفاف كأنها هرب ريقى كله إلى عيني فهما مغرورقتان بالدموع فى جسمى إعياء شديد وفى روحى إعياء أشد كان ينبغى أن أنجح ولو جاء اسمى فى الذيل لا إعتزازاً بشهادة الليسانس وبلقب متر ولا طلباً للنجاة من المدرسة وقرفها ولا أملاً فى مستقبل مرموق فى الوظيفة .. ليس لشيء من هذا كله بل كان ينبغى أن أنجح

لدافع واحد فحسب .. هو ألا أغضب أمى أو أن أجرعها خيبة الأمل .. يهون على كل شئ إلا أن أقف أمامها وقفة الخائب .. لو أنها اكتفت بولمى وتقريعى لما باليت ، وإنما خوفي أن تنعى كيف ضاع جهادها من أجلنا عبثاً ، وتندب سوء حظها مع أولادها أيضاً .. هى عماد الأسرة .. ربتنا بيدها ، تخطئ ثيابنا ونحن ستة .. تطبخ وتطعمنا متكلفة في ذلك أشد العناء ، متحايلة للوصول بنا مستورين لآخر الشهر .. إذا قدمت لنا في بعض الأحيان طعاماً نذراً لا يغنى ولا يُسمن من جوع ضاحكتنا وصبت علينا ضجة مرحة كأنها اجتماعنا حول المائدة لعبة مسلية فكنا على ضحكها ونحن نعلم أن تمثيل نجد الطعام وفيراً مشبعاً لذيذاً .. وهى التى ربتنا بلسانها .. تحثنا ، بغير إلحاح على الاستقامة والحد والمذاكرة ، كسوط صاحب الجواد الأصيل له وقع وليس له لسع ، وربتنا فوق هذا وذاك بنظراتها إذا كنا في مجمع من الناس نظرات تحوط علينا وتعلمنا كيف ينبغى أن نجلس وكيف ينبغى أن يكون الكلام المهذب .

والعقاد هو الآخر له حكاية مع أمه ..

حيث كانت الصحف الشتامة والكشكول يكتبون عن (بخيته السودانيه) أم عباس العقاد .. وحينما سأله النقراشى لماذا لم تكذب الخبر .. قال العقاد .. فما بالى أكذب نسبتى إلى أم سودانية ليس فى الأمر ما يوجب البراءة منه والإهتمام بتكذيبه فكم أنجبت السودانيات من رجال يفخرون بالأمهات ثم قال .. وقد قالوا عنى أننى أهمل زوجتى واطركها تتسكع فى الطرقات ولم تكن لى زوجة قط .. والحقيقة أن أسرة أمى من أبويها جميعاً كردية قريبة عهد من يادر بكر .. وقد ورثت أمى عن أبويها تقواها وسلامة بنيتها ففتحت عينى أراها وهى تصلى وتؤدى الصلاة فى مواقيتها ولم يكن من عادة المرأة أن تصلى فى شبابها إنما كانت النساء لا يصلين إلا عند الأربعين .. وورثت عن أبويها أيضاً حب الصمت والاعتكاف وكان الناس يحسبون ذلك عن كبرياء (نفخة أتراك) ولم يكن كما توهموا ولم أر فى حياتى امرأة أصبر على الصمت والاعتكاف من والدتى فربما مضت الساعات وهى تستمع إلى جاراتها وصديقاتها .. وتجيبن بالتأمين أو بالتعقيب اليسير وربما مضت أيام وهى عاكفة على بيتها أو على حجرتها .. ولا تضيق صدرها بالعزلة .. وقد ورثت منها ذلك .

وقوة الإيمان في والدتي هي التي بثت فيها العزيمة ليلة احتضاري .. فقد
احتضرت في طفولتي .. واقتربت من الموت فإذا بالوالدة هي الإنسان الوحيد الذي
يتحامل على نفسه إلى جانب سريري ليقنعني بأنني بخير وتنطوي على ذلك ساعات
وهي على عزميتها حتى جاء الطبيب أخيراً وانبأها أنه عارض غير ذي بال ، فإذا
بالمحتضر (أنا) قد نجا وإذا بالمواسية (أمي) قد سقطت مغمى عليها .

وكانت لا تنكر من شئوني إلا الورق .. نعم ما هذا الورق .. ورق لا ينتهي هو
الذي يمرضك هو الذي يصر فك عن الزواج كما أنه سبب الكارثة الكبرى شهرتك ..
وقد كانت والدة العقاد من أعداء الشهرة فهي التي بتعبيرها (تشعل غارتك) أي تجعل
الناس يتحدثون عنك وما تحدث الناس عن أحد وسلم من ألسنتهم قال لها ذات يوم
.. لو وجدت لي زوجة مثلك لتزوجت الساعة .. ويقول العقاد .. ولم أكن مجاملاً والله
ولا مروغاً فأنا لا أنسى كمال تديرها لبيتها ونحن صغاراً .. ولقد توفي والدي وهي في
عنفوان شبابها وكان لي أخ صغير فتوفرت على تربيته هو وأخوته ..
أترون لم يكن العقاد وحده جباراً .. أمه هي أيضاً كانت جبارة ..!؟

والمازني في كتابه "سبيل الحياة" يقول ..

لا أعرف الأمهات كيف يكن ولكني أعرف أمي كيف كانت وأجمل التعريف
بها وأوجز الوصف فأقول أنها كانت رجلاً فقد اضطرت أن تحقق أنوثتها في سن يبدأ
فيها النساء أو معظمهن يعرفن معنى الأنوثة الكاملة .. فقد مات أبي وهي في الثلاثين
من عمرها وأذاقها في حياته ما سود الدنيا في عينها فكان رحمه الله مزواجاً .. ومع ذلك
فكانت أمي بعد رحيله تثني عليه وتذكره دائماً بالخبر ولم تنقطع قط عن زيارة قبره في
إثنتين وثلاثين سنة عاشتها بعده وكنت ربما مازحتها قائلاً ..

- وماذا كان يعجبك في هذا الرجل ؟.

فتبتسم وتزجرني بلطف ثقة منها بأنني أهزل ولا أتكلم جاداً فتقطب وتقول :

- عيب يا ولد ..

وتنظر إلى سبحتها بين أصابعها .. ويظل ييازحها حتى تغضب ولكنه لا يلبث أن يسترضيها ويستغفرها ويقبل يديها ورأسها فما كان يطيق أن يدعها عاتبة أو ساخطة أو متألمة .. ويقول المازنى .. ولو وسعنى أن أجعل حياتها نعيماً خالداً وسروراً دائماً وجدلاً لا تنضب ينابيعه ولا تجف موارده لما قصرت .

ولما نجحت في الشهادة الابتدائية .. جاء أخى وابن عمى مهنيين .. وأشارا عليها بأن تكتفى من تعليمى بهذا القدر لما كفا فيه من العسر .. فأبت وزجرتها وكانت أمى - على صغر سنها - زعيمة الأسرة وكان أهلى جميعاً يلجأون إليها يطلبون رأيها فيما يعرض لهم ..

وأذكر وأنا فى المدرسة الثانوية أنى عوقبت مرة بالحضور إلى المدرسة فى منتصف الساعة السابعة صباحاً وكان هذا عقاباً جائراً فى ذلك الوقت وكان البيت فى حى السيدة زينب والمدرسة فى شبرا وخرجت قبيل الفجر وأنا أخشى أن أكون قد تأخرت .. وقلقت أمى .. ولكنها لم تقل شيئاً فلما كان الضحى ركبت إلى المدرسة وسألت البواب فأخبرها أن تلميذاً جاء فى الفجر فعادت مطمئنة ولم نخبرنا بما فعلت إلا بعد عدة أعوام ..

ومن حنانها العجيب أنها كانت إذا مرضت أنا ووصف لى الطبيب دواء لا تدعنى أجرع منه إلا بعد أن تجرع هى منه .. وكثيراً ما كنت أقول لها ..
- يا أمى كفى عن هذا ..

فتقول ..

- يابنى انه قلب الأم .. ليطمأن قلبى ..

وكانت تتوخى أن تعفينى من المنغصات وتتجنب أن تحملنى الهموم فتستقل بها دونى وتتحرى ما يدخل على نفسى السرور .. وكانت قوية الذاكرة .. إذا جلست للسمر تتدفق بأحاديث الأيام السوالف وكأنها تحياها من جديد وكانن قوية الشكيمة فلا رأى

إلا رأيها في الأسرة كلها .. وكنا نتفاهم بالميون أنا وهى والذين حولنا غافلون لا يفتنون إلى شئ ..

فلما حضرتها الوفاة قالت ..

- أعطنى ثلاثين قرش ..

ولم تكن بحاجة إلى ذلك وكنت قد أعددت عدتى لهذا اليوم فأدركت أنها تريد أن تطمأن على أن معى ما يكفى لنفقات المأتم .. فأخرجت ما معى وقلت لها خذى ما تشائين .. فأخذت جنيهاً دسسته تحت الوسادة فظل حيث وضعته حتى ماتت . وكانت قد أصيبت فجأة وفى منتصف الليل بذبحة وكانت من شدة التمزيق الذى تحسه فى صدرها تحبب بيديها فى الهواء وظلت تقاوم الداء تسعة أيام بقوة إرادة الحياة .. ولم أر منها ما يدل على الإنهزام إلا قبيل الوفاة بدقائق وكنت أناولها الدواء فأشاحت بوجهها عنى .. فألححت فقالت ..

- ارضاء لك فقط .

وشربته ثم نامت فوضعت يدي على فمه فلم أشعر بنفس ..

تلك هى أمى .. وإنى لجلد وقوى التحمل فى العاده .. ولكن موتها هدنى .. فقد كانت لى أما .. وأباً .. وأخاً وصديقاً ..

وعبد الوهاب ..

ويقول عبد الوهاب .. لعل أول مرة أحس فيها بالمرأة كانت نحو أمى ست الحبايب ، فهو الإحساس الوحيد الذى ما زلت أرجو أن يكون إحساساً دائماً فالأم فى تصورى : هو الحب الوحيد الذى لا يشيخ ولا يصيبه الوهن هو الحب الذى يطرد السنين من حياة الإبن ليظل فى حضنها طفلاً مهماً أصبح رجلاً أو شيخاً فقد كنت أحس بإنى عندما أضع رأسى على صدرها أسترجع كل طفولتى وأشعر أننى ما زلت فى حاجة لأن أنهل من خبرتها وحكمتها ويحكى أنه فى طفولته أصيب بحمى .. وفقد

الحراك وقطع النفس وكان الطب أيامها ليس بتقدم هذه الأيام .. فقلوا أنه - عبد الوهاب يعنى - مات .. وجاء الخانوتى والمغسل ونصبوا الصوان لمأتمه إلاهى كانت واقفة أمام السرير تنظر نحوه بحسرة .. وأتوا ليأخذوه ولكنهم قبل أن يحمّوه إلى القبر صرخت هى ..

- ده بيبرش بعينه .. إستنوا ..

ويضحك عبد الوهاب ويقول لولا أن هذه السيدة اكتشفت إنى باربشس بعنيا كان زمانى اندفنت .. وهكذا فهى أعطته الحياة .. مرتين .

ولذا كان يذهب إليها حتى بعد أن كبر ويلقى بنفسه فى أحضانها كطفل صغير وهى تضربه وتدله .. وحينما رحلت إلتفت إلى المرأة التى وراءه .. ورأى وجهه فأحس لأول مرة بكهولته .. وظل عمره كله يضع بجوار سريره صورة أبيض وإسود لامرأة يراها أجمل امرأة فى الدنيا كلها .. ينظر إليها قليلاً .. ويقرأ لها الفاتحة ويقبلها .. ويذهب فى نوم عميق .. ربما .. ربما .. تحن عليه وتأتى له فى المنام .

ويوسف وهبى ..

ويعترف (يوسف بك وهبى) أنه فى شبابه الأول وأيام طيشه امتدت يده وسرق ساعة ذهبية كانت ملكاً لصديقه .. كان فى ورطة مادية كبيرة ولم يكن أمامه سوى هذا الحل البشع .. وعلم الأب الباشا .. وأفاق يوسف وهبى على صوت والده يهدر ..

- أين يوسف؟! أين يوسف ..

قالت والدته ..

- لسه نايم فى غرفته .. خير مالك يا باشا؟

وحاول الأب الثائر أن يكسر الباب عليه وهو يزجر ..

- يا لص يا حرامى يا كلب ..

وكاد يوسف أن يلقي بنفسه من النافذة من شدة الخوف .. ولحق به أبوه وخلفه أمه
مرتحفةً باكيةً ..

- إنت يابن عبد الله وهبى حرامى !. تسرق ساعة ..

ثم أَلقت بنفسها تحول بينه وبين أبيه الذى كاد أن يقتله ويشبعه ركلاً ولطماً .. وفى
المساء قرر يوسف أن يترك البيت إلى غير رجعة .. جمع حاجياته وتسلسل .. ولكن
وجدها .. هناك .. بانتظاره .. أمه ..

- يوسف ابنى حبيبى .

- ماما !.

- بتعمل إيه ؟!.

- خلاص مالياش عيش هنا .. أنا ماشى .

- ليه عملت كده يا يوسف .. إنت عمرك ..

- ساحينى يا ماما .. ساحينى .

- طيب بس اهدا واللى انكسر يتصلح .. بابا كان زعلان منك لكن أنا إترجيتو كثير

لحد ما حن قلبه .. إنت فاضلك شهرين وتاخذ الدبلوم وكنت أول المدرسة !.

- مش عارف يا ماما إزاي عملت كده ؟! . وزه شيطان .

- لا .. ما تياسشى كده .. إحناح نديلك تمن الساعة تشتريها وترجعها لصاحبها ..

وبكرة الصبح ترجع المدرسة وكأن اللى جرى ما كان .

وظلت أمه تواسيه وتهون عليه الأمر إلى أن رضخ فى النهاية وعند مطلع الشمس

قام .. وحمل حقيبته وقد قطع على نفسه عهداً بأن يكفّر عن خطيئته بالإنكباب على

الدروس .. لك تكن علقه أبيه التى دفعته .. وإنما حنان أمه .

هكذا .. إستطاعت أم يوسف وهبى أن تحول مجرى حياته كلها بنقاش عابر فى

ليلة ، لو لم تكن هناك .. لصار بلطجياً أو مجرماً .. وإنما الأم هى الكائن الوحيد الذى

يستطيع أن يفعل المعجزات .. وبعدها صار يوسف وهبى .. هو عميد الفن العربى .

ليلي مراد ..

وأم ليلي مراد .. إسمها جميلة تزوجت من زكى مراد أو ليلي رغماً عن أنف أخيها الأكبر الذى اعترض على الزواج .. وعاشت معه فى التبات والنبات وانجبا تسعة من الصبيان والبنات .. لم تكن جميلة تحب عمل زوجها .. السهر والغناء حتى الصباح والليالى الملاح .. والمعجبات طبعاً .. وجميلة غيورة .. من حقها أن تكون غيورة ، وسافر زكى مراد الأب فى رحلة فنية .. واختفى .. وكانت النقود تصل إلى العائلة تباعاً .. فى البداية كانت بالمئات وانتقلت العائلة إلى شقة أوسع بها ١٣ غرفة فرشت جميعها بالسجاجيد والأثاث .. ثم بدأت النقود تقل .. إلى أن أختفت كما اختفى الزوج .. ولم يعد يرسل حتى .. خطابات .. وبدأت الأم تبيع مصاغها قطعة بعد قطعة .. ثم إنثت السجاجيد والأثاث وأخذت الغرف تخلو غرفة بعد غرفة حتى جاء يوم عاشت فيه العائلة فى غرفتين فقط .. فى صمت ودهشة كانت ليلي ترقب ما يحدث .. وتغنى .. وفى عينيها نظرة حائرة نحو مستقبل مجهول .. أب غائب وأم تبنى نفسها من أجل العائلة .. ولا مال ولا ملابس .. وأحياناً لا طعام .. وعاد الأب لتزداد الظروف ضراوة وشراسة .. حتى أجرة البيت تراكمت شهوراً .. ولكن فجأة ينحنى المجد لهذه الطفلة الصغيرة لتصعد إليه لتصبح فيما بعد وحتى اليوم أشهر مطربات الشاشة .. ها هو المجد يأتيها بالمال بلا حساب وها هى تشتري سيارة شيفورليه وتقودها بنفسها مثلها مثل بنات الباشوات والأميرات .. وارتاحت العائلة تماماً وكانت الست جميلة تفعل نفس الشئ الذى كانت تفعله منذ سنوات .. تنهض من الفجر لتجهز الطعام والشراب والملبس وتظل تدور وتدول طوال يومها فى البيت .. حتى إذا جن الليل وقام الجميع ظلت هى ساهرة حتى تأتى ليلي .. النجمة ليلي .. لتطمئن عليها وتضعها فى الفراش وتنام .. وماتت جميلة .. وكانت ليلي مراد تصور

فيلم "ليلي" غادة الكاميليا وكأنها أرادت أن تموت هي أيضاً في الفيلم كما ماتت جميلة .. الأم التي كانت كل شيء في البيت .. والتي استطاعت من بعيد .. بلا ضجة بلا دعاية .. أن تقدم لنا أسطورة السينما المصرية .. ليلي مراد .

وحسين كمال ..

حسين كمال .. المخرج الكبير .. قوى .. وعنيف .. يخشاه الممثلون ويعملون له ألف حساب .. الحوار معه مشكلة .. ولكنه حينما تكلمه عنها .. ما هذا الذي رأيته .. هذا المخرج الجبل تحول إلى قطعة من الآيس كريم .. بكى .. بكى بحرقه وهو يصف ليلة رحيلها .. كأنها رحلت بالأمس .. كانا خارجين هو وأمه في ليلة رأس السنة .. كانت في أبهى ثيابها .. لم أجرؤ أن أسأله .. وهل تسهر ليلة رأس السنة مع أمك ؟ .. ولكنه على ما يبدو كانت حبيبته أو .. عشيقته .. كما وصفها بنفسه .. إنها أجمل امرأة في الوجود .. في عينيه .. فلماذا لا تكون هي بطلنة ليلة رأس السنة .. تتأبط ذراعه .. ويخرجان .. وشعرت ماما ببعض التعب فقط (بعض) التعب .. وذهبت .. لكى تقيس الضغط .. مجرد (تقيس) الضغط .. ولكنها .. قاست الضغط و .. ورحلت .. هكذا بكل بساطة .. وانفجر في البكاء .

وتوقف التصوير طبعاً .. وكيف نكمل التصوير والأستاذ أصبح في حالة يرثى لها .. ثم عاد وقال أنا ولا حاجة .. الست دى هي كل حاجة في الحياة .. وابتسم ابتسامة رائعة وقال لى .. عموماً أنا كل يوم بادخل حجرتها وأطلب منها تدعيلي وبتدعيلي .. واندهشت .. وأثاره إندهاشى .. فسألنى بحدة .. مالك مبرق كده ليه ؟ .. أيوة بتدعيلي وباسمع دعاها .. قول عليا مجنون .. قول عليا اللي تقوله .. براحتك .. وتركنى .. بل نسينى تماماً .. كأنى غير موجود بجانبه .. كان يتأمل صورتها وقد عاش مع الصورة .. كأننا .. تركنا المكان له وحده .

وعبد المنعم مدبولى ..

عبد المنعم مدبولى .. الرجل المدرسة فى كل شىء .. فى التأليف والإخراج
والتمثيل لا أعلم لماذا شعرت .. أن هذا الرجل الذى تألق بشكل رائع فى دور الأب
(بابا عبده) هذا الرجل الكوميديان العظيم الممتلئ بالشجن لا أعلم لماذا شعرت أنه أم
وليس أباً .. إن نوعية حنانه ومشاعره من تلك النوعية المختومة بختم الأمهات ..
إبتسم وقال لى فعلاً .. أنا أم .. فأنا لم أر أبى لأنه رجل وأنا لم أكمل ست شهور وتركنا
ثلاثة أولاد لأم لا يزيد عمرها عن ٢٦ عاماً .. فى أوج شبابها وفتنتها .. ولم تتزوج ..
ولم تعتمد على مخلوق .. كانت تبغ صيغتها وتبغ الموبيليا حتى تنفق علينا .. كان همها
الأول أن تنجح .. أن تكمل الرسالة .. فصارت أما وأباً معاً .. كانت تعاقبنى بنظرة
من عينها فقط .. وكم كانت هذه النظرة مؤثرة .. وحكى لى أنه أشيع ذات يوم أنه
أعتقل فى السجن الحربى .. وهرولت أمه إلى بيته لتطمئن عليه فطمأنها .. وقال لها إن
هذا كله مجرد إشاعة .. أقعدى استريجى .. فقالت له وهى تلتقط أنفاسها .. الحمد لله
.. وإنصرفت .. وبمجرد أن وصلت إلى بيتها .. قابلت إحدى جاراتها .. فتسألها
الجاراة .. خير سمعنا أن الأستاذ منعم مسكوه وخدوه على السجن الحربى .. وكأن ناراً
إشتعلت فى قلبها .. فهرولت مرة ثانية بعد أقل من ساعة إلى بيت الأستاذ مدبولى ..
فقال لها .. فيه إيه يا أمى .. أنا كويس .. ما تخافيش .. وهكذا .. ست مرات تروح
وتجئ .. إنها لا تستطيع أن تحتل أن تسمع إشاعة مجرد على ابنها .. وبكى الأستاذ ..
وقال لى لم أحضر العزاء .. كان عندى مسرح وكان الجمهور فى إنتظارى .. سألته ..
وذهبت لتعرض المسرحية؟! .. فأجاب .. ذهبت .. وضحك الناس .. ولكنى لم
أضحك بعدها .

والضاحكون أيضاً .. الذين يملأون حياتنا بهجة .. لهم قصص مفاجعة مع أمهاتهم ..
فهذا شارلى شابلىن عبقرى الكوميديا فى الدنيا كلها .

شارلى شابلن ..

ويقول شارلى شابلن عبقرى الكوميديا فى الدنيا كلها ..

ولدت فى ١٦ أبريل عام ١٨٨٩ وكانت حياتى بناء على ما تقولى أُمى سعيدة .. كانت أُمى ممثلة فى مسارح الفردفيل ضئيلة الجسم بيضاء البشرة ذات شعر بنى فاتح وعينين لونهما بنفسجى وكنا نعبدها أنا وأخى مع أن جماها لم يكن خارقاً فإننا كنا نعتقد أنها تشبه الملائكة .. كانت تأتى بعد المسرح وتترك لى بعض الحلوى على المائدة كى أجدها فى الصباح ولا أزال أتذكرها حينما كانت تأخذنا فى المركبة التى تجرها الخيل أنا وأخى وأنا أحاول أن ألمس أشجار السوسن التى تمر بنا .. ولكن حدث شئ جعلنى أدرك أن الأمور لم تكن على ما يرام بين أُمى وبين العالم .. كانت ثائرة هائجة ورأيت دموعها التى كانت تخفيها هذه ، وعلمت أن أُمى عائدة من المحكمة حيث كانت تقاضى والدى بسبب عدم إنفاقه على طفليها .. كان صوتها مصدر متاعب لها فهو لم يكن قوياً وأقل إصابة بالبرد تسبب له إتهاباً بالحنجرة فكان يخذها كثيراً أثناء الغناء على المسرح فيضحك الجمهور ساخراً ويشعر فى الصفيح .. وذات ليلة كانت تغنى وأذكر أننى كنت واقفاً فى الكواليس وخانها صوتها وبدأ الجمهور يضحك ويمامئ كالمعيز ويموء كالقطط .. وأرغموها على أن تترك المسرح .. وزادت الضجة ونشب جدال بينها وبين مدير المسرح فقادنى من يدى إلى الداخل وتركنى وحدى على المسرح وأمام أضواء المنصة بدأت أغنى لأول مرة فى حياتى أمام جمهور .. وتدفق على المسرح سيل من النقود وذهب صوتها بعد ذلك إلى غير رجعة وتركت المسرح ، وكلما زاد إنحدارها فى هاوية الفقر كنت ألوم أُمى على ذلك فكانت تبتسم وتقول لى إن تلك الحياة زائفة وصناعية .. وبدأت تشتغل فى الحياكة والإبرة تخطط الثياب بقروش قليلة من اجل أن تربينا أنا وأخى . وبدأت أُمى تبحث عن وظائف .. وبدأت المشاكل تتراكم وتآخرنا فى دفع أقساط ماكينة الخياطة فأخذوها .. ولم يكن أمامها سوى حل واحد .. أن ندخل نحن الثلاثة الملجأ .. أنا وأخى .. وأُمى .

وحكايات كثيرة يقصها علينا شارلى شابلن .. كلها عن أمه .. الغارقة في العذاب حتى أذنيها هذه .. والتي قدمت للعالم كله تلك السعادة العبقريّة في صورة شارلى شابلن .. حقاً قد تولد السعادة من رحم العذاب إذا كان هناك أم .. أم عظيمة .

وعادل إمام ..

المتربع على عرش الكوميديا في العالم العربي .. لعشرات السنين كنت كلما كتبت له مشهداً مؤثراً .. ينظر إلى يمين السيناريو ليقراً الوصف .. وما أن يجد كلمة "بيكى" حتى يقطب جبينه .. ويلوى بوزه .. ويبرق لي تبريقته الكوميديّة الشهيرة .. قائلاً بإستنكار .. أبكى؟! ولماذا أبكى .. وتبدأ الخناقة .. أنا متمسك برأى .. البطل في حالة مؤلّة .. يجب أن يبكى والزعيم يدافع عن وجهة نظره .. لا يا جو .. أنا ممكن أعيط الناس من غير ما أبكى .. ح تشوفها .. ح أحبس دموعى .. وده ح يبأه مؤثر أكثر .. وكأنه يبخل بدموعه؟! قلت لنفسي .. عادل إمام .. لا يبكى .. ورحلت أمى .. وعزاني .. وجاء لي وواساني في محنتى .. ولكن رحيلها ظل جاثماً على صدرى .. وطالت المدة .. وجاء عادل إمام لكى يخرجنى من محنتى .. جلس معى وقال بعقل .. يا جو .. أنا عارف قد إيه هى غالية عليك .. ومقدر مشاعرك تجاهها .. إنها تخيل هى كده شعورها إيه وإنت قاعد كده مش عاوز تشتغل؟! ولا تكلم حد .. أكتب يا جو .. وإشتغل .. ده أكيد ح يفرحها .. هما أكيد بيبأوا حاسين بينا .. ثم أخرج لي من محفظته صورة سيدة مبتسمة إبتسامة طيبة .. صورة أبيض وإسود مقاس ٦×٤ .. وقال لي .. أمى أهيه .. ما راحتش عن بالى من يوم ما ماتت .. جاءت لتحضر مسرحيته شاهد ما شافش حاجة .. وجلست في بنوار كنت أعرفه .. وحين إنتهت المسرحية حيت الجمهور .. ثم حيتها هى تحية خاصة .. إنحنيت إنحناءة زائدة .. وكانت سعيدة جداً .. وبعد أن ماتت لم أبك .. تحملت بجلد وصبر .. وأتممت كل

الإجراءات .. ومر شهر او أكثر .. وفجأة وجدت نفسى أركب سيارتى .. وأنطلق بها .. ووقفت بالسيارة وحدى فى المساء .. انفجرت فى بكاء متواصل لا ينتهى .. وبينما الأستاذ عادل إمام يحكى لى .. أغرورقت عيناه بالدموع .. ثم أخذ يبكى وكأنه إستحضر اللحظة .. وعرفت لماذا كان يعترض على كلمة "يبكى" فى السيناريو لأنه بكى البكاء الأعظم .. البكاء الذى لا بكاء بعده .. البكاء على رحيل الأم ..

.....

وأخيراً هؤلاء المبدعون الذين تكلموا عن أمهاتهم .. كانت أم كل منهم هى ماما نونا خاصة به .. إن فى حياة كل منا حقيقة كبرى إسمها الحب الأول .. وهو حب الأم .. وفى حياة كل منا فاجعة كبرى .. هى رحيلها .. وأترككم مع حكاية ماما نونا ..

يوسف معاطى ...

حكاية ماما نونا

نحن في ليلة رأس السنة .. الكاميرا تتابع بسرعة شديدة حالة البهجة التي تكون عليها
القاهرة في ليلة رأس السنة .. نرى معلقاً على واجهات المحلات جملة
Happy new year 2007 .

نرى الشباب واقفين يشربون البيره بجوار السيارات .. ضحك وغناء .. وموسيقى
مبهجة للغاية .

نرى بابا نويل في ملابسه الحمراء وذقنه البيضاء يحمل كيساً كبيراً وينزل من أحد
العمائر .. ثم تطلع الكاميرا للدور الثاني لنرى طفلاً جميلاً ممسكاً بلعبة ويشير له بسعادة
.. وأمه واقفة بجواره .

نرى سيارة صغيرة (مينى) حمراء تجوب شوارع القاهرة بسرعة ثم نرى واجهات
المحلات من خلال وجهة نظر السيارة .. على زجاج السيارة الخلفى (فيميه) مكتوباً
بحروف إنجليزية *Hamada* .

السيارة تقترب من بعض البنات الواقفات في سعادة مع الشباب ثم تلقى بصاروخاً
يصدر نيراناً .. يفزعون ثم يضحكون .. والسيارة تنطلق .. ثم تلقى بأكياس البومب
فتحدث فرقة ضخمة .. فزع وضحك من الواقفين .. ديزولفات متتالية .. حيث
يمضى وقت بعض منتصف الليل .. ثم يتخلل ذلك آذان الفجر .. ونرى المصلين
يذهبون إلى الفجر بالجلاليب البيضاء .. والذقون .. ثم .. نرى زجاجات مكسورة على
قارعة الطريق .. وبعض الأطفال يلعبون في الشارع .. ثم ديزولف نهائى على صفحة
النيل وقد بدأت الشمس تشرق .. وقت الفجر .. ثم حالة سكون للمشهد وأستقرار
لتندلع بعدها مظاهرات الطلبة أمام الجامعة وعربات الأمن المركزي تحاول إحتواء
المظاهرة وعنف الطلبة .. فينهالون عليهم بالعصى ويلقون بهم في عربات البوليس .

وبين كل هذا الصخب والعنف بين ليلة رأس السنة ومظاهرات الطلبة يلتقى الأخوان
حسام وإبراهيم .. حسام في موقع ضابط أمن الدولة العنيف الذى لا يرحم وإبراهيم
المتنرد الثائر في عنف أيضاً .. ولنتأمل معاً الحوار الدائر بينهما .

حسام : كله يقلع الجزمة ياد إنت وهو .. مش عاملين لى رجالة .. يا شوية
عيال .. طيب أنا ح أمذكوا على رجلكوا علشان تبأه سنة جديدة
مطينة على دماغكوا من أولها .. وحياة أبوك إنت وهو لأخليكوا

تشوفوا أسود أيام حياتكوا .. يا زينهم .. هات الجلدة وجهزلى
الحجز اللي تحت .! .

يبدأون فى خلع الأحذية .. وهم فى قمة الرعب .. فجأة .. حسام ينظر فيجد أخيه
إبراهيم بينهم .

وإبراهيم ينظر نحوه مرعوباً .. حسام يجلس من هول الصدمة .. ويبلغ ريقه بصعوبة .
يدخل الصول زينهم ومعه الجلدة وبعض الجنود .

زينهم : جاهزين يا باشا .. ننزلم تحت .! .

حسام : نعم ؟! .

زينهم : ننزلم تحت يا باشا .

حسام : لأ يا زينهم .. أستنى .. أنا لسه ما إتكلمتش معاهم .. طلع لى العيال
دى برة ودخلهم لى واحد واحد . .

زينهم يقوم بدفع الطلبة خارجين .

زينهم : أطلع ياد أنت وهو .. أطلع يا حيوان .

حسام يقف معطياً ظهره لهم .

حسام : أستنى أنت .! . عاوزك .

إبراهيم يقف .. الطلبة يخرجون ويغلق الباب عليها .

حسام ينظر نحوه بغل شديد .. ثم يمسكه من الياقة بعنف .

حسام : أنت بتعمل إيه هنا ؟ . عامل لى فيها ثورى وطالع لى فى المظاهرات
حسام يزغده فى كتفه بعنف .

حسام : رد عليا ؟ .

إبراهيم ينظر نحوه فى خوف وإستسلام .

إبراهيم : يا حسام أنا من حقى أعبر عن رأى .! .

حسام : أسمى حسام بيه يا روح أمك .. وأوعى تفتكر أنك علشان أخوياح
أرحمك .. أنا ح أدفك هنا .. أنت لو أتسجنت أبوك ح يسأل
فيك ؟! . أمك ح تعرف تعمل لك حاجة ؟! .

إبراهيم فى يأس وإحباط .

إبراهيم : لأ .. محدش ح يعمل لى حاجة .. ما أنا عارف أنى لوحدى فى
الدنيا دى .!

حسام صارخاً أكثر .

حسام : ولما أنت عارف كده .. مش تتنيل على عينك وتمشى جنب الحيط .
إبراهيم منهاراً ينظر نحوه بذل وإستعطاف .

إبراهيم : عاوز تسجنى .. أسجنى يا حسام بيه .. أعتقلنى .!

حسام : وأمك لما تيجى تبوس رجلين أمى وتعيط لها عشان أخرجك ؟!

إبراهيم : ما تسألش فيها .. أحنا طول عمرنا محدش سائل فىنسا .

حسام : وأنا يبأه إيه منظرى قدام رؤسائى هنا .! . ظابط فى أمن الدولة
أخوه يتمسك فى الشغب ؟!

إبراهيم : ما تضايقش نفسك يا حسام بيه .. أحنا أخوات فى البطاقة بس ..

قول لهم إن ده تشابه أسماء .. إبراهيم حماده عزو ابن عيشة

الشغالة غير حسام حماده عزو ابن الست فوزية هانم .. اللى أتولد

وفى بقعة المر غير اللى أتولد وفى بقعة الشيكولاتة .

حسام يصفعه بقوة .

حسام : أنت قليل الأدب ومش متربى كمان .!

إبراهيم : أنا مش قليل الأدب يا حسام بيه .. إنما أنا مش متربى فعلاً ..

الأستاذ حماده عزو .. أبويا .. وأبوك .. معندوش وقت يربى .!

ثم يبرز لنا قصر عزو باشا .. وكأننا نبحت عن جذور الأخوين وكيف وصلنا إلى ما

وصلا إليه .. من إنشقاق وعنف حيث نرى منظر عام لقصر عزو من الخارج .. القصر

يبدو قديم وفخم للغاية .. مثل القصور القديمة .. على باب القصر نرى مكتوباً

"قصر عزو باشا" يافظه قديمه .

الآثاث داخل القصر آثاث عريق ولكنه قديم .. والقصر مشمس وجميل للغاية .. نرى

صور مختلفة لحماده عزو .. منذ أن كان رضيعاً .. وفى مراحل المدرسة المختلفة .. لا

توجد على الجدران سوى صور حماده عزو .. وصورة لعزو باشا الكبير فى إطار فخم

تتصدر الهول ونرى أن به ملامح من حماده .

عم سيد الذى يعمل مع العائلة .. رجل فى منتصف الخمسينات من العمر .. ولكن يبدو عجوزاً يقوم بتركيب الزينات لعيد ميلاد حماده .. واقفاً على السلم يعلق الأشياء .. تنزل نونا من على السلم وفى يدها باقى الزينات .. نونا سيدة سمينية بعض الشيء مرحة للغاية .. يبدو على وجهها البهجة .. ترتدى روب صوف غالى الثمن .. شعرها مصفف بطريقة كلاسيكية .. غير محجبة .. ملابس بيت أنيقة تتناسب مع المستوى الإجتماعى لعائلة عزو .

نونا : إيه يا سيد .. أنت لسه مخلصتش .. آمال أمتى ح نعلق دول .!
سيد : حالاً يا ست نونا .. بأربطها أهيه .!
نونا : لأ .. أنت تسبب اللي فى إيدك دلوقت وتطلع على الفرن عشان تجيب الحاجات بتاعة عيد الميلاد .. زمانهم خلصوها .. ياللا أعمل لك همة يا سيد .
سيد : كل سنة وسى حماده بيه طيب يا ست نونا .. ربنا يخليه ولك ويخليكى ليه يا ست الكُل .. ده المعادى كلها بتتحاكى كل سنة على عيد ميلاد حماده بيه .. إنها .. هوه كمل كام السنة دى .
نونا : تديله كام سنة يا سيد .
سيد : ٤٩ ، ٥٠ سنة مايزيدش عن كده .!
نونا : (ضاحكة) جاتك إيه يا سيد .. أنت بتصغره ولا بتصغرنى أنا .. حماده بيه .. كمل النهاردة ٦٠ سنة .. مولود يوم ١ / ١ / ١٩٤٧ .
سيد : ٦٠ سنة .. لا يمكن .. ما بيانش عليه خالص .. ده على كسده أنا أصغر منه يا ست نونا بتلات سنين .
نونا : خمسة وخمسة فى وشك يا سيد .. ياللا إجري هات الحاجة من الفرن .. ورانا ستين حاجة .
سيد : هو يا ست نونا .
نونا تطلع إلى الدور العلوى .. وهى تنادى .
نونا : يا حماده .. يا حماده .!

نوننا تفتح الباب .. لنجد حماده عزو مستغرقاً في نوم عميق ونجد قناة أفلام الكارتون لسفالة ..

حجرة حماده عزو بها كثير جداً من اللعب وبلاى ستيشن .. حجرة عجيبة تناسب رجل يعمل في لعب الأطفال .. أو كأنها حجرة طفل .
نوننا تقترب من حماده عزو .. في تدليل واضح وهى تزغزغه في رجليه .. يبعد رجليه ويتقلب .. تزغزغه في وسطه .

نوننا : قوم يا حماده .. قومى يا طعمة .. قومى يا كميلة .. حد يفضل نايم كده لحد الضهر يوم عيد ميلاده .. آدى آخرة السهر لوش الصبح .. وسايب التلفزيون مفتوح كمان .

نوننا تغلق التلفزيون .

وحماده ينهض في ضيق .

حماده : يا ماما .. سيينى أنام شوية بأه .!

نوننا : تنام لحد أمتى .. ده أحننا بأينا الضحى يا حماده .. كل سنة وأنت طيب يا حبيبى .

حماده يقبلها في دلال طفولى جميل ..

حماده : وأنتى طيبة يا ماما .! يا نوننا يا جميلة .

نوننا : قوم ياللا خد حمامك عشان أعمل لك الفطار .. قومى يا بيضا .. قومى يا قطة .. قوم ياللا أغسل وشك وأتشطف عشان تروح المحل .

حماده يقوم في ضيق وتكاسل .

نوننا تفتح الدولاب وتخرج الغيارات .. ثم الملابس التى سيخرج بها .

حماده : إيه ده كله يا ماما .. ثلاث فانلات وبلوفرين وبالطو .

نوننا : البرد بره بعيد عنك .. لازم تتقل .. ياللا .. قوم كده وأتنشط لحد ما أحضر لك الحمام .

حماده يقوم متكاسلاً .

ويتمطع في ثناء جميل

نوننا نضع الغيارات والفوط ثم تجرب المياه الساخنة .. وتضع الشامبو فى المياه .
نوننا : ياللا يا حماده .

حماده يغط فى نوم عميق .. تدخل نوننا وفى يدها المبخرة .

نوننا : (تضربه) أنت نمت تانى .. قوم يا حماده .

نوننا تقرصه بعبث طفولى فى فخذة .

حماده : آه .. خلاص أهوه .. قُمت .. قُمت والله يا ماما .

ملعقة عسل تضعها فى فمه .. يأكلها بنهم .. نوننا وقد غيرت ملابسها وصارت ترتدى
تاير أنيق للغاية .

نوننا : معلقة العسل دى شفا تحوش عنك البرد وأى حاجة .

حماده : أنتى عزمتى مين النهاردة فى عيد ميلادى .

نوننا : ح أعزم لك الحبايب كلهم .

حماده : أوعى تعزمى الواد حسام .

نوننا : ليه يا أخويا .. ده إبنك ولازم يبجى يقولك كل سنة وأنت طيب

يا بابا ويبوس إيدك كمان .. هو ليه غيرك يا حبيبى .!

حماده : لا .. أنا مش عاوزه يبجى .. ده كل ما يشوفنى يقعد يزغق لى

ما بيعمليش إحترام .. كأنه هوه اللى أبويا مش أنا اللى أبوه .

نوننا : والنبى حسام طيب ويبحبك هوه بس اللى وارث النعرة الكدابة

دى من أمه فوزية .. إنها ابن حلال .

حماده : ولو جه بأه وهزأنى قدام الناس وبوظ الحفلة بيأه كويس .!

نوننا : محدش يقدر يهزأك يا حماده وأنا على وش الدنيا .

حماده : وأنتى لابسة ورايحة فىن ؟!

نوننا ترتدى البالطو الأسود الكاشمير وحقيبتها الصغيرة فى يدها متأهبة للخروج .

نوننا : عندى كام مشوار .. عاوزة أعملهم قبل الزحمة .. الناس لسه

نايمة ما فاقتش من ليلة رأس السنة .

حماده : بيأه أوصلك فى طريقى .

نوننا : لا روح أنت شوف شغلك .. أنا ح أخذ تاكسى من ع الشارع .

الكاميرا تظهر لنا حماده خارجاً مع أمه نونا واضعاً ذراعاه في ذراعها في كوريدور الأشجار أمام القصر .. وقد بدا وكأنهما عاشقان .. يقترب من السيارة .. وهي تدعوه نونا : اللهم وأنت جاهى بحق النهار الفضيل ده يفتحها في وشك يا حماده يابن بطنى ويستر طريقك يارب .. أسمع .. ما تاكلش حلويات عشان تاكل بلليل .. عشان نفسك ما تنسدش .!

يخرجان من القصر .

ثم تشير لتاكسى .

نونا : مصر الجديدة .

حماده ينظر نحوها سعيداً ..

حماده : ماما نونا .!

يقذف لها بقبلة .. تضحك .

.....

وبرغم المأساة التى تعيشها أسرة عزو إلا أن حماده عزو وماما نونا لاهم لهما إلا التحضير لعيد ميلاد حماده .. أنظر إليها وهى تذهب لتعزم زوجات عزو وكأن كل شئ على ما يرام .. تذهب إلى عيشة زوجته الأولى فى الحارة الشعبية وفى بيت عيشة . نونا جالسة وعيشة تقدم لها القهوة فى أدب جم .. بيت عيشة بيت متواضع للغاية فى منطقة شعبية .. ونرى على الحائط صورة زفاف عيشة على حماده .

عيشة : دى خطوة عزيزة يا ست نونا .. أحنا زارنا النبى النهاردة .!

نونا : تسلم إيدك يا عيشة .!

عيشة : وأزاي سى حماده .

نونا : كويس الحمد لله .. آمال فى إبراهيم ؟!

عيشة : راح الكلية يا ست نونا .

نونا : أمسكى يا عيشة .

تعطيها مبلغ من المال .

نونا : شهرتك أهيه .!

عيشة : ربنا ما يجرمنا منكوا يا ست نونا .

نوننا : النهاردة عيد ميلاد حماده .. أبو إبراهيم .. لازم تجيبى إبراهيم
وتيجى يا عيشة .

عيشه : ده أحنا نتشرف يا ست نونا .. أحنا فى ديك الساعة .. ولو عاوزانى
أجى بدرى أعمل لك أى حاجة فى المطبخ أنا تحت أمرك .
نوننا : لأ يا عيشة كتر خيرك .. أنتى حبيبتى .. أنتى عارفة .

الباب يفتح يدخل إبراهيم .

عيشه : أهوه جه المحروس إبراهيم .. تعالى .. تيتا هنا يا إبراهيم .. الست
نوننا .

نوننا : تعالى يا هيما .. تعالى يا حبيبى .. ما شاء الله .. ده بأة راجل أهوه .
إبراهيم : أزيك يا تيتا .!

نوننا : إيه مالك يا واد يا إبراهيم ؟!

إبراهيم : مفيش .! وإزاي الأستاذ حماده يا تيتا .!

نوننا : حد برضة يقول على أبوه الأستاذ يا إبراهيم .

عيشه : ما تتكلم كويس يا إبراهيم .

إبراهيم : ما هو عشان أقول عليه أبويا .. لازم يكون أبويا فعلاً .!

نوننا : عيب يا إبراهيم .. أبوك باعتنى ومأكد عليا أعزمك على عيد ميلاده
.. ألاقك شايل منه وحاطط فى قلبك قد كده ؟!

يتركها ويمضى .

إبراهيم : أبويا عازمنى على عيد ميلاده .. ده إيه الهنا اللي أنا فيه ده قوليله كل
سنة وأنت طيب يا حاج .

نوننا : الواد ده بيتكلم كده ليه ؟ . اللي يسمعه بيقول كده يقول أبوه كارهه
ولا طارده ولا مش سائل فيه .. أنا مش جيت له كام مرة أتحايل
عليه عشان ييجى يقعد عندنا فى المعادى ويكمل جامعته
ويتخرج .. ده أبوه بنفسه كان موضب له أوضته فى الفيلا
ويقول لى روحى يا ماما هاتى إبراهيم يعيش معانا بأة .. دى
جزاته .

في خجل

عيشه: مملش يا ست نونا .. أنا مش عارفة الواد ده إيه اللي جراه .. أنا
باتأسف لك يا ست نونا .. وأقلعي جزمتك وأضربيني بيها ..
أنا حاجي يا ست نونا .. حاجي .. ح أعدي إبراهيم وأكون
عندك قبل المغرب .

نونا : (مقموصة) .. طيب يا عيشة .

تقوم لتمضي .

عيشة تتابعها خلفها حتى الباب .

عيشه: شرفتينا بالزيارة دي يا ست الكُل .. ونورتينا وكرتينا .. والواد
إبراهيم ده والنبي ما ح أسيبهاله .. حقك عليا .. ما تزعليش
منى يا حبيبتى .!

ومن بيت عيشة الحقير الشعبي إلى بيت فوزية الفخم .. وفوزية طليقته الثانية .. بيت
فوزية بيت أنيق للغاية أرسقراطى به تحف كثيرة حيث أن أبو فوزية هو الأستاذ منير
الجوهري صاحب محل أنتيكات .. نونا جالسة في الصالون ومعها فوزية .

فوزية : والله واحشاني يا طنط .!

نونا : ربنا يخليكي ليا يا فوزية يا حبيبتى .. وماجرمني منك أبداً .. أنتى
عارفة غلاوتك عندي .. ده أنتى أول بخته .!

فوزية : وهوه أزيه .!

نونا : الحمد لله .. كويس يا فوفا .!

يدخل منير الجوهري مرتدياً روب دي شامبر رجل كبير في السن ويبدو عليه الخبرة
والنضج .

منير : أهلاً وسهلاً .: إزيك يا نونا هانم .

نونا : أهلاً بيك يا منير بيه .

منير : مش الصحة تمام .

نونا : نحمده على كل شئ .

فوزية : خير يا طنط .. أنا حاسة إنك عاوزة تقولى حاجة من الصبح .

تضحك وتكلمها بود زائد .

نونسا : طول عمرك تفهميها وهي طابرة يا فوفا .

تنظر لمنير .

نونسا : أصل فوزية دي بنتي مش مرات إبنى .. أصل النهاردة زى ما إنتي عارفة .. عيد ميلاد حماده .. أبو حسام وداليا .. وأنا عاوزا كوا تشر فونا وتيجوا كده تنورا الحفلة .

فوزية : حفلة .. حفلة إيه ؟!

نونسا : عيد ميلاد حماده .

فوزية : هوه لسه بيحتفل بعيد ميلاده يا طنط .. هو مش عدا الستين الراجل ده .!

نونسا : لأ يا حبيبتى .. النهاردة ح يكمل ستين سنة .

فوزية : ومش مكسوف من نفسه .. حد في سنه لسه بيحتفل بعيد ميلاده .

منير : وبعدين يا فوزية .. ما يصحش كده .!

نونسا تتكلم بجدية وتأثر .. وقد بدا بالفعل أنها تحمل هم حماده وتريد أن تجمع أولاده حوله .

نونسا : هي معاها حق يا سنير بيه .. بس أنا جايالكم النهاردة مش عشان تيجوا تطفوله الشمع وتغنوله .. أنا خلاص كبرت في السن .. ومهما عشت .. مانيش عايشاله .. عاوزة ولاده يتلموا حوالية .. وأحنا مهما زعلنا ولا بعدنا عن بعض .. الضفر ما بيطلعش من اللحم .

فوزية مندهشة في سخرية .

فوزية : يااه يا طنط لسه فاكرة .. جاية بعد ما الراجل كمل ستين سنة عاوزة تلميه على ولاده .. والله دي نكتة .. وهو طول السنين دي ما فكرش يلم ولاده ليه .. ده بيشوف حسام ماشى في الشارع بيدور وشه الناحية الثانية كأنه ما يعرفوش .

نوننا : ما أنتى عارفة حسام يا فوزية .. عصبى وعلطول بيعلى صوته عليه .. مع إن حماده بيعبه .. والنبي بيعبه .. ده البكرى بتاعه .

تدخل داليا .. ترتدى زى المضيفات فى مصر للطيران .
تجرى نحوها وتلقى بنفسها بين ذراعيها .

داليا : لا لا مش معقول .. تيتا نونا عندنا .. وحشتينى قوى يا تيتا .. وإزى بابا .. عامل إييه ؟

نوننا : إيه يا بت القمر ده .. البت دى قاعدة من غير جواز لحد دلوقت ليه فوزية : خايقة تخيب خيبة أمها .

تغير الموضوع .

داليا : تيتا أنا جيت لبابا الحملات اللي كان قايل لى عليها من لندن .. ح أديها لك تديها له .. كويس انى شفتك .

نوننا : وتديها لى ياختى .. ما تروحي النهاردة تديها له بنفسك .. أهو تقويله كل سنة وأنت طيب يا بابا .

داليا : يا نهار أسود .. ده النهاردة عيد ميلاده صحيح .. طيب كويس بأة أنها جات كده .. أهى تبأة هدية عيد ميلاده .

فوزية : ويا ترى ح تقولى لأخوكى إنك رايحة عيد الميلاد .

داليا : خلاص بأة يا ماما .. أنا ح أروح خمس دقائق وأجى ومش ضرورى تقولى لحسام .. علشان خاطرى .

نوننا : ربنا يخليكى يا داليا .. ما هى داليا دى طالعالى نسخة منى .. ما تشيلش جواها أبداً .

ثم نلتقى بعلاء عزو وكمال عزو أولاد عم حماده .. لنعرف منها كيف يعيش حماده مع ماما نونا .

علاء نائماً فى شقته يبدو على الشقة فوضى كبيرة للغاية .. زجاجات ملقاة فى كل مكان والجرائد وبقايا الطعام .. علاء رجل وسيم فى بداية الخمسينات تبدو على وجهه ملامح عائلة عزو الأرستقراطية العريقة .

طرق على الباب جرس طويل .. علاء يقوم متكسراً بالعافية وهو يشعر بإرهاق شديد

علاء : حاضر .. حاضر يا برعى .. راح فين الحيوان ده .. يا برعى .. الله ..
.. قلت جاى .

علاء يفتح الباب فيجد أمامه كمال .

علاء : إزيك يا كمال .. تعالى .. إيه فيه إيه ع الصبح كده ؟!

كمال : صبح إيه .. الساعة ٤ العصر .

علاء : ياااه .. ده أنا جسمى مدشدش .!

كمال : يابنى مش ح تعقل بأة وتتجوز بدال الحياة اللي أنت عايشها دى

علاء : أقعد يا كيمو .!

يضحك .

كمال : ماما نونا مستحلفالك .. ح تديلك علقه .

علاء : أنا مقصر معاها فعلاً .. أدبلى شهر ما روحتلهاش .

كمال : النهاردة عيد ميلاد حماده .. لازم تروح أحسن تزعل .

علاء : والله العظيم العيلة دى ضاربة .. هوه حماده ابن عمك ده لسه ما

أنفطمش يا كيمو .. ماما نونا محسسانى بكده .. أنت عارف أننا

ح أجيب له إيه هدية .. بزازة .!

كمال : ما أنت عارف إنها ماهاش غيره .. إنها الوحيد بأة .!

علاء : إنها الوحيد إيه .. ده راجل عنده ٦٠ سنة ومدلعاه دلح مرق ..

والله العظيم ساعات يبأة هاين عليا ألطشه قلمين على حدوده

المللظين دول .

كمال : أنها أنت أخبارك إيه يا علاء .

علاء : أخبارى زى الزفت عادى يعنى .. بأخذ كل هدر وهدر بعيد

عنك .. وخلص بأيت على فيض الكريم .. ومعنديش ماما

نونا أقول لها إحقينى .

كمال : ما أنت عمال تخش فى مشاريع خسرانة يا علاء .

علاء : هية خسرانة .. خسرانة من أولها لآخرها .. الدنيا بتاعتي كده .!

ويعود حماده في النهاية في ليلة عيد ميلاده بعد طول إنتظار له من الجميع .. ولكنه لا يعود وحده .. وإنما معه زوجته الجديدة (إيناس) ولا رد فعل لنونا سوى الإندهاش فقط .

نرى عيد الميلاد وقد تألفت شلة سليمان والسويت هوم تماماً .. كلهم على المعاش .. وهم يضحكون وفي جانب آخر نرى أطفال يتجاذبون البالونات .. ونونا تروح وتجئ في الهول وعيشة تقدم المشروبات .
ويمكن أن نرى داليا وخلفها أربعة أو خمسة أطفال .. في شكل قطار .. وهي تجرى وتغنى وهم وراءها .. ونونا تضحك .
تغنى .

داليا : علشان مين الحفلة دي ؟!

الأطفال : ديدوبة التخينة .

داليا : اللي لابسة فستان وى .

الأطفال : فستان وجيونة .

كمال وعلاء يعلقان على المشهد وبروى الاغنيه مستمر على المشهد .

علاء : شايف أصحاب حماده كلهم ع المعاش .. حماده ده عامل زى مجلة

ميكى من ٧ الى ٧٧ .

كمال : وطى صوتك يا علاء أحسن ماما نونا تسمعك وتاخذ على

خاطرها .

علاء : الحكاية مش مستاهلة كلام .. الصورة قدامك أهيه تعبر خير تعبير

عن المسخرة اللي أحنا فيها .

حماده داخلاً ومعه إيناس وهيتم .

حماده : أنا آسف .. أنا آسف جداً .

نونا : حماده .. كنت فين ؟!

حماده : أنا آسف قوى يا جماعة .. لسه فيه وقت نطفى الشمع .

نونا تنظر إلى إيناس وهيتم .

حماده : أقدم لكم إيناس مراتى ؟!

والجميع ينظرون له في دهشة .

الكل إنصرف ولم يعد بالبيت إلا حماده وإيناس ونونا وهيثم .

إيناس وحدها مع هيثم في الصالون .. ونونا تحتلى بحماده في ركن آخر من القصر خارج الصالون وتبكته ولكن بهمس حتى لاتسمع ايناس .

نونا : كده يا حماده .. كدهوه .. ده أنت نازل الصبح رايح على شغلك

وقايل لى راجع علطول .. تخش عليا بواحدة غريبة كده وتقوللى

متجوزها .. جيبتها منين دى يا حماده؟! رايح تتجوز من غير

ماتقوللى .

حماده : إيه يا ماما .. ما أنا قلت لك علطول .. هو أنا خبيت عليكى .. ده أنا

لسه متجوز حالا .. أنا جيت من عند المأذون على هنا علطول .

نونا : ده أنا من صباحية ربنا دايرة ألف على عيالك بألمهم لك حواليك ..

وأنت جاي بعملتك دى تطفشهم .

محاولاً أن يضحك عليها .

حماده : خلاص بأة يا ماما .. عشان خاطرى ماتنكديش عليا الليلة دى .. ده

أنا جايها تخدمك وتسليكى .. أضحكى بأة .. فُكيها بأة يا نونا

نونا : أحننا ناقصين مصاريف يا حماده .. أما تروح تتجوز؟! .

هامساً .

حماده : دى صاحبة محل وعندها فلوس قد كده .. ماتخافيش .. إبنك واقع

واقف .. أنا جامد قوى .. فرفشى بأة .. ده ليه دخلتى .

نونا تبتسم رغماً عنها .

إيناس : طيب أنا آسفة يا طنط .. أنا الظاهر أزعجتكم .. ياللا بأة يا حماده

عشان توصلنا .

نونا : يوصلكم فين .. والنبي مانتي ماشية .. حد يسبب بيته وينزل ليلة

الدُخلة .. الناس يقولوا إيه؟! عروسة نازلة في نصاص الليالى .

إيناس : أصلى ما عملتش حسابى يا طنط .. هدومى كلها في البيت .. ح أنام

إزاي؟! .

نوننا : وده كلام برضة .. قمصان النوم مفيش أكثر منها .. والنبي ده أنا
عندى كام طقم جُداد بشوكهم ما إتلبسوش .. ما تتكلم يا
حماده .

حماده : هى ماما عندها حق بصراحة يا إيناس .. وبعدين الدنيا برد بره ..
وهيتم ممكن ياخذ برد لو خرج دلوقت .!

نوننا : تعالى يا أنوس .. تعالى معايا .. نقى قميص النوم اللى يعجبك ..
تعالى بأة .

تجذبها وتطلعان إلى الدور العلوى وإيناس تدعى الكسوف ونونا تضحك فى سعادة ..
يتبقى هيتم وحماده .

هيتم : هى ماما رايحة فين ؟!

حماده : نعم ! ماما رايحة تغير .. تغير هدومها .

هيتم : وتغير ليه .. ما تنام كده .

حماده : لأ .. لازم تغير يا هيتم .. الليلادى بالذات لازم تغير .. وأنت كمان
لازم تغير .. كلنا لازم نغير الليلادى يا هيتم .

هيتم : أنا ح أروح أنام مع ماما .

حماده : أستنى بس .. تنام مع ماما إيه بس .. الليلادى أنت ح تنام مع مامتى
وأنا ح أنام مع مامتك .

هيتم : ليه ؟!

حماده : أهو نغير .!

هيتم : لأ .. كل واحد ينام مع مامته .

حماده : وبعدين بأة .. مش إنت صاحبى وبتسمع كلامى .

هيتم : طيب مش هما بنات .. ما تسيبهم هما يناموا مع بعض ونام أنا
وأنت مع بعض .

حماده : بص بأة يا هيتم أنت كده ح تزعلنا من بعض .. تعالى بس أوريك
أوضتى .. دى فيها حاجات ح تعجبك قوى .!

هيتم : فيها إيه يا حماده ؟!

نوننا ترش الكولونيا على السرير .. وإيناس قد إرتدت قميص نوم عليه روب .
تخرج فوط وبشاكير من الدولاب وتضعها على ضلفة السرير .

نوننا : طبعاً يا أنوسة يا حبيبتي إحنالسه ما إعرفناش ببعض ولا أحنالسه
وأديننا فى الكلام مع بعضينا .. إنما أنا عاوزة أقولك حاجة
واحدة بس .. جوزك تحطيه فى عينيكى .. ومهما زعل ولا زهق
ولا أترفز تستحمليه .. هوه حمقى شوية إنما من جوه زى اللبن
الحليب .!

إيناس : أنا عارفة يا طنط أن أنا عملتلكوا إزعاج .. كده من غير إحم ولا
دستور ..

نوننا : إزعاج إيه ؟! . مادام إبنى يبحك وأختارك تبأى مراته .. تبقى بنتى
علطول .. ده إنتى مليتى علينا البيت أنتى وهيثم .. أنا عاوزاكى
تنامى وترتاحى .. وبكرة نقعد مع بعض من أول النهار .. ننم
على راحتنا .!

إيناس : مرسيه قوى يا طنط .

نوننا : ما بلاش طنط دى بأة .. إنتى تقولىلى يا ماما نونا .

إيناس : متشكرة يا ماما نونا .

نوننا : ما تحمليش هم هيثم .. ده ح ينام معايا فى حضنى .

إيناس : ربنا يخليكى يا ماما نونا .

التليفزيون يعرض (أليس فى بلاد العجائب) .. وحماده وهيثم مندجان تماماً مع الشريط
.. ينامان على السرير نفس النومة تقريباً .. تدخل نونا .

نوننا : إيه يا حماده .. أنت متجوز الولية عشان تسيبها وتنام فى أوضتك .!

حماده : ششت يا ماما .. أنا بأنيم فيه من الصبح .. كان بينعس .. أهو فاق

أهوه .!

نوننا : مالکش دعوة بهيثم .. سيهولى أنت وروح على مراتك مستنياك ..

أنا ح أخده فى حضنى لحد ما ينام .!

هيثم نصف نائم

هيشم : لأ .. أنا عاوز أروح لماما .
نوننا : حاضر يا حبيبي .. بس تعالى أما أحكيك حدوتة ح تعجبك قوى
.. تعالى بس .

تأخذه على حجرها .

نوننا : قال إيه .. كان فيه أرنبه عندها ثلاث عيال .

هيشم : أرانب برضة .

ضحكة .

نوننا : أمال إيه يعنى .. أرنبه ح تخلف إيه غير أرانب .

تشير لحماده أن يذهب ويتسلل دون أن يشعر هيشم .

نوننا : أمال إيه يعنى .. أرنبه ح تخلف إيه غير أرانب .

وفي يوم الأرنبه كانت رايحة السوق .. راحت أجمعت بأولادها وقالت لهم أوعى حد
يفتح الباب لأى حد .. أحسن يكون التعلب المكار .. فاهمين يا ولادى .. قالوها
فاهمين يا ماما .. قالوها إيه؟! .

هيشم وقد بدأ ينعس .

حماده : فاهمين ياماما

نوننا تلتفت وراءها لنجد حماده لا يزال واقفاً فى إنتظار أن ينام هيشم .

نوننا : إيه يا حماده .. أنت لسه واقف .. ما تروح بأة وأقفل الباب وراك .

حماده ينتبه .. ثم يخرج مسرعاً من الحجرة .

نوننا .. تاركة الفرصة كاملة لحماده أبنها لكى يختلى بزوجته الجديدة .. رغم اعتراضها

على الزيجة .. مكتفية بهيشم فى حضنها لإخلاء الجو للعروسين .

هيشم نائماً فى راحة عميقة وقد وضع قدمه فوق ماما نوننا التى نامت هى أيضاً .. وقد
هدأ الموقف تماماً .

ويفشل حماده فى الليلة الأولى فى الزواج .. ولكن .

صوت زغاريد ماما نوننا على القصر من الخارج فى الصباح الباكر .

ماما نوننا تنثر البخور .. وهى سعيدة مبتهجة .

إيناس تخرج من الحجرة وفى يدها الفوطة .

نوننا : ياللا يا أنوسة .. ياللا يا حماده .. الفطار جاهز .
إيناس : صباح الخير يا ماما نونا .
نوننا : صباح الورد يا أنوسة .. حماده لسه ما صحيش .
إيناس : لأ .. لسه أصله تعبان قوى .
نوننا : تعبان ليه .. ماله ؟!
إيناس : لا يعنى .. طول النهار إمبارح واقف على رجليه .. أمال فين هيثم
نوننا : هيثم ياختى صحى من بدرى وفطرتة وبيلعب فى الجنينة ..
بيتمرجح .!
إيناس تدخل الحمام .. ونونا تدخل الحجرة إلى حماده .
نوننا تدخل لتجد حماده نائماً .
نوننا : صباح الفل يا عريس .. ناموسيتك كُحلى .. ما تقوم يا حماده بأة ..
الفطار جاهز .. صباحية مباركة يا حماده .
حماده يفيق .. يتذكر ما حدث بالأمس .
حماده : صباح الخير يا ماما .!
نوننا : مالك يا ضنايا .. وشك دبلان كده ليه ؟!
حماده : مفيش يا ماما .
نوننا : أجيب لك الفطار فى السرير يا حماده .
حماده : لا يا ماما .. أنا خلاص صحيت .. أنا جاى وراكى .
تنظر له بشك .
نوننا : إنت فيه حاجة واجعاك يا حماده .. بتشتكى من حاجة .
حماده : لا يا ماما .. أنا كويس .. سيبنى بأة .
نوننا : طيب ياللا .. عشان تفطر مع عروستك .. ح أحضرلك الحمام .
تخرج .
حماده ينظر نحوها ساخراً بمرارة .
نوننا وحماده وإيناس .. وإفطار العرسان إفطار متنوع وكثير جداً .
إيناس : إيه ده كله يا ماما .. دى وليمة مش فطار .

نوناس : أصل لقمة الفطار دى أهم حاجة .. لو البنى آدم يفطر كويس ..
يقعد اليوم كله زى الأسد .

تبتسم .

إيناس : يا بختك يا حماده .. دى ماما نونة متوصية بيك قوى
نوناس : مالك يا حماده .. ما بتاكلش ليه ؟!
حماده : لأ .. مفيش .. ماليش نفس ..!
نوناس : مالكش نفس .. حد يقول كده صباحية دخلته برضة .
إيناس : سيهولى يا ماما .. أنا حأكله بإيدى .
نوناس : آه والنبي ياختى شيلى عنى شوية .. ده مغلبنى فى أكله .. آه ..
العسل .. نسيت معلقة العسل .
تجربى خارجة .. إيناس تنظر لحماده وتبتسم .. حماده فى قمة الضيق .
حماده : أنا مش فاهم أنتى مبسوطة قوى كده ليه ؟!
إيناس : يا راجل فكها .. هو حصل إيه يعنى ؟!
حماده : أنا عمرى فى حياتى ما ...

تقاطععه .

إيناس : خلاص بأة يا حماده .. كل حاجة ح تباة فل إن شاء الله .. كل شئ
بالخناق إلا الجواز بالإتفاق .
حماده : أسمعى .. أنا حاخذك ونطلع دلوقت على إسكندرية .
إيناس : إسكندرية فى البرد ده .

بإصرار .

حماده : أيوه .
إيناس : هيثم عنده مدرسة .. أصبر .. كل حاجة ح تيجى فى وقتها .
حماده : ما هو أنا الجوده بصراحة مش مريحنى .. هيثم يصحى .. هيثم يجبط
عليا .. قلق ومش عارف أركز .. مفيش تركيز خالص .. أنا
بحب هيثم إنما ..

إيناس : أنا ح أروح أوديه المدرسة وأبص على المحل بصة وأعدى ع البيت
أجيب هدومي وحارجع علطول .
تدخل نونا بربطمان العسل .. وتقدم له ملعقة العسل .
نونا : خد يا حبيبي .. خد هم يا جمل .!
حماده : لأ .. مش عاوز يا ماما .. سلامو عليكو .
نونا : على فين يا حماده .
حماده : نازل أشم هوا .
يخرج متضايقاً ونونا ترمقه بنظراتها .
نونا : هوه ماله يا أنوسة .. هو حصل حاجة .. لحقتوا زعلتوا مع بعض .
إيناس : لا والله يا ماما .. هو فجأة كده قلب من غير سبب .
نونا تحاول التودد إليها .
نونا : معلىش يا أنوسة .. أنا عارفة إبنى .. هو حس إنه أتجوز بأة
وأتكلبش .. بس أحسن أنا فرحانة فيه .. المرتين اللى أتجوز فيهم
.. عمل كده برضة يوم الصباحية .
إيناس : أنها يا ماما هوه حماده طلقهم ليه ؟ . بصراحة يعنى .
نونا : مفيش واحدة فيهم فهمته .. مش عشان إبنى .. أنها والله دى
الحقيقة .
إيناس : مش يمكن هوه اللى ما فهمهوش يا ماما نونا ؟ .
نونا : وهوه فيه راجل فى الدنيا دى يفهم الستات .. الست هى اللى لازم
تدادى الراجل وتفهمه .. وتمشيه زى ما هى عاوزة من غير ما
تحسسه بكده .. أصبرى .. أصبرى بس ده أنا ح أديكى دروس
تخليه يمسك فيكى بإيديه وسنانه .
وكان يجب عليها بحنكتها الأثوية أن تتصرف وتحاول أن تجد حلاً لحماده .
حماده جالساً فى محل لعب الأطفال ويدخل عم سيد .. وهو يكتب فى ورقة صغيرة .
سيد : أوامر يا حماده بيه .

حماده : أسمع يا عم سيد .. تروح الصيدلية الى على أول الشارع وتجييب لي
الدوا ده .

حماده يعطيه ورقة .

سييد : سلامتك يا حماده بيه .. دوا إيه ده ؟!

حماده : لا .. ده شوية كحة كده .. الظاهر نمت من غير غطا إمبراح .. ياللا
يا سيد .. أنت ح تعمل لي محضر .

سيد يخرج مسرعاً .

وتدخل ماما نونا وفي يدها لفة .. يراها سيد في الدخول .

سييد : معقول .. خطوة عزيزة يا ست الكل .. تشربى إيه ؟!

نوننا : مش عاوزة حاجة .. متشكرة يا سيد .

حماده : ما تروح بأة يا عم سيد شوف وراك إيه ؟.

تنظر نحوه لفترة من الصمت وهي تتأمله

نوننا : مالك يا حماده .. متعصب كده ليه ؟!

حماده : كل حاجة ملخبطة .. مفيش حاجة ماشية صح .. أنا أنتى إيه اللي
جابتك .!

نوننا : لقيتك مجيتش ع الغدا قلت آجى أتغدا معاك .. جايالك بأة ..

شوية فتة كوارع تاكل صوابك وراهم

حماده : كوارع !.

ينظر نحوها بشك .

نوننا تبدأ في فتح اللفة .

نوننا : آه .. عليها جوزة الطيب ومتحبشة بالبهارات .. حاجة تفتح

النفس وتستاehl بُقك .. أصل أنا نفسي رايحها مش عارفة ليه

حماده وقد بدأ يفهم .

حماده : وأشمعنى النهاردة يا ماما اللي نفسك راحت للكوارع ..

نوننا : هي النفس دى بيتقال لها إشمعنى .

بشك وترقب وخوف .

حماده : هي ايناس إتكلمت معاكى فى حاجة ؟!.

نونسا : وتتكلم معايا فى إيه ؟!.

حماده : لا .. مفيش .. بس أنا ما بحبش الكوارع وأنتى عارفة .

نونسا : أتغصب على نفسك وكُلها .. دى سرها باتع .. ده أبوك الله يرحمه

كان ياكلها ٥ مرات فى الأسبوع .. ماكانش يشبع منها أبداً ..

حاكم البهاريز اللى بتنزل فى الطبق لما تدق الماسورة دى شفا .

. تضحك .

حماده : شفا .. هوه أنا عيان يا ماما .

نونسا : بعد الشر عنك .. عيان إيه ؟. إنت زى الفل .. بس جتة البنى آدم

دى يا حماده عاملة زى العربية .. لازم تديلها بنزين عشان تمشى

وأنت أكلك مش عاجبنى اليومين دول .

. تليفون المحل یرن .

حماده : أيوه .. فيه إيه يا عم سيد .

. هامساً .

حماده : أنت مالك الدوا بتاع كحة ولا مش بتاع كحة .. أنا قلت لك تفتح

الورقة .. لأ مش غلط .. اللى يدهولك الصيدلى تجيبه .. ميه مش

خمسین .. ولو فيه ١٥٠ هات .

كلوز على ماسورة تدق فى الطبق وتنزل منها البهاريز .. زووم أوت لنجد يد نونا هي

التي تفعل ذلك وتؤكل حماده بيديها .

نونسا : كُلى يا حبيبي .. بالهنا والشففا مطرح ما يسرى يمرى .!

حماده : ماما .. أنا فيه حاجة عاوز أقولهالك بس ماتزعليش منى .

نونسا : أنا عمري ما أزعل منك يا حماده .

حماده : أنا حاسس إنى أتسرعت فى الجوازة دى .

نونسا : اللى حصل حصل يا حماده .. والكلام ده ما ينفعش يتقال دلوقت

.. تعرف أنا باركتلك ليه ؟. وشايلة مراتك فى عينيا ليه ؟!.

عشان كان لازم تتجوز يا حماده .. أنا خلاص .. بأقول يا حُسن

الختام .. مش ح أعيش لك .. وأنت مش ح تعرف تعيش
لوحذك يا حبيبي .. وعيشة وفوزية وعيالك كل واحد في وادي
.. ح أسيبك للدنيا دي لوحذك يا ضنايا .

حماده : أنا مش عاوز أستمر في الجواز دي يا ماما .

نوننا : أصبر يا حبيبي .. إصبر .. محدش عالم بكرة فيه إيه ؟ . إيناس
بتحبك .. البت لسه حلوة وصغيرة وكان قدامها تتجوز مليون
جواز .. إنما ما دام أختارتك تبأة شاريك .. وأحنا عمرنا ما
نبيع اللي شارينا يا حماده .. كُـل الكوارع أنت بس وإن شاء الله
كله ح يباة تمام .

يدخل عم سيد ويعطيه علبة الفياجر دون أن نرى أسمها حتى لا يصبح إعلاناً .

سيد : الدوا يا حماده بيه .

نوننا : دوا إيه ده يا حماده .

حماده ينظر إلى سيد بغيظ شديد .

حماده : لا .. ده مش دوا .. ده مقوى للشعر .. أصل شعري أبتدا يقع من
قُـدام .

سيد : لا يا بيه ده .

منفعلاً .

حماده : وبعدين يا عم سيد .. أحنا ح نقضيها كلام .. ياللا خد ماما نوننا
ووصلها للبيت .

نوننا : أما تخلص أكلك يا حماده .

حماده : حآكل .. بس أنتي روحى بأة .

سيد : أنا معاكى يا ست الكُـل .

نوننا : لأ .. أنا معايا التاكسي تحت .

نوننا تخرج بعد أن ترمق العلبة (فياجرا) بنظرة

نوننا : ربنا يقويك يا بنى .

سيد : أتفضلي يا ست الكُمل الدكتور الصيدلى بيقولك ان القرص مفعوله
بيشتغل خلال ساعه.

في ضيق .

حماده : عارف .. عارف .. خلاص .

ويفضل حماده للمره الثانية .. وتصاب ماما نونا بالجزع على إبنها .
هيشم داخلاً .. ليجد حماده جالساً على السرير صامتاً شاردأً .. تدخل نونا خلفه .

هيشم : أزيك يا حماده .. أمال ماما فين؟! .

حماده : فى الأوضة الثانية .

هيشم : دى واحشانى قوى .. أسمع بأة يا حماده .. النهاردة أناح أنام مع

مامتى وأنت تنام مع مامتك .. مش كل يوم بأة .

حماده ينظر له ساخراً .. نونا تنظر نحوه وقلبها يرتجف من الدُعر على إبنها .

حماده : روح .. روح نام جنبها .!. من هنا ورايح تنام معاها علطول .!. .

هيشم يخرج مسرعاً إلى غرفة نونا حيث أمه هناك .

فى محاولة لإيجاد مبرر لما هو فيه .

نوننا : فيه إيه؟! مالك يا حماده .

حماده : الواد حسام جالى وقل أدبه زى كل مرة ، وعلى صوتيه عليا .

مندهشة .

نوننا : حسام .. وإيه اللي جابه؟ .

حماده : أنا عارف .!؟ .

نوننا : يعنى إيه؟! .

حماده وقد بدا عليه الإرهاق فعلاً والذبول .

حماده : أنا يظهر كبرت يا ماما .. أنا حاسس إنى تعبان قوى .

نوننا تجرى عليه بلهفة وتضع يدها تحت رأسه .

نوننا : ألف سلامة عليك يا ضنايا .. حاسس بإيه؟! .

حماده : حاسس إنى دايع .. مش قادر أصلب طولى .

نوننا : نروح للدكتور دلوقت يشوفك .

حماده : أنا لا عاوز أروح لدكاترة ولا عاوز أشوف حد .
نوننا : يعنى إيه ؟! أسيبك كده لغاية ما تضيع منى .. لا يمكن .. أنا ح
أكلم الدكتور ييجى يشوفك .
حماده : يا ماما أرجوكى سيينى .. أنا ح أنزل أشم شوية هوا .. مخنوق قوى
نوننا تخرج له ملابسه من الدولاب .
نوننا : وأنا مش ح أسيبك .. ح آجى معاك وح نعدى على الدكتور
يشوفك برضة .. ياللا .. إلبس هدومك .
إيناس تدخل .. وخلفها هيثم .
إيناس : فيه حاجة يا ماما .. حماده ماله ..!
نوننا : لا يا حبيبتي مفيهوش حاجة .. زى الفل .. أحنا بس رايجين
مشوار كده .. عائلى .. حاكم كمال ابن عمه بعافية شوية ولازم
نزوره .. ودول أكثر من الأخوات .
إيناس : آجى معاكوا يا ماما .
نوننا : لأ يا حبيبتي .. خليكى أنتى مع هيثم .. ياللا يا حماده
فى عيادة الطبيب ..
حماده جالساً فى ضيق وبجواره ماما نوننا .. ماما نوننا تعطى بقشيشاً للتمرجى .
التمرجى : ربنا يخليكى يا ست الكل .. حالاً أهوه .. الدكتور معاه واحد ح
يطلع .. وخلاص .. ح تدخل أنتى أهوه ..!
المريض خارجاً ..
التمرجى : أتفضللى يا حاجة ..!
تدخل ماما نوننا وخلفها حماده إلى حجرة الطبيب .
الدكتور إسماعيل طبيب باطنى .. رجل فى الخمسينات بشوش للغاية .. بمجرد أن
يرى ماما نوننا حتى يتهلل لرؤيتها .
إسماعيل : أهلاً .. أهلاً .. إزيك يا ماما نوننا .. أزيك يا أستاذ حماده ..
كويس إنك جيت معاها عشان عاوز أشتكيلك منها .
نوننا : ليه بس يا دكتور ..!

إسماعيل : أنا مش قايل لك تعمل لى تحاليل وآشعة .. فين هيه
نونسا : ولازمتها إيه التحاليل .. أنا الحمد لله كويسة .
إسماعيل : لا .. يا أستاذ حماده أنت لازم تاخذ بالك منها أكثر من كده ..
مامتك ما بتسمعش الكلام .

نونسا : شوف يا حماده .. الدكتور إسماعيل عامل زى أبوه الله يرحمه
الدكتور حسنى .. أما كنت حامل فيك كان يقعد يزعق لى
ويشخط فيا قدام أبوك .

إسماعيل : خير .. لخبطتى فى إيه ؟. وجايبالى دلوقت .
نونسا : أنا مش جاية عشانى المرة دى .. أنا جاية عشان حماده .
إسماعيل : ماله الأستاذ حماده .. خير !.
حماده : لا .. بس حاسس إنى مرهق شوية .
إسماعيل : طيب أتفضل هنا فى الكشف .. عملت تحاليل قريب
حماده : لا .. أنا عمري ما عملت أى تحاليل .
إسماعيل : آه .. طبعا طالع لماما نونا .. يا جماعة ماينفعش كده .. ده اللي عنده
عربية كل ست شهور بيوديها الصيانة .. جسم الإنسان ده أغلى
حاجة عنده .

يكشف عليه .

إسماعيل : أنت بتدخن يا أستاذ حماده .
حماده : ساعات .. مش كتير يعنى .. ساعات أروح أشيش فى أى مكان
كده مع أصحابى .
إسماعيل : صدرك مش عاجبنى .. ورينى إيدك .. شد إيدى كده .. ورينى
صباغك كده أما نقيس السكر .

يقيس له السكر بالجهاز .

إسماعيل : إيه ده ؟. ٥٨٠ .. أنت واكل إيه ؟!
حماده : واكل كوارع .. فتة كوارع .

إسماعيل : أنت كده ممكن تخش فى غيبوبة سكر .. إزاي ساكت على نفسك
كده .. أنت بتاكل حلويات كثير .

حماده : يعنى مرة واحدة فى اليوم .
إسماعيل : يعنى إيه ؟ . حته بسبوسة .. حته كنافة .
حماده : آه .. تقريبا .

نوننا : لأ .. قول للدكتور الحقيقة .. ما تكديش عليه .. ده كل يوم ياكل
طبق حلويات قد كده .

تشير الى أن الطبق كبير .

إسماعيل : أنت بتنتحر كده يا أستاذ حماده .. حد يعمل كده فى السن ده .!
يقيس الضغط .

إسماعيل : لا لا .. الضغط كمان على قوى .. لا .. أنت كده بتلخبط جامد .
نوننا : شفت .. شفت يا حماده .. عشان لما أقولك لازم نروح للدكتور
تبأه تسمع كلامى .

إسماعيل : أنت لازم تروح المستشفى دلوقت حالا .
حماده : مستشفى .!

إسماعيل : أيوه .. ح تظبط هناك السكر والضغط .. وإلا النتائج حتبأه مش
كويسة .

حماده : مستشفى .. هوه أنا تعبان قوى كده .!

نوننا : بس ده لسه عريس جديد يا دكتور .. دى دخلته كانت إمبارح ..
معقولة يسيب عروسته تانى يوم ويخس المستشفى .. والنبي دى
عين وصابته .. هوه أنقر عليه

إسماعيل : عريس جديد ؟ .!

نوننا : ما يتعالج فى بيته واللى ح يعملوهوله فى المستشفى نعملهوله فى
البيت .

إسماعيل : طيب يا ماما نونا .. ممكن بس أتكلم مع الأستاذ حماده لوحدنا .

نوننا : حاضر ياخويا اللي تشوفه .. حماده .. تقول كل حاجة للدكتور
وما تخبش عليه حاجة .

نوننا تخرج .. إسماعيل وحماده وحدهما

إسماعيل : أستاذ حماده .. أنا كده عرفت حضرتك جيت لى النهاردة ليه ..
بس عاوز أقولك إن الحالة النفسية بتأثر كثير وبتزود المشكلة .
حماده : طيب والحل إيه يا دكتور؟! .

إسماعيل : نظام قاسى لازم تمشى عليه طول حياتك .. وأنا برضة أفضل إنك
تخش المستشفى .. ورأى إنك لازم تصارح المدام بحالتك
الصحية .. وممكن تبأه مرافقة لىك فى المستشفى .. أنا عارف إنها
مسألة سخيفة فى أول الجواز كده .. بس أحنأ لى يهمنأ نخرج
من الأزمة دى .!

فى المستشفى ..

حماده ونوننا داخل السويت .. يخلع ملابسه .. يرتدى ملابس المستشفى وهو فى قمة
الجدع .. يضعون له المحاليل .. وقياس القلب .. ويأخذون عينات الدم وقد بدا عليه
الجدع الشديد والرعب كما بدا على وجه ماما نوننا وإيناس معهما فى المشهد .

إسماعيل : يا عنايات .

عنايات : نعم يا دكتور .

إسماعيل : العينات كلها تنزل المعمل والنتيجة تجينى بعد ساعة .

عنايات : حاضر يا دكتور .

إسماعيل : وعاوز رسم قلب بالمجهود .

إيناس تسأل الطبيب (إسماعيل) .

إيناس : طمنى يا دكتور .. حماده عنده حاجة .

إسماعيل : إن شاء الله خير .. مفيش حاجة .. ممكن تكون دى أعراض
إرتفاع السكر .. والضغط .. والسن برضة .

نوننا : السن .. هو حماده عنده كام سنة يا دكتور .. دول هما ستين سنة ..
لسه مكملهم إمبراح .

مبتسماً .

إسماعيل : ستين سنة مش كبير .. أنما لما يبأة محافظ على نفسه يا ماما نونا .
إيناس : أنا ح أقعد معاه مرافقة يا دكتور .
حماده : لأ .. خليكى أنتى مع هيثم يا إيناس ماما نونا ح تقعد معايا .
حتى الممرضة التى تلتقى بها لأول مرة تعقد معها صداقة غريبة .. لا أحد يستطيع أن
يقاوم أمومة ماما نونا .
حماده نائماً على سرير فى سويت .. ونونا فى الأنتريه الملحق بالغرفة .. تدخل ممرضة
جميلة (عنايات) .

عنايات : صباح الخير يا ماما .
نونا : أزيك يا عنايات .. تعالى يا حبيبتى .
عنايات : أزي الأستاذ حماده النهاردة .
نونا : أحسن يا حبيبتى .
عنايات تقرب من حماده وتوقظه .
عنايات : أستاذ حماده .. أستاذ حماده .
يستيقظ حماده .

حماده : صباح الخير .
عنايات : نشوف السكر عامل إيه ؟!
تقيس السكر .

عنايات : الله .. الله .. هايل .. والضغط كمان أحسن بكثير .. ناخذ الحقنة
بأة .

حماده : طيب بس بشويثر والنبي .. أمبارح وجعتنى قوى .
تعطيه الحقنة .. نونا تدير وجهها ألماً وكأنها هى التى تأخذ الحقنة .
ضاحكة .

عنايات : خلاص يا ست الحاجة .. أنتى لسه موجهة .. ما أخذها
خلاص .. الفطار ده بأة تخلصه كله يا أستاذ حماده .
تقدم له الإفطار .. تدخل إيناس .

إيناس : أزيه النهاردة يا ماما .!
نوننا : الحمد لله .. بأة زى الحديد .
تدخل الحجره .

إيناس : أزيك يا حماده .. عامل إيه دلوقت ؟!
حماده : لأ .. أنا خلاص قربت أخرج .. بأيت كويس قوى !
إيناس : أنا مش عاوزاك تخرج إلا وأنت صحتك مية مية .. وماتشيلش
هم المحل .. أنا قاعداهم هناك زى ما تكون أنت موجود
بالظبط .

نوننا : ربنا يخليكوا لبعض يا أنوسة .. ما أحنا خلاص بأينا أهل
إيناس : طيب مش عاوز حاجة يا حماده .. عشان لازم أروح أجيب هيثم
من المدرسة .
حماده : لأ شكراً .

إيناس تهمس له بمداعبة أنثوية جميلة .. إيناس تقبله فى رأسه .
إيناس : وحشتنى يا راجل .!
حماده : إن شاء الله .. إن شاء الله .
إيناس : وليه كده بس .. قلبك أبيض يا راجل .. باى باى يا ماما .!
إيناس تخرج مسرعة .

حماده : أنا زهقت يا ماما .. أنا مش متعود على الحبسة دى .
نوننا : خلاص هانت يا حماده .. الدكتور قال كام يوم وح تخرج .. ما
جاتش على دول .
تدخل عيشة وهى تحمل أكياس البرتقال .
عيشه : ألف سلامة يا سى حماده .. ألف سلامة .. أزيه دلوقت يا ست
نوننا .. مش الصحة عال والحمد لله .
نوننا : والنبي فيكى الخير يا عيشة .
تهمس لها .

نوننا : وإبراهيم ما جاش معاكى ليه ؟! . مش ييجى يشوف أبوه

عيشه : أصله يا حبة قلبى سهران طول الليل بيذاكر وكان ناوى ييجى
معايا .. لقيته نام على نفسه والكتب على صدره .. صعب عليا
مارضيتش أصحيه .

حماده : تعالى يا عيشة .

عيشة تجلس بجوار حماده .

عيشه : أوامر يا سى حماده .

هامساً .

حماده : إلا .. بقولك إيه يا عيشة .. أنا عاوز أسألك سؤال كده

عيشه : تحت أمرك يا سى حماده .. أتفضل .!

حماده : هوه أنتى .. ما أتجوزتيش ليه بعد ما إتطلقنا .!

فى خجل .

عيشه : يا لهوى .. وده سؤال برضة يا سى حماده .. هوه فيه راجل يملا عين
الست غير جوزها الأولانى وأبو عياها .. جاى النهاردة تسألنى
السؤال ده برضة يا سى حماده .

حماده سعيداً بإجابة عيشة .

الرسبشن فى السويت

عنايات ونونا .

عنايات : معقولة .. بأة الست دى برضة كانت متجوزة الأستاذ حماده يا
ماما نونا .

نونا : أيوه .. بس ما قعدش معاها ثلاث أربع شهور وسابها .. بس ولية
أصيلة وغلبانة ومنكسرة .. وعندها ربنا فوق وحماده تحت .

تدخل داليا بلبس المضيفات .

داليا : إيه يا تيتا .. ماله بابا .. أنا لسه عارفة من ماما دلوقت .. أنا كنت
فى هونج كونج ولسه جاية .

نونا : الحمد لله يا دوده .. أحنا كُنا فين .. داليا جاية تسأل عليك يا حماده

داليا تدخل مسرعة وتقبله وتقبل يده ورأسه

داليا : ألف سلامة عليك يا بابا .. خضيتنى عليك .. عامل إيه دلوقت ؟

حماده : كويس .. كويس قوى .

داليا : أزيك يا عيشة .!

عيشة : ربنا يخليهولكوايا ست داليا .. ولا يجرمكوش منه أبداً

هامسة .

داليا : ما قولنا نهديا عم الحاج .. الجواز على كبر مش حلويا حماده ..

عموماً أهى الفيتامينات اللى جيبتهالك من هونج كونج ح تنفع

الرسبشن فى السويت

عنايات : وداليا دى يا ماما نونا .. بنت عيشة ولا بنت مدام إيناس .

نونا : لأ .. دى بنت فوزية .

عنايات : هوه لسه فيه فوزية كمان .

نونا : دى أول بخته .

عنايات : لا .. ده كويس إن أحنا لحقنا الأستاذ حماده فى المستشفى .. ده مش

راحم نفسه .. لا معلىش بأة الأستاذ حماده ده طلع مية من تحت

تبين .

تضحك .

نونا : والنبي أبداً .. ده غلبان .. ده لا يعرف يهش ولا ينش .. هوه بس

عشان حنين وقلبه أبيض .. اللى يشوفه يحبه علطول .

عنايات : طيب على مهلك عليا بأة أحسن أحبه أنا كمان وتبأة مصيبة حاكم .

أنا متطلقة ولا ورايا ولا قدامى .

نونا تضربها على يدها .

نونا : يا قليلة الحيا .!

وتبدأ إيناس الزوجة الجديدة فى مطالبة حماده بأن يكتب لها المحل الذى تزوجته من

أجله .. ولكن كان لما نونا رأى آخر .

نونا تضع آخر طبق أمام حماده .

بخبث .

نوننا : إنتوا إتحانقتوا تانى ولا إيه ؟ .

حماده : لأ .. مش خناقة خناقة يعنى .

نوننا : أصل مراتك نازلة وبوزها قدامها شبرين .

حماده : أصلها زعلانة منى .. وبصراحة هيا معاها حق .

نوننا : وزعلانة منك ليه ؟ .

حماده : برضه يا ماما .. دى واحدة إتجوزت خطف كده ولا جالها شبكة

ولا إندفع لها مهر ولا حتى هدية الجواز .

نوننا : وهية لسه بنت بنوت يا حماده عشان تحبيلها الشبكة والمهر !! هية

مش كانت متجوزة مرتين قبلك يا حماده ؟ ! . مش كفاية إنت

مسترها ومدربيلها الواد اللي مش إبنك ولا من صلبك .. دى

المفروض تبوس إيديها وش وضهر .. وهية كانت ح تلاقى

ضفرك ! .

حماده : يا ماما إحنا بنحل ولا بنعقد .. إنتى عارفة يا ماما .. كل ست تحب

تتباهى باللى جوزها بيحببها قدام الناس وأنا ما جيبتلهاش

حاجة بصراحة خالص .

نوننا : وبسلامتها عاوزة إيه يا حماده ؟ .

حماده : هى لو عليها مش عاوزة حاجة .. دى كل اللي كانت طالباه أكتب

لها المحل صورى كده قدام الناس يعنى علشان أثبتلها غلاوتها

عندى .

نوننا : تكتب لها إيه ؟ ! ! . إنت إتجننت يا حماده ؟ ! .

حماده : وهى يعنى حاتاخذ المحل غصب عنى .. ما هى مراتى وعلى ذمتى

ح تروح فين يعنى محل محلها ومحلها محلى .. وأنا لو عاوزها

تكتب لى المحل المحل بتاعها النهاردة .. تكتبهولى .

نوننا : إسمع يا حماده .. إذا كان على هدية الجواز .. نجيب لها هدية

الجواز .. إنما تكتب لها محل ولا تمضيلها على ورقة .. لأ .

حماده : باقولك إيه يا نونا .. مش أنا حببيك .. وعاوزانى أبقى مبسوط .

نونسا : وأنا عندي أغلى منك يا حماده ؟ .
حماده : ما تجيبى الخاتم ده أديهولها .. وأهو يبأه إسمى عملت اللي عليا وما
بيأهاش حجة .
نونسا : الخاتم ده !! إنت عارف ده بكام يا حماده .. ده ألماظ حر .. ده
أبوك جايبهولى بتلاتلاف جنيه شوف سنة كام ! .
حماده : عشان خاطرى يا نونا .. منظرى بأه وحش قدام مراتى .. يرضيكي
منظرى يبأه وحش كده .. أبوس إيدك .
يقبل يدها ورأسها .. وهى تتمنع فى دلال ثم تخلع الخاتم وتعطيه له .
نونسا : خد يا حماده .. لبسه لمراتك .. ربنا يسعدكوا يا بنى .
حماده يقبلها قبله طويلة على رأسها .. ويجرى مهرولاً خارج الكادر .
حتى فى مشاكل أولاده تتدخل .. بنعومه وحنان .
نونسا وعيشة .

عيشة : لازم سى حماده يشوف له حل مع إبراهيم يا ست نونا .. العيال اللي
ملمومين عليه دول ح يضيعوه .. ح يودوه فى داهية ! .
نونسا : إخص عليك يا إبراهيم ..
عيشة : مش عارفة أعمل إيه يا ست نونا .
نونسا : تجيبيه وتيجوا تقعدوا هنا .. أهوه يبأه قدام عينين أبوه لاح يعرف
يروح كده ولا كده .
عيشة : وأنا ح أقعد هنا إزاي يا ست نونا .. سى حماده دلوقت متجاوز
وقعادى فى البيت يعنى .
نونسا : خلاص .. إبراهيم يبجى يقعد معانا .
عيشة : إنشالله حتى الكام شهر اللي فاضلينه لغاية الإمتحانات
نونسا : وماله .. بيته وبيت أبوه .. ده أنا ريقى نشف أقولله يبجى يقعد
معانا .
عيشة : ما هو مش ح يسمع من حد يا ست نونا غير من سى حماده نفسه
اللى لازم يقول له .. أنا عارفة إبراهيم نفسه عزيزة قوى .

يدخل حماده متهللاً .

حماده : ماما .. ماما نونا .. أنا ميت من الجوع .. العدا جاهز .. إيه ده ..

عيشة هنا .. إزيك يا عيشة .

عيشة : تسلم من كل شر يا سى حماده .

حماده : وإزى الواد إبراهيم .

عيشة : بيبوس إيدك يا سى حماده .

نونا : حماده .. تعالى عاوزاك .!

تختلى به جانباً .

حماده : فيه إيه يا ماما نونا .

نونا : فيه مصيبة .. فيه بلوة سودة لازم نلحقها قبل ما تطبل على دماغنا

حماده : بلوة إيه ؟!

نونا : أنت تروح تجيب إبراهيم دلوقت .. بشنطته بهدومه بكراريسه .

حماده : ليه ؟!

نونا : ح يقعد معنا هنا .

حماده : هما أتطردوا من الشقة .

نونا : أتطردوا إيه ؟. الواد إبراهيم إبنك ماشى فى سكة بطالة .

حماده : بيعرف بنات .!

نونا : بنات إيه ؟. ياريت .. الواد عامل لى فيها سياسى .. وعاوز قال

يعمل إنقلاب فى الحكم فى الجامعة .

حماده : إبراهيم ثورى .

نونا : تروح تجيبه أحسن ما يجرسنا .. وح يقولوا أبوه مين ويجيبوك أنت

يحققوا معاك تانى .

وتبلغ ذروة الصداقة والحميمية بين ماما نونا وحماده حيث يجلسان سوياً على السرير ..

وكأنهما حبيين .

حماده جالسا بجوار ماما نونا وقد تغطيا باللحاف ويتفرجان على التلفزيون على فيلم
(الجيل الجديد) لحسين صدقى وفي أيديهما أطباق الترمس والسودانى واللب ويقزقان
فى مُتعة .

حماده : هو أنتى بتحبى حسين صدقى قوى كده ليه ؟ .
نونسا : يا سلااام .. هوه فيه زيه .. راجل محترم وعارف ربنا وطول
بعرض .. ده أبوك الله يرحمه ماكانش ينزل له فيلم فى السينما إلا
لما ياخذنى عشان أتفرج عليه .
حماده : ياااه من يوم ما أتجوزت وماقعدناش القعدة دى .

يقبلها .

تضحك .

نونسا : يا واد إنت بتزهق علطول كده ليه ؟ . دى مراتك حته سكرة .
حماده : أنا قوت لك مش داليا جات لى إمبراح .
نونسا : وعجبتها ألمانيا ؟ .
حماده : عجبتها ! . دى كرهت المانيا كره العمى .
نونسا : ليه كفالله الشر .
حماده : نوال بنت عمى وكسفتها ومارضيتش تقابلها .
نونسا : نوال تعمل كده ! .
حماده : آه ! .

نونسا : يا خسارة .. أخص عليكى يا نوال .
حماده : أنا خلاص .. حلفت لأنا مقاطعها ولا ح أكلمها طول عمرى ..
خصام خصام يعنى .

نونسا : بأة كده يا نوال .. ده أنا اللي مجوزاها بنفسى .. وأنا اللي ملبساها
طرحتها .. قوام نسيت .. ده الكُل كان واقف ضدها فى جوازها
وما وقفش جنبها غيرى .. البعيد عن العين بعيد عن القلب يا
حماده .. مايجيش من القراب غير النوايب .. ده أحنأ أهل ..

معقولة ده يحصل بينا على آخر الزمن .. دى القيامة قربت يا
حماده .

حماده يشخر وقد نام على نفسه .

نوننا : تعرف يا حماده .. أنا بادعى ليل ونهار إن إيناس مراتك دى تطلع
كويسة وطيبة وتقف جنبك وتحبك .. خلاص ما بأش حوالينا
حد من القرايب ولا من الحبايب .. يمكن الغرب يكونوا أحسن
علينا .

نوننا تعدله .. فينام .. تغطيه بحنان .. ثم تغلق التلفزيون .. وتجلس مفكرة شاردة
صامته وهى تنظر إلى أبنها بحيرة وقلق على مستقبله .

نوننا : يا ترى الزمن مخبيلك إيه أنت كمان؟! .

ماما نوننا زعيمة البهجة التى تلم شمل الأسرة كلها حتى الغرباء تحتويهم
بأمومتها .

العشاء على المائدة .. إيناس وحماده وهيثم ونوننا ومعهم جى جى .

جى جى : لا .. لا يا طنط .. أنا عمري ما دوقت سمك بالشكل ده

ضاحكة .

نوننا : ده صيادية بشورية بنى .. أكلة سويسى .

جى جى : تسلم إيدك يا طنط .

نوننا : إنتى ح تقعدى تقوليلى يا طنط كده طول الليل .. ما تقوها يا
حماده! .

حماده : دى ماما نوننا .. طنط دى من الكلمات اللى بنعتبرها شتيمة عندنا فى

البيت .

هيثم نائماً .

إيناس : الله .. ده هيثم نام .

نوننا : سيبه يا إيناس .. أنا ح أطلعه ينام فى سريره .. خليكى إنتى .

إيناس : بس يا ماما .

نوننا : والنبي ما إنتى قايمة .

نوننا تأخذ هيشم وتحمله إلى فوق .

جى جى : ربنا يخليها لكوا .. والله ست عظيمة .. أنا خلاص بأيت بأموت فيها .. أغسل إيدي فين .

حماده : الحمام ع الشمال أهوه .

جى جى : أنا في بيتي بأه .. لو سمحتوا .. والله من كتر ما حسيت إنى وسط أهلى .. بافكر أبات عندكوا النهاردة .

إيناس : ده إنتى تنورينا يا جيجى .

حماده يهمس لإيناس .

حماده : تنورنا فين يا ولية إنتى .. ده إحنا ما صدقنا إن الأستاذ هيشم راح في سابع نومة .

ضحكة .

إيناس : يعنى أقول لها إمشى يا راجل إنت ؟!

حماده : أنا ح أمشيها لك بطريقي .

إيناس : ح تعمل إيه ؟

حماده : سيبيني بأه .

تأتى جيهان وتجلس معها .

ونونا نازلة من فوق .

نوننا : نام .

جى جى : سفرة دائمة يا ماما نونا .. أنا ما أكلتش كده في حياتى

نوننا : ياختى إنتى أكلتى حاجة .. يا حماده .. فين الكوتشينة

حماده : كوتشينة إيه يا ماما ؟!! الكوتشينة حرام .

نوننا : حرام إيه ياخويا .. هوه أحنا بنلعب قمار .. ده تسالى

حماده : بيأة مكروه .. أنا سمعت شيخ يقول كده في الفضائيات .

نوننا : الدين يُسر لا عُسر .. ياللا .. هات الكوتشينة .. أصلى أنا مش

جاي لى نوم .

تحضر الكوتشينة .

جى جى تفرق الورق .. وحماده فى قمة الغيظ وإيناس تبتسم .

نوننا : ياللا .. فرقى إنتى يا جى جى .

نقش كل الأوراق التى على الأرض .

نوننا : ولد .. وأدى كومى !.

تضحك .

نوننا : ماحدث يقدر عليا الليلادى .. الفورة من ١٠١ .

حماده ينظر إلى السقف فى غيظ شديد

صارخاً .

حماده : كام !!؟ .

نوننا : من ١٠١ .. عاوز تخليها ٢٠١ أنا ما عنديش مانع .. أهوه .. بنت

.. بصرة .. معاك إيه يا حماده ؟ .

فى إحباط .. ويلقى بالورق .

حماده : الواد إتحرق .

حماده يتظاهر بالنوم ويشخر وإيناس توكره بذراعها .. حماده يغمز لها .

ديزلف :

أطباق اللب والسودانى والحمص والترمس والبطاطا وهم يلعبون بحماس .. وحماده

ينام على نفسه ويشخر .

نوننا : إيه يا حماده .. إنت بتنام .. ما تطلع تريخ جتتك يا حبيبي .. روح

نام جنب هيشم .

حماده : هه .. لا .. أنا صاحى .. أنا صاحى !.

جى جى : يااه .. ده أنا آخرتكوا قوى .. أنا لازم أمشى .

نوننا : ياختى أقعدى .. أنتى وراكى إيه !!؟ .

صارخاً .

حماده : لأ .. قصدى .. عشان .. عشان تروح قبل ما الوقت يتأخر يا ماما

جى جى تقبلها .. ونونا تقبلها بحنان زائد وتربت على كتفها .. وحماده فى قمة الغيظ

من طول وقت التقبيل .

حماده : ياللايا ماما .. هي مش مهاجرة إستراليا .
نوننا : خلاص بأة يا جي جي .. أنتي بأيتي واحدة مننا .. كل ما تلاقى
نفسك فاضية .. تعدى علينا .
جى جى : ربنا يخليكى يا طنط .. يا ماما .. تصبحوا على خير !.
جى جى تمشى .. وحماده يجرى ويغلق الباب خلفها ويلتفت إلى نونا .
نوننا : طيب تصبى على خير يا أنوسة .. مش عاوزين حاجة
حماده : لأ .
نوننا تطلع إلى الدور العلوى .. حماده يلتفت إلى إيناس .
حماده : أنا مش مصدق .. أنا وأنتي لوحدنا .. وحشتيني يا أنوسة ..
وحشتيني قوى .
يجرى نحوها محاولاً تقيلها فجأة طرق على الباب .
إيناس : دى أكيد جى جى .. أكيد نسيت حاجة .
حماده : نسيت إيه بس ؟!
إيناس : أفتح يا حماده !.
حماده يفتح .. ليجد أمامه فوزية .
حماده : فوزية !.
فوزيه : مساء الخير يا حماده !.
فوزية تدخل لتجد إيناس واقفة تبادل معها نظرة إحتقار .
فوزيه : أنا جاية عشان أتكلم معاك فى موضوع مهم .. ولازم نتكلم
لوحدنا !.
ماما نونا نازلة مسرعة .
نوننا : فوزية .. معقولة .. ده إيه المفاجأة الحلوة دى .. والنبي لسه كنتى
على بالى يا فوفه .. حلمانة بيكى إمبراح .
حماده يسقط فى الكرسي من فرط الإعياء .
إيناس تأخذ بعضها وتطلع إلى الدور العلوى وفوزية ترمقها بنظرة امرأة إلى امرأة
أخرى .

فوزيه : كويس إنك صاحية يا طنط .. عشان عاوزاكي إنتي كمان .!

نوننا : أوامري يا فوفة .!

فوزيه : شوف يا حماده .. أحنا سايبين بعض من أكثر من ثلاثين سنة ..

وعمرى فى السنين دى كلها ما لجأت لك فى أى حاجة .. لأنى

عارفة أنك عمرك ما ح تقدر تعمل أى حاجة .

حماده : وأنتى جاية فى إنصاص الليالى عشان تقولى الكلام ده شايفة يا

ماما .. أهيه جاية تغلط فىا .. أنا ما غلطتش فيها .. خليكى

شاهدة .

نوننا : لا فوفه غلظت ولا أنتى يا حماده .. الله ما تصلوا ع النبى كده أمان

فيه إيه يا فوزية .. إيه اللى حصل ؟

فوزيه : حسام إبنى .. ح يتجوز .!

نوننا : ده إنتى عليكى حاجات يا فوزية .. ألف بركة .. ده يوم المنى .!

فوزيه : ح يتجوز بنت مساعد وزير الداخلية .

نوننا : وماله ده أحنا نتشرف .. حسام طول عمره إبن حلال

فوزيه : سيادة اللواء أبو العروسة .. عاوز يشوف أبو حسام ويقعد معاه ..

ويتكلم معاه .

حماده : عاوز يشوفنى أنا .. ليه .. وأنا مالى .!

فوزيه : سامعة يا طنط .

نوننا : هوه إيه اللى ليه يا حماده .. إبنك عاوز يتشرف بيك .!

حماده : إبنى .. مش ده اللى كل ما يشوفنى يهب فىا .. وينزل فىا

تهزىء يا ماما .. دلوقت عاوزنى أروح معاه وهو بيتجوز .!

نوننا : وماله يا حماده .. وأنت فى ديك الساعة أما تروح تقابل سيادة

اللواء .. وتطلب بنته لإبنك

فوزية : المهم يا طنط .. أنه يكون واجهة مشرفة لإبنه .. ومايكسفوش

حماده : شفتى بأة .. طيب مش رايح .. خليه يروح يتجوز لوحده يا

فوزية .

نوناً : وبعدين يا حماده .. أنت بتتعصب علطول كده ليه ..
وكلمتك برضة يا فوفه ثقيلة شوية .. ده حماده يشرف أى حد
وأنتى عارفة .. قولى لحسام أن أبوك ح ييجى وح يشرفك ..
وجدتك كمان ح تيجى .. لازم حسام يخش على نسايبه بعزوة
حماده : ماشى يا فوزية .. أنا ح أروح بس تفهميه بأه أنه يحترمى قدام
الناس .. ويكلمنى كويس .. مفهوم والا لأ .!

وحينها تمر فى عيشة زوجة حماده .. الأولى .. تذهب ماما نونا للسؤال عنها .. إنها تقوم
بدور حماده دائماً .. وبرغم طبيعتها وبساطتها إلا أن النزعة الأرستقراطية لا زالت
بداخلها .

عيشة تحاول النهوض .

عيشه : ست نونا .. تعبتى نفسك ليه بس .!

نوناً : بتعملى إيه يا عيشة .. أوعى تقومى .. خليكى زى ما أنتى ..
أنتى ياولية إنتى ما بتسمعيش الكلام ليه .. أنا عارفة إيه اللى
جابلك التعب ده .. عشان ما بترحميش نفسك .. مسح
وغسيل وكنيس طول الليل فى البرد والدنيا شتا .. مش كده .
عيشه : ح نعمل إيه بس يا ست نونا .. ما هو أحنا لو ماعملناش مين
اللى ح يعمل .. وأهو الحمد لله .. كتر خيرهم الجيران ما
سابوناش .

نوناً : حلوة البنت اللى بره دى .. دى أحجزها لإبراهيم

عيشة تضحك .

عيشة : يارب يجعلها من نصيبه .

نوناً : هى بنت مين دى ؟!

عيشة : دى بنت واحدة جارتنا هنا فى البيت .

نوناً : ناس طيبين .!

عيشة : آه والنبي .. ولاد حلال قوى يا ست نونا !.

نوناً : وأبوها بيشتغل إيه يا عيشة ؟.

عيشة : أبوها .. شغال صنايعى .. سباك .

نوننا : وإبراهيم عزو ياخذ بنت سباك برضة يا عيشة .. لا .. لا
يمكن .. ده من عيلة عزو باشا اللي بيدرسوه فى كتب التاريخ

عيشة تضحك .

عيشة : ربنا يخليكى لينا يا ست نونا .. ما أحنا عايشين بحسكوا .!

نوننا : والله العيال كبرت يا عيشة .. النهاردة رايحين عقبال إبراهيم
نخطب لحسام هو راخر .. ح يتجوز بنت مساعد وزير
الداخلية .. أبرها أول ما عرف أن حسام ابن حماده عزو طار
من الفرحة .. قال إنه أمنية حياته يشوف حماده ويسلم عليه ..
وأدينا رايحين .

عيشة : ربنا يتمم بخير يا ست نونا .. حسام بيه يستاهل كل خير .!

تدخل سلوى بالشاى .

سلوى : الشاى يا طنط .

نوننا : ما باشربوش .. حد قال لك أعمليلى شاى .

هامسة .

نوننا : إبراهيم جوازته عندى .!

سلوى تندهش .. وعيشة تضحك ونرنا أيضاً تضحك .

وحينها يقرر حسام أن يخطب ابنة مساعد وزير الداخلية .. تذهب نونا مع حماده ..
وتشجعه لأن يمارس دور الأب الذى تخلى عنه .

نوننا تربط لحماده الحمالات ثم تلبسه الجاكيت وتعطيه الكرافات .

حماده : لأ .. كرافات لأ .. أنا محبش الكرافات يا ماما .. بتخنقنى .

نوننا : يا حماده .. دول ناس لواءات .. ولازم أول مرة نروح لهم ..

نروح لهم رسمى .

حماده : بس يارب يتمر فى سى حسام افندى .. ويبطل قلة أدبه على

أبوه .. آدينى أهوه رايح أقف جنبه وأخطب له

نوننا : ربنا يخليك ليهم .. هما ليهم بركة غيرك يا حماده .

العائلتان جالستان في الصالون ومنير يحاول فتح الموضوع أمام مساعد وزير الداخلية .

منير : الحقيقة إحنا جاين النهاردة يا جماعة وعندنا عشم كبير إنكوا ما ترفضوش طلبنا .. أسمحولى إن أنا أتكلم بإعتبارى أكبركم سنأ مش مقاماً .

إيهاب : العفو يا منير بيه .. العفو .. وبعدين أحنا الأقدمية عندنا في الميرى برضة لها إعتبارها .

يضحكون .

منير : حسام حفيدى صحيح .. وابن الأستاذ حماده .. أنا بأعتبره أبنى أنا .. لا مؤاخذة يا أستاذ حماده .. ده لا يُقلل من دورك في حياة حسام كأب إطلاقاً .. إنها !.

كل هذا وحماده يلعب مع البنت إنجى وقد خرج تماماً من الموضوع ويتكلم معها .. مما يجعل كلام منير غير مسموع .. ويتداخل هنا الحوار تماماً .

حماده : لأ .. أصل الراس بتتحط الأول وبعدين الزمبلك يركب من تحت .. وبعدين تشدى الحبل تقوم المروحة شغالة .

منير : ما تخليك معانا يا أستاذ حماده .. واضح إن إنجى واخداك مننا !.

نوننا : أصله بيحب الأطفال قوى يا سيادة اللواء .

تهمس لحماده .

نوننا : خليك معانا يا حماده .. سيب اللعبة دى دلوقت .

حماده : بأشغلهاها يا ماما .

نوننا : إديهاها وهى تشغلها .

الهانم تومى برأسها .

منير : كُنا بنقول إيه يا هانم .

آه .. فمن محاسن الصدف .. إن بنتنا ميرفت .. رايحة جاية عليًا في الجاليرى من أكثر من سنة .. وتقريباً .. بأت زى بنتى بالظبط .. شوفوا الصدف لما ربنا بأة يريد .. فعلاً .. اللُقا نصيب .. ولا إيه يا سيادة اللواء .

- إيهاب : ده كلام مضبوط واللهم يا منير بيه .
- حماده صار مشغولاً تماماً مع إنجى التى أحضرت له مسدساً لعبة .. أخذ يحاول إصلاحه .. وفجأة يعمل فتحدث فرقة شديدة .. إنجى تصفق بسعادة .
- حماده : معلش .. معلش .. أصل إنجى المسدس كان خسران وأنا .!
- إيهاب : واضح إن المهنة برضة بتغلب على صاحبها يا حماده بيه .!
- حماده : أصل المسدسات دى بتخسر بسرعة .. صينى كلها .. أحنا هنا لور كزنا شوية نعمل حاجات أحسن من كده بكتير .. أنما أحنا بنستسهل .. عندك مثلاً عروسة طالعة جديدة .
- إنجى : دى عندى يا أونكل .
- حماده : آه .. أهو .. كل الأطفال أشتروها .. مع إن العروسة دى لو شوفتوا شكلها .. تربويأ بأه نموذج سئ جداً لأى بنت .. حاطة مكياج صارخ قوى ولايسة محزق .. هى عندك يا إنجى
- إنجى : آه .
- حماده : طيب هاتيها كده أما أوريها لهم .
- نوننا : مش وقته يا حماده .
- حماده : لأ .. بس يبصوا عليها بصة .!
- حسام ينفخ فى ضيق .. وينظر لأبيه متوعداً .
- حماده : طيب خلاص .. خلاص يا إنجى .. بعدين نبأة نشوفها .
- إنجى تخرج .
- المدام تومى برأسها .
- منير : كُنا بنقول إيه .. سعادتك معنا يا هانم .
- أحنا النهاردة جاين نطلب إيد الأنسة ميرفت لابننا حسام .!
- إيهاب : حسام أنا أستقبلته من أول ما أخرج من كلية الشرطة وأنا ما سبتوش خدم معايا فى أكثر من مكان .. والحقيقة كان مثال ونموذج للضابط الراجل اللى يُعتمد عليه .
- فوزية : دى شهادة كبيرة يا سيادة اللواء .

حسام : يا فندم .. سيادتك أنا أتعلمت من سيادتك كثير .. كلنا تلامذة
سعادتك يا باشا .

تدخل ميرفت وفي يدها إنجى التى تمسك بالعروسة (برانس) .

فوزية : أهى العروسة جات أهيه .

يقومون إلا حماده الذى يمسك بعروسة إنجى .

حماده : مبتزلة جداً .. لأ .. فعلاً نموذج سئ لأى عروسة .. مكياج

صارخ .. ولبس محزق .. آخر مسخرة .

الكل ينظرون نحوه ليجدونهم ممسكاً بالعروسة اللعبة .

توكزه بذراعها .

نوننا : عروسة حسام يا حماده .. ميرفت .!

حماده : آه .. أهلاً وسهلاً .

ميرفت : أذى حضرتك يا أونكل .

حماده : كويس .

نوننا : لا لا .. دى زى القمر يا سيادة اللواء .. ده أنت طلعت

عفريت يا حسام .. آمال ما بيانش عليك يعنى .. أصل حسام

طول عمره فى حاله .. لا عرف كده ولا كده .!

يضحكون .

السفرجى يدخل بالعصائر .. حماده يأخذ كوب ويشربه عن آخره .

تقرصه .

نوننا : أصله عنده السكر والدكتور مانعه من الحاجة الحلوة

إيهاب : أنها يا حماده بيه أحنا ما سمعناش صوتك من ساعة ما قعدت

.. إنجى أخذتكم مننا والا إيه ؟!

حماده : لا أبداً .. أصلها لطيفة قوى .

حماده يداعب إنجى فى شعرها .

منير : طيب أنا بأقول بأة خير البر عاجله .. مش نقرا الفاتحة بأة .

وما أن يهيمون بقراءة الفاتحة .. إنجى تشد حماده وتجذبه .

إنجى : ما تيجى بأة .. عشان أوريك اللعب بتاعتى .
حماده : أستنى يا إنجى بس .. ح نقرا الفاتحة وأجى معاكى .
يضحكون .. وفوزية وحسام فى قمة الغيظ ونونا تجلسه عنوة .
الجميع يقرأون الفاتحة .
الجميع : بسم الله الرحمن الرحيم .

ديزولف .

الكل يتناولون العشاء فى حجرة السفرة .. بينما حماده مع إنجى فى أحد الصالونات
وقطار لعبة .. ويثيران ضجة كبرى .
إيهاب : لا .. ده اللى يشوف حماده بيه مايقولش أنه أبوك أبداً يا حسام
.. اللى يشوفك بتشخط وتنظر فى العساكر لا يمكن يصدق إن
باباك حنين كده .!

مخرجاً .

حسام : آه .. أيوه يا فندم .!
نوننا : يموت فى الأطفال طول عمره .. ده حسام وهو قد إنجى ربنا
يجرسها شاف دلح من أبوه ما شافوش حد .!
ميرفت : طيب أونكل مش ح ييجى ياكل معانا .
إيهاب : يا حماده بيه .. أتفضل .. مش ح تاكل معانا
حماده جالساً مع إنجى على الأرض مندجاً تماماً .. يحاول القيام .. إنجى تمسك به .
إنجى : أستنى .. أنت رايح فىن ؟ . أما نخلص .!
حماده : طيب .. ماما نونا تعمل لنا سندوتشات أنا وإنجى .!
يضحكون جميعاً وحسام وفوزية فى قمة الضيق .
إنجى : عاوزة همبورجر .
حماده : وأنا كمان .

- وتبوظ الخطبة بسبب طفولة حماده المتأخرة وتصرفاته الطائشة الصبانية .
نونا وحماده فى السيارة .

حماده : آدى آخرتها .. شفتى يا ماما .. أنا ذنبى إيه .. هوه أنا اللى
روحت لإنجى .. مش هى اللى جات وشدتنى .. كنت أسيبها
.. ولا أضربها يعنى عشان ينبسط .!

نوننا : خلاص يا حماده حصل خير .. أدينا برضة عملنا بأصلنا وجينا
عملنا الواجب .

حماده : هوه أنا ما أشرفش يا ماما .

نوننا : ده أنت تشرف بلد بحالها .. ما تقولش كده وبعدين أنا مش
عاوزاك تشيل فى نفسك ولا تزعل .. أنت صاحب عيا
والدكتور قالك الزعل بيرفع السكر .

حماده : والله العظيم أنا كنت بألعب مع إنجى مجاملة ليه .. وبعدين
الناس ما كانواوش متضايقين .. هوه متضايق ليه .!

وتبرز مشكلة حماده مع الضرائب .. وماما نونا لا هم لها سوى إنقاذ ابنها .. إنها لا
تطبق أن تراه مهموماً .

حماده ونونا داخلان إلى البيت ليجد إيناس جالسة فى ضيق .

نوننا : كويس أهى إيناس ما نامتش .. عشان تتسلوا مع بعض شوية
وتفرش كده .. أنسى اللى حصل ده خالص .. مساء الخير يا
إيناس .

إيناس : إزيك يا ماما .

حماده : مالك يا إيناس .

إيناس تنفجر فى البكاء .

حماده : فيه إيه .. بتعيطى ليه ؟!

نوننا : مالك يا حبيبتى .. هيثم كويس .

إيناس : أيوه يا ماما .. هيثم كويس .. بس فيه مصيبة كبيرة قوى .

حماده : مصيبة إيه ؟!

إيناس : واحدة صاحبتى بتشتغل فى الضرائب .. قالت لى إن حماده عليه

مليون و ٢٠٠ ألف جنيه وح يحجزوا على المحل .. ويا الدفع

يا الحبس .

بإستخفاف .

حماده : يعنى إيه ؟ ح يسجنونى !!

صارخة .

نوننا : يا لهوى .

إيناس : أنا من ساعة ما عرفت وأنا مُنهاراة يا ماما .!

حماده يسقط على الكرسي لا يعرف ماذا يفعل .

نوننا : وح نعمل إيه .. أنا إبنى لا يمكن يتسجن أبداً .. ده أنا أبيع كل حاجة .. أبيع اللي ورايا واللى قدامى ولا أشوفه يوم متبهدل أبداً .

إيناس : المبلغ لازم يتدفع بأى طريقة .. وفى أسرع وقت ممكن .. قبل ما يخش فى تهرب ضريبى وساعتها مش ح نقدر نعمل حاجة .. أنا لو معايا .. والله ما كنت أتأخر .. كنت دفعتهمله .. هوه أنا إيه وحماده إيه .. أنا الظروف بأة .

نوننا : يادى المصايب اللي نازلة ترف على دماغنا .. ما أنا قايلالك يا حماده .. قايلالك .. ريقى نشف أقولك إدفع الضرايب والتأمينات وعم السيد ريقه نشف هو راخر .

حماده : يا ماما .. أنا مش ناقص بأة .. ح نعمل إيه دلوقت .. هو ده المهم .

نوننا : تاخذ يا حبيبى الكام حته صيغة اللي عندى تبيعهم وتتصرف فيهم .

حماده : يا ماما دى بتقولك مليون و ٢٠٠ ألف جنيه .

نوننا : أهى نواية تسند الزير .

إيناس : مفيش غير إنه يبيع المحل يا طنط ويخلص منه ؟!

نوننا : يبيع المحل .! أنتى بتقولى إيه يا إيناس ؟.

إيناس : هوه المحل بيكسب يا ماما .. ده مش جاى من وراه غير الخسارة ووجع الدماغ .. المهم مين اللي يرضى يشتريه دلوقت .. وحتى لو إتباع ح يجيب كام ؟.

نوننا : كان مستخبي لنا فين ده يارب ؟!

حماده : يا ماما .. إنتي ح تعددي ..!

حماده يقوم غاضباً .. ويطلع إلى الدور العلوى .

نوننا : لا حول الله يارب .. والنبي ما تسببه يا ايناس .. أطلعي

أتكلمى معاه .. ده عنده السكر والزعل وحش علشانه ..

قوليله مايشيلهاش هم .. ح تُفرج إن شاء الله .

ايناس تطلع خلف حماده .

نوننا : أدى اللي كنت عامله حسابه .. وحيد طول عمرك يابنى فى

الدنيا دى .. بطولك .. يارب .. اللهم وأنتى جاهى .. وحياة

حبيك النبي لتخرجه من الأزمة دى بخير .

نوننا تمسح دموعها التى تنزل على خدها .

وكان يجب أن تحاول هى بنفسها إيجاد الحل .. فى مشهد إنسانى مؤثر وهى ذاهبة

لتستدين من رجل كان يعمل أجيراً عندهم منذ سنوات عديدة .

كمال جالساً فى مكتبه .. يسمع ضجيجاً خارج المكتب يلفت نظره .. فجأة يفتح الباب

ويدخل الساعى وهو رجل كبير فى السن .. بيومى .

بيومى : أفضلى يا ست الكُل .. يادى النور .. الشركة نورت كلوب .

تدخا ماما نوننا .. وخلفها بعض الموظفين ومنهم كبار فى السن .

كمال : ماما نوننا ؟! مش ممكن .. وأنا أقول إيه المظاهرات اللي بره دى

نوننا تدس مبلغاً فى يد بيومى .

بيومى : ربنا ما يجرنا منك يا ست الكُل ..!

كمال : أفضلى .. أفضلى يا ماما نوننا .. أنا واللهى ما مصدق ؟!

تشرىبى إيه ؟!

نوننا : شاربة كل حاجة .. أقعد بس عشان مش عاوزة أعطلك ..!

كمال : متشكرين يا جماعة .. أفضلوا .. أفضلوا على مكاتبكم ..!

بيومى : ح أعملك الكركديه يا ست الكُل .

نوننا : جاتك إيه يا بيومى .. أنت لسه فاكر .

بيومى : دى أحلى أيام يا ست الكُل .. هى تنسى .

بيومي خارجاً .

- نوناً : أتد يا كمال .
كمال : ده الحاج خليل لو عرف إن أنتى هنا كان فرش الأرض رمل ..
دلوقت يبجى .. إزى الأحوال .. طمنيى عليكى .
نوناً : الأحوال مش تمام يا كمال .
كمال : ليه بس .. إيه اللى حصل .. قلقتنى .
نوناً : حماده ابن عمك يا كمال .
كمال : ماله حماده .. مش بأة كويس وخرج من المستشفى وزى القُل .
نوناً : لأ .. الحمد لله .. صحته الله أكبر كويسة .. المشكلة اللى واقع
فيها حماده كبيرة قوى .. الضرايب ح تحجز عليه .
كمال : ليه .. هو متهرب من الضرايب .
نوناً : لا والنبي ولا متهرب ولا حاجة .. ما أنت عارف حماده .. هما
اللى جُم فجأة قالوله عليك قد كده .. ويا الدفع يا السجن .
كمال : عليه كام للضرايب يا ماما نونا .
نوناً : مليون و ٢٠٠ ألف جنيه .
كمال : كام .. ده ما بيدف عش خالص بأة من يوم ما فتح وإيه اللى
مسكته ده كله .
نوناً : أهوه .. اللى حصل بأة يا كمال .. مصيبة وجات فوق دماغنا .
وبعدين يا ماما نونا .. ح تعملوا إيه ؟!
كمال : ما أنا جايالك أفضفض لك يا كمال .. أنا عارفاك .. طول
نوناً : عمرك طيب وحنين .. وتحب حماده .. مالقتش غيرك أجيله
عشان أقول له .
كمال : لا .. دى مصيبة فعلاً والمبلغ كبير قوى .
نوناً : يعنى كنت بأقول يا كمال يعنى .. لو قدرنا ندبر له المبلغ .. لحد
ما المحل يمشى شوية ونبأة نسدد هولك .!
كمال : ياريت يا ماما نونا .. إنتى عارفة أنا عمرى ما أتأخر عنك أبداً
.. بس أنتى عارفة ظروفى .. أنا الوديعه اللى أنا عايش منها

مقدرش أفكها .. أنتى عارفة مصاريف أحمد إبنى فى لندن ..
بالإسترليني كله .. والولاد هنا كمان مصاريفهم كبيرة قوى ..
ده أنا واخد فيلا فى مارينا .. وبأسدد قسطها ٣٠ ألف جنيه فى
الشهر .. والله كل شهر بأبقى مش عارف ح أسددهم إزاي ..
ياريتنى ما أخذتها .. أنا حتى ما أقدرش أبيعها .. لأنها مرهونة
للبنك لغاية ما أخلص تمناها .. أنا مش عارف أقول إيه بس ..
والله أنا مكسوف منك .!

نونسا : لأ يا كمال .. أنا عارفة إن لو معاك مش ح تتأخر .. أعمل إيه
بس ياربى .. ده أحنا عمرنا ما عملنا حاجة وحشة فى حد .

تفكر قليلاً .

نونسا : بقولك إيه يا كمال .. إيه رأيك يعنى لو قولنا لخليل يدفع لنا
المبلغ .. ونباة نسددهم على كام شهر كده وخليل يعنى مش
غريب .. ده متربى فى بيتنا .

كمال : الحاج خليل .. راجل كويس قوى يا ماما .. بس أنا مقدرش
أطلب منه .. أصل بصراحة أنا واخد سلفة كبيرة منه
وبأسددها من مرتبى .. لما دفعت مقدم الفيلا .. تباة ثقيلة قوى
لما أطلب منه تانى .. إنها .. معلىش يا ماما .. ممكن لوجات
منك أنتى تباة ليها وضع تانى .. أنتى عارفة الحاج خليل
بيقدرك قد إيه

نونسا : أنا .. أصل أنا عمري ما أستلفت من حد يا كمال .. أنا مش
عارفة أقول إيه .. ده أنا جياالك وأنت إبنى ومكسوفة وبأقدم
رجل وبأخر رجل .!

يفتح الباب ويدخل خليل وخلفه بيومى .. خليل هو الذى يحمل صينية الكركديه .

بيومى : مايصحش يا حاج .. عنك يا حاج .

خليل : والله ما حد يقدملها الكركديه غيرى .. دى مجيتها عيد عندنا
النهاردة .. مكافأة ربع شهر للموظفين كلهم .. إلا أنت يا
كمال .. خصم .

- كمال : له بس يا حاج .
- خليل : عشان ما قولتليش إن نونا هانم مشرفانا .
- نوننا : ربنا يخليك يا خليل بيه .. والله ده أنا لسه بأسأل عليك كمال .
- خليل : والله مشرفانا يا ست الكل .. أهلاً وسهلاً .
- نوننا : أهلاً بيبك .
- كمال : لا .. ده أنا حاسس كده أنى عزول .. أنا ح أستأذن خمس دقائق .. خليكوا هنا وجاى علطول !.
- نوننا تنظر لكمال .. وكمال ينظر لنونا .. يريد أن يفسح لها مجالاً حتى تفتح الحوار مع خليل وينصرف ويغلق الباب .
- خليل : وإزاي حماده بيه !.
- نوننا : والله يا خليل بيه حاله ما يسررش عدو ولا حبيب !.
- خليل : إيه حكاية خليل بيه دى يا ست نونا .. طول عمرك بتقوليلى يا خليل .. والا أفكرك كنتى بتقوليلى إيه زمان .. يا خل !.
- أنا عاوز أسمع يا خل !.
- تضحك .
- نوننا : آه .. والنبي أول مرة أضحك يا خليل .. الهم اللى الواحد شايله الجبال ما تقدرش تشيله .
- خليل : خير يا ست نونا .. إيه الموضوع !.
- خليل ونونا .
- خليل : ما تشيليش هم يا ست نونا .. أعتبرى الموضوع ده خلص خالص .. أدينى بس يومين أشوف السيولة هنا فى الشركة أحسن أنا ما بأتش عارف حاجة فى الشركة .. كمال بيه وأشرف إبنى هما اللى سايقين .. يقولولى يمين أقول حاضر .. آمين !.
- نوننا : الواد أشرف .. ده كان لسه بيتنطط على حجرى !.
- خليل : لا .. ده أنتى ما تشوفيهوش دلوقت بأة زى الشحط .. أما أخليه ييجى يسلم عليكى .

يفتح الباب .

خليل : يا بيومى .. أئده الأستاذ أشرف بسرعة .

بيومى : حاضر يا خليل بيه .!

كمال وأشرف ماشيان .

بيومى : يا أشرف بيه .. الحاج عاوزك .

كمال : بس بيأة ماما نونا باعتالك إستدعاء يا أشرف

أشرف : يااه .. دى واحشانى قوى .!

كمال : أنت ما شفتهاش من إمتى ؟!

أشرف يدخل ويقبل ماما نونا فى رأسها

نوننا : لا .. لا .. ماله !. أوحش كده الواد ده ؟!. ده كان مقطقط

وهو صغير .

أشرف : إزى حضرتك .!

نوننا : لا وبأة مؤذب قوى .. محدش يشوفه زمان .. كان ما بيعدش

.. طالع نازل ع السلم عندنا فى القصر .. فاكر يا خليل .

خليل : أحلى أيام يا ست نونا .

أشرف : نورتى الشركة يا فندم .

نوننا : إلا يا فندم دى .. الواد ده ماله بأة متربى قوى كده .

خليل : تربية الخواجات بأة يا ست نونا .!

نوننا : طيب .. أمشى أنا بأة .. أحسن ورايا مليون حاجة النهاردة .

خليل : ح أطمئن حضرتك يا ست نونا .. ح أكلمك بالتليفون .

نوننا : متشكرة يا خليل .

خليل : أتفضلى أوصلك

كمال : أنا ح أوصلها يا حاج .

خليل : والله ما حد موصلها غيرى !.

يمشون وراءها فى زفة .

- ولا تزال الأم مهمومة بإبنها ومشكلته المادية إنها لا تستطيع النوم .

نوننا جالسة فى الهول .. وهى فى قمة الحيرة والإرتباك .. ثم تمسك بالساعة وقد قررت ذلك أخيراً .

نوننا : ألو .. أيوه يا كمال .. إزيك يا حبيبى .. هوه خليل ما قالكش حاجة يا كمال .. أصله قاللى إنه ح يطمنى وما أتصلش بيا .

كمال يتحدث فى التليفون .

كمال : أنا الحقيقة مش عارف أقولك إيه يا ماما نونا .. الحاج خليل بيعتذر لك قوى .. كان نفسه يعمل حاجة بس أصل عندنا شغل كتير وعاوز كل ملين فى الشركة .. الراجل مكسوف قوى ومش قادر حتى يكلمك بنفسه

نوننا تتحدث فى التليفون .

نوننا : معلش يا كمال .. إنشالله ربناح يفرجها من حته تانية .. ربنا عمره ما ح يسبنا أبداً .. تصبح على خير يا حبيبى .!

تضع الساعة .. ثم تنزل دمعة من عينيها تزيلها بشموخ وكبرياء .. ثم تصعد إلى السلم وهى منهارة تماماً .. لتغلق أضواء الهول تدريجياً .

- وكارثة أخرى تنهال على رأس ماما نونا .. بيع قصر عزو الذى عاشت فيه عمرها كله .. ولا أحد يجرو على أن يفتحها فى الموضوع .

حماده داخلاً . ليجد ماما نونا فى الصلاة تنام على نفسها جالسة على الكرسي فى إنتظاره .

نوننا : أنت جيت يا حماده .. أنت كنت فىن ؟!

حماده : مفيش يا ماما .. كنت بأتمشى شوية .

نوننا : أنت مالك يا حماده .. مش عاجبنى مش الحمد لله حكاية الضرايب خلصت وإيناس مراتك الله يسترها ويخليها لك حلت لك الموضوع .

حماده : أيوه يا ماما .

نوننا : أسكت يا حماده .. بقالى شهرين مابعتش فلوس لعيشة ومكسوفة قوى .. بس الله أعلم بالظروف بأة .

حماده : هي عيشة كلمتك .
نوننا : لأ .. ما أنت عارف عيشة غلبانة لا بتهش ولا بتنش .!
حماده : تلاقيها زعلانة منى ؟
نوننا : ليه يا حماده .
حماده : أصل إبراهيم كان جالى من فترة كده وكلمته بطريقة وحشة .
نوننا : ليه يا حماده .. ده إبراهيم بيحبك .. وعمره ما زعلك .!
حماده : ما أنا متضايق عشان زعلته .
نوننا : وزعلته ليه ؟!
حماده : أصله كان جايب شنطته وعاوز يقعد معنا هنا !
نوننا : يا ريت .. ده بيأه يوم المنى .. أحنا فى ديك الساعة أما أولادك يتلموا حواليك ويعيشوا فى خيرك ويعملوك حس فى البيت .. ده أنا الود ودى كنت أكلم حسام عشان يتجوز عندنا هوه راخر .. البيت كبير ما شاء الله ويساع من الحبايب ألف .
حماده : أيوه .. لو كان بيتنا كُنا عملنا كده .بس ده مش بيتنا يا ماما .
نوننا : مش بيتنا إزاي يا حماده .. هوه أنت ليك بيت غير ده .. حقه ما يصحش الكلام اللى بتقوله ده .. ده أبوك الله يرحمه لما جينا نتجوز أنا وهوه راح للباشا الكبير .. أبوه .. عشان يقول له أخذ مراتى ونتجوز بره عاديك ع اللى عمله فيه .. رنه حته علقه .. قالله نونا دى بتتى أنا .. عاوزها بيأة تقعد معنا هنا فى بيت العيلة .

حماده : تصبى على خير يا ماما .!

نوننا تنظر نحوه بإستغراب .

الإفطار ونونا تؤكل حماده بيديها .

حماده : هي إيناس نزلت يا ماما نونا ؟

نوننا : ربنا يوفقها .. والله أنا مصلية الفجر وداعياها .. راحت تودى

هيشم المدرسة وحتطلع ع المحل .. كانت عايزة تصحيك قتلها

كمال : معلى يا حماده طبلنا علىك كده زى القضا المستعجل .. بس
إنت عارف الموضوع خطير وعاوز مننا فعلاً تفكير .. إنتوا
تبطلوا بأه شغل العيال ده إنت وهوه .
علاء مجلس دون أن يسلم .. وحماده يكشر ولا يعطيه إنتبهاً .

حماده : أنا بس عاوزه يعرف إنه لو كان فاكر إنه بيصبع عليا فأنا ...
علاء : مين فينا اللي بيصبع يا حماده .. عامل لى نصباية وتقوللى أنا اللي
باصبع !! .

حماده : وبيع القصر ده مش نصباية إنت عاملها علينا كلنا .. لعلمك يا
كمال أنا ح أبلغ نوال اللي قاله لشادى .. لما كان فاكر إنه هو اللي
ح يتشرى القصر .. عاوز يحط ٦ مليون فى جيبيه ويديها عقد
مضروب ! .

علاء : ده واد كذاب وحقير .. وأنا مش ح أسيبه .
حماده : حقير عشان كشفك مش كده .
علاء : دى حاجة بتاعة نوال أختى .. إنت مالك إنت .. أنا حُر .
حماده : لأ .. ما إنتش حُر .

صارخاً .

كمال : يا جماعة .. يا إخواننا إحنا مش جاين نتخانق .. إحنا جاين
نتناقض .. نتكلم ونوصل لحل .. بس بأه يا علاء .
علاء : أنا ساكت .. ما تقول له هوه .
كمال : بس يا حماده .
حماده : إنتوا عاوزين إيه يا كمال ؟ ! .
كمال : أطلبلنا قهوة يابنى إنت .. صدعتونى .

يتكلم فى الديكتافون .

حماده : ثلاثة قهوة يا عم سيد .
علاء : أنا مش شارب حاجة .
حماده : لأ .. ح تشرب بأه .. إنت تحترم المكان اللي إنت قاعد فيه .
علاء : مش شارب قهوة بأقولك .

سيبيه ياخذ كفايته من النوم .. بأه إنت زعلان عشان زعلت
إبراهيم .. طيب ياخويا ما تصالحه .. ده إبراهيم حنين وعمره
ما شال فى قلبه .

حماده : ماما باقولك إيه ، إنتى ما زهقتيش م البيت ده ؟!

نوننا : جتك إيه يا حماده .. أزهدق من بيتى !. ده أنا متهيألى إنى لو
خرجت منه أموت زى السمك ما يخرج م المية .

حماده : بعد الشر عنك يا ماما نونا .

نوننا : وإيه اللى يخليك تقول كده يا حماده ؟.

حماده : لأ مفيش .. أصلى بافكر يعنى .. باقول .. ليه ما ناخدش شقة
صغيرة .. حلوة كده أهى تلمنا مع بعض .

نوننا : شقة .. هوه أنا عمرى عشت فى شقق يا حماده .. ده أنا أنحنق ..
أنا أتعودت ع البراح والسقف العالى .. شقة إيه .. إنت بتهزر
.. وبعدين نبأه عايشين فى الملعب ده ونقفله ونروح نقعد فى
حُق !.

حماده : طيب إ فرضى يعنى يا ماما .. إ فرضى إن البيت ده وقع ولا جال
قرار إزالة .

تقاطعه .

نوننا : يبقى أندفن تحتيه .. ده أنا إتجوزت فى البيت ده .. وخلفت فى
البيت ده .. فاكر يا حماده لما كنت بتتقمص وتقعده مخاصمنى
باليومين وبالتلاتة .. كنت أقعد أكلم الحيطان والعواميد اللى
فى البيت .. دول بأوا حته منى وأنا حته منهم يا حبيبى .

رد فعل على وجه حماده .

- ولا توجد مشكلة فى أزمة بيع القصر عند عائلة عزو .. إلا ماما نونا .. الكل يخشى
من رد فعلها .. من أن تزعل .. تتأثر .
كحال داخلاً وخلفه علاء .

كـمال : الله يجرب بيت القهو اللي حتخلينا نمسك في بعض دى .. ح
تشرب القهوة يا علاء ورجلك فوق رقبتك .. إخرس بأه ..
شوف يا حماده .. إحنا عمالين نلف وندور ونختلف في
حاجات كلها في النهاية حاجات تافهة .. الفلوس .. المشتري
.. العمولات .. وناسيين أهم حاجة .. ماما نونا
ماما نونا ده موضوع يخصنى أنا ماحدث له دعوة بيه .

حماده : لأ .. ما يخصكش لوحدك يا حماده .. ماما نونا ليها فينا زى ما
ليها فيك بالظبط .. إحنا قدام أمر واقع .. القصر بتاعة نوال
كـمال : وبإسمها .. ونوال قررت إنها تبيع القصر .. يعنى ماما نونا
مش حبيآلها مكان تقعد فيه .

حماده : ليه .. هوه أنا مُت !. أنا أجييلها أحسن قصر تعيش فيها .
كـمال : يا حماده .. أنا ما كملتش كلامى .. بيوتنا كلها مفتوحة لماما
نونا .. ونوال نفسها لو إتكلمنا معاها .. ممكن تجيب لها أحسن
مكان .. وممكن كمان تاخدها معاها ألمانيا تعيش معاها هناك ..
مش دى المشكلة .. المشكلة ماما نونا نفسها .. هل هاترضى
بده ولا لأ ؟ .

حماده : أنا حاولت أدرج لها الموضوع .. قالتلى لو طلعت من البيت ده
ح أموت .

كـمال : لا حول الله يا رب .. الست دى ما تستاهلش مننا كده في آخر
عمرها .. ما تعرفش تأجل البيع شوية يا علاء ؟ .

علاء : المسألة مش في إيدي .. الراجل ماشى آخر الشهر ولو ما
خلصتش في القصر عمره ما يخلص .. مسافر بعد كده رحلة
طويلة قوى .

كـمال : هوه راح شاف القصر يا علاء من جوه ؟ .
علاء : عاوز يشوفها .. وأنا مش قادر آخده هناك عشان لسه ماما نونا
ما عرفتش حاجة .. أنا كنت معتمد على حماده يقول لها .

كـمـال : إسمعوا .. مش يمكن الراجل ما تعجبوش القصر وكل ده
ينزل على فاشوش .

علاء : ممكن .

لحظة صمت .. وحماده يفكر فى الموقف .

كـمـال : خلاص .. يروح الراجل يشوف القصر وبعدين لما يقول ح
أشترى نبأه نتكلم .

حماده : وحيروح يشوف القصر إزاي؟! تفتكروا ماما نونا مش ح
تحس بحاجة .. دى بتحس م البصة! .

علاء : طيب ما ياخذها الأستاذ حماده يخرجها .. يعزمها ع الغدا
ساعتين زمن بس .. يكون الراجل شاف القصر وأخذ قراره .

حماده : أما أشوف .

علاء : أما تشوف إمتى .. ما هو إحنا عاملين إعتبار للقرابة اللي بيننا
وكل حاجة بنعملها قدامك أهوه .. أحسن ما ماما نونا تلاقى
الراجل كده فجأة جاى وبايعين القصر وتعرف كل حاجة
وماحدث عارف ممكن يحصل لها إيه؟

حماده : يعنى إيه إنت بتهددنى .. طيب إعمل اللي إنت عاوزه ..
وخللى الراجل ده يخش البيت بأه يا علاء وأنا ح أكسر رجله .

كـمـال : مش كده يا حماده .. علاء ما بيهددكش .. علاء خايف على
مشاعر ماما نونا زيك وزيبى بالظبط .. صدقنى يا حماده .. إحنا
مش ضدك .. إحنا معاك .. ولعلمك أنا حاسس كده مش
عارف ليه إن البيت مش ح يتباع .. البيت بره شكله يخض إننا
من جوه أنا عارف إن حالته مش قد كده .

حماده : خلاص .. بكرة آخذها أخرجها .. وأكلمكوا تيجوا .

كـمـال : أهو كده الكلام .. إحنا نمشى خطوة خطوة .. واللى يعمله
ربنا هو اللي يكون .

- ويذهب عاطف إلى القصر ليشاهده عن كثب .. ويتأمل حمادة الذي يحاول بطفولة
إثناؤه عن فكرة الشراء .
عاطف نازلاً .. وخلفه حماده .

عاطف : أستاذ علاء .

حماده يغمز لكمال .

علاء : هه .. أتفرجت ع القصر يا عاطف بيه .!

عاطف : الأستاذ حماده فرجنى ع القصر كويس .. والراجل الحقيقة ما
خبا عنى شى .

علاء : ونويت على إيه ؟!

عاطف : أنا ح أشتري القصر دى دلوقت حالاً .. وبالتمن اللى أتفقتنا
عليه ؟!

حماده مفاجئاً .

حماده : إيه ؟!

عاطف : الحقيقة الأستاذ حماده كان صريح جداً معايا والراجل ماخباش
عنى أى حاجة وأنا أحترمت فيه ده .. وده اللى شجعنى أكثر
أنى أشتري القصر .. أنا عارف القصر كويس .. ودارسها
بالسنتى قبل ما أفكر أشتريها .

رد فعل على وجه حماده .

كمال : عموماً يا أستاذ عاطف .. أحنأ حتى لو بعنا القصر لحضرتك
.. مش ح يباة النهاردة ولا بكرة .. القصر فيها ناس قاعدين
ولازم نديهم مهلة عشان يعزلوا منها .. على الأقل شهر .

عاطف : وأنا معنديش مانع .. أنا فلوسى جاهزة يا علاء بيه .. وأول ما
تفضوا القصر أنا تحت أمر كوا .!

يجلسان فى كورنر .

علاء : أتفضل .. أتفضل يا عاطف بيه .

عاطف : علاء بيك . أنا حاسس إن فيه سر فى الموضوع .. أنا مش
عارف أنتوا بدكوا تبيعوا القصر والا ما تبيعوها

علاء : ح نبيها يا عاطف بيه .. المسألة بس فيها ناحية كده نفسية ..
ماما نونا مرات عمى .. وأم حماده .. طول عمرها عيشة في
البيت ده .. وأحنا لسه ما قولنا لهاش إن أحنا ح نبيع القصر ..
أحنا بس عاوزين ناخد وقتنا عشان ندرّج لها الموضوع واحدة
واحدة كده .

عاطف : هيه شريكة في ملكية القصر .

علاء : لأ .. القصر بأسم نوال أختى .. أنها .. ماما نونا ليها مكانة
خاصة عندنا .

حماده يجلس في إحباط وهو ينفخ .

كمال : وبعدين يا علاء .. ح نقول إيه لماما نونا .

علاء : لازم نشوف لها أى حجة .

تدخل ماما نونا .. فترى علاء وعاطف

نوننا : يا حماده .. إيه ده .. علاء .. توك اللي أفكرت ماما نونا ..

أوعى كده أنا زعلانة منك .. الله .. مين حضرته؟! .

ينظرون لبعضهم في ذعر وهم لا يعرفون ماذا يقولون .

يقبل يديها .

علاء : واحشاني والله يا ست الكل .. ده الأستاذ عاطف حوشان ..

صديقي من لبنان .. ماما نونا دى بأة أمنا كلنا .. مش أم حماده

لوحده .

نوننا : أهلاً يا أستاذ عاطف .. منور مصر .

عاطف : تشرفنا يا ست الكل .

نوننا : والضيف قاعد كده يا حماده لا قدمتوله حاجة ولا ضايفتوه ..

وكمال كمان هنا .. أنتوا بُخلايا ولاد عزو ده أنتوا بيت الكرم

.. لا مؤاخذة يا أستاذ عاطف! .

عاطف : متشكرين يا ست نونا .

نوناً : لا والنبي لتتغدا عندنا .. وده أسمه كلام برضة والأكل جاهز

.. أنا يادوب ح أسخنه .. أنا عاملة بامية باللحمة الضانى

تاكل صوابك وراها .. ثوانى ويكون الأكل جاهز .

تدخل إلى المطبخ .. عاطف يتأمل الجدران المزينة بالكرانيش القديمة

حماده : لا .. أنا مش ح أقدر أقولها .. قول لها أنت يا كمال .

كمال : أنا .. لا يمكن .. أنا مقدرش أستحمل أنى أقولها أبداً !.

علاء : ما هى لازم تعرف يا جماعة .. كده كده ح تعرف .. أحنا

نجيبهاها واحدة واحدة .

كمال : أحنا ممكن نقول لها البيت آيل للسقوط .. والحى عاوزين

يعملوله قرار إزالة .

حماده : ودى برضة تعدى على ماما نونا .. دى تقلب الدنيا وتروح

الحى وتقابل المحافظ .. أنتوا مش عارفين ماما نونا ولا إيه ؟!.

نوناً تدخل بالأطباق .. ترى عاطف محققاً فى الأعمدة والكرانيش .

نوناً : إيه رأيك فى الشغل القديم ده يا أستاذ عاطف .. مايتوجدش

منه النهاردة .

عاطف : حاجة عظيمة يا ست نونا والله .. تحفة ..

عاطف يحاول أن يساعدها فى حمل الأطباق .

عاطف : عنك يا ست الكُل !.

نوناً : عنك أنت .. والنبي ما تتعب نفسك .

عاطف : إيه يا رجال .. ما تمدوا إيديكوا تساعدوا الماما

نوناً : لأ .. سيبيهم أنا معوداهم على كده .. حاكم دول كلهم ولادى

.. أنا اللى مربياهم .. تعالوا يا ولاد .. الأكل ح يبرد .. أنتوا

بتتودودوا فى إيه ؟!.

يأتون جميعاً ويجلسون على الترابيزة .

نوناً : تعرف يا أستاذ عاطف أنا روح لبنان دى سنة كام ؟

عاطف : سنة كام يا ست نونا .

نوناً : سنة ٤٦ .

عاطف : والله .
نوننا : كنت لسه متجوزة جديدة .. وكانت الموضة زمان إن شهر
العسل نقضيه في بيروت وروحنا أنا وأبو حماده بأة طلعتنا
الجبل والشجر ده بتاع الأرز كان مليون تلج .. هوه لسه
موجود برضة يا سى عاطف .
عاطف : الجبل موجود طبعاً يا ست نونا .. ح يروح فين؟! .
نوننا : ما تاكل يا سى عاطف .. أنت أكلتك ضعيفة كده ليه؟
عاطف : سفرة دائمة ست نونا .. بخاطر كم .. لازم أمشى دلوقت .!
نوننا : تمشى .. على فين بس؟! .
عاطف : عشان أروح الأوتيل .
نوننا : وأوتيل ليه يا سى عاطف .. ما أنت قاعد معانا شوية دى
القعدة في التراس هنا تترد الروح .!

صارخاً .

حماده : ماما .. كفاية بأة .!
عاطف : فرصة سعيدة يا ست نونا .
عاطف يخرج .. وعلاء يوصله .. وكمال في قمة التأثر .
نوننا : فيه إيه يا واد يا حماده .!
حماده : يا ماما .. الأستاذ عاطف حوشان مش ضيف
نوننا : آمال إيه؟ . هوه أنا لخبطت في الكلام ولا حاجة .
حماده : ما تقول لها يا كمال .. أنت ساكت ليه؟ . ما تتكلم يا علاء .!

عائداً .

حماده : عاطف ده جاى عشان ح يشتري القصر .!
نوننا : أنهو قصر؟! .
حماده : القصر دى .. اللي أحنا عايشين فيها .
نوننا : يشتريها إزاي .. حد قال إنها ح تتباع .

- علاء : أصل نوال بتمر بظروف وحشة في ألمانيا .. ومحتاجة فلوس ..
وأنتى عارفة العُربة والمصاريف .
- نوننا : تقوم تبيع القصر .. تبيعنى .!
- كمال : ما عاش اللي يبيبعك يا ماما نونا .
- نوننا : ده اللي ماكانش بينيمك يا حماده .. ده اللي كان شاغلك طول الليل .
- حماده يومئ برأسه .
- نوننا : والله أصيلة يا نوال .. برافو عليكى يا بنتى .. العيش والملح تمروا فيكى صحيح .. وح تبيع القصر .. وترمينى أنا وحماده فى الشارع .
- كمال : محدش يقدر يرميكى فى الشارع يا ماما نونا .. أنتى خيرك ع الكل .. أنتى ح تقعدى معايا .. معززة مكرمة .!
- حماده : أنت بتقول إيه يا كمال .. ماما لا يمكن تسيبنى أبداً .. ماما ح تقعد معايا أنا .
- نوننا : وأنت يا علاء مش ناوى تقعدنى معاك أنت كمان يااه .. بأة دى مكافأة نهاية الخدمة .. كده يا نوال .. نسيت كل اللي عملته معاها .. هى الدنيا وحشة قوى كده ليه ؟!
- تبكى .. كمال يبكى .. وحماده يبكى
- علاء : ماما نونا .. أنا عندى رأى .. أنا عارف إنك لا يمكن تقبلى أنك تقعدى مع حد .!
- نوننا : قوللى يا علاء .. قوللى فكرتولى فى إيه ؟!
- علاء : فيه نادى شيك قوى هنا فى المعادى .. وغالى على فكرة جداً .. إقامة فندقية تقريباً .. لكبار السن .
- حماده : أنت بتقول إيه يا علاء .. ماما مش ست عجوزة .. ماما ماكبرتش للدرجة دى .. على آخر الزمن عاوز تودىها لدار مُسنين .. عاوزين تبيعوا القصر بيعوها .. أنها مالكوش دعوة بهاما وسيونا فى حالنا بأة .

علاء : ما نشوف الواقع بأة يا جماعة .. ماما نونا عندها ٧٧ سنة ..
وأنت عندك ٦٠ سنة .. أحنا ما عُدناش صغيرين يا حماده .
نوننا : كويس إنك فاكِر السنين يا علاء .. بعد أكثر من ٦٠ سنة
عشتهم في البيت ده .. تفتكر أطلع منه أروح دار مسنين ولا
أروح المدافن أحسن .
كهمال : ما تقوليش كده يا ماما نونا .
نوننا : وعاوزيني أسيب البيت من أمتي يا علاء .
حماده : هما أدوا الراجل مُهله شهر .
تمسح دموعها .

نوننا : والله كتر خير كم .. لو عشنا الشهر بأة
حماده : لو سمحتوا بأة يا جماعة .. لو سمحتوا .. سيونا لوحدنا شوية
علاء وكهمال ينتحيان جانباً وهما في قمة التأثر وشعور بالذنب .
حماده : يا ماما .. أنا مش عاوزك تعملي في نفسك كده .. في ستين
داهية البيت ده اللي ح يزلونا بيه .. أحنا ممكن نقعد في أي حنة
.. وطول ما أحنا مع بعض خلاص .. وهو أحنا عاملين إيه
بالبيت الطويل العريض ده .. مش هي أوضتنا أنا وأنتي .. ده
أحنا ما بنخر جش منها يا ماما .. يا ماما أبوس إيدك ماتعيطيش
نوننا تنظر نحوه .. وتربت على شعره بحنان .

نوننا : إنت فاكِرني ببعيط على نفسي يا حماده .. أنا ببعيط عليك إنت يا
حبيبي .. إذا كانوا عملوا كده وأنا عايشة على وش الدنيا .. ح
يعملوا فيك إيه بعد ما أموت .!

تدخل إيناس ومعها هيثم وجي جي .

إيناس : مساء الخير .. إزيك يا ماما نونا .. إزيك يا حماده .. تعالى يا
جي جي .. إيه ده ؟. أحنا عندنا ضيوف .. سوري .. ما
أخذتش بالي .!
جي جي : مساء الخير يا طنط .

نوننا : إزىك يا جى جى .. تعالى .. دول مش ضيوف يا إيناس ..
دول أصحاب بيت .. علاء بيه وكمال بيه .. ولاد عم حماده .
إيناس : أيوه .. أيوه .. متهألى أحننا إتقابلنا هنا فى عيد ميلاد حماده .
نوننا : دول بأة ولادى يا إيناس .. ولادى اللى أنا رببتهم .
جى جى : وإزىك يا أستاذ حماده .
إيناس تختلى بحماده جانباً .
حماده : الحمد لله على كل شىء .!
إيناس : إيه .. فيه إيه يا حماده .. شكلكوا مش عاجبنى .. هو حصل
حاجة ؟!
حماده : ح بيعوا البيت يا إيناس .
إيناس : البيت ده ؟!
حماده : أيوه .!
إيناس تتحول إلى ماما نونا .
إيناس : وح تعملوا إيه يا ماما نونا ؟!
نوننا : اللى يعمله ربنا هو اللى يكون يا بنتى ؟ . طيب .. أنا ح أسبيكوا
بأة وأطلع أصلى المغرب وأستريح فى أوضتى شوية .. بعد
إذنكوا .. بيتك يا جيجى .. بيتكوا يا علاء .
نوننا تنهض فى ثناقل .. حماده ينظر نحوها وقلبه يكاد ينفطر عليها .
إيناس تشير له ألا يتركها وحدها .. حماده يطلع معها .. وقد أستندت على ذراعه ..
وقد خيم الصمت تماماً على المشهد .
قصر عزو من الخارج وقد بدت اللحظة موحشة للغاية فى وقت الغروب .
نوننا تختتم الصلاة وحماده بجوارها .
نوننا : السلام عليكم ورحمة الله وبركاته .. السلام عليكم ورحمة الله .
حماده : حرماً يا ماما نونا .
نوننا : جمعاً يا حماده إن شاء الله .
حماده : ولا يهملك .. بيعوا البيت ولا يولعوا فيه ؟ . أنا مايمنيش فى
الدنيا دى كلها غيرك إنتى .. أنا مش عاوزك تزعلى .

نوننا : ما تشيلش همى يا حماده .. أنا مش ح أعيش أكثر ما عشت .!

حماده : ما تيجى أخرجك .. تلاقىكى على فطار الصبح ؟!

نوننا تنظر نحوه بإستغراب وهو يحاول إضحاكها .

حماده : أأكلك كوارع .!

نوننا تبتسم .

حماده : بأة أبويا كان بياكل خمس مرات كوارع فى الأسبوع ؟!

نوننا تضحك .

تضحك أكثر .

حماده : أمال ما خلفتيش غيرى ليه ؟!

تنفجر فى الضحك .. وهو أيضاً يضحك .

تضربه فى دلال .

حماده : أنتى عارفة عملت لك إيه فى الراجل اللبنانى .. أضحكى ..

قلت له البيت فيه تعابين .. وعفاريت .. قعد يترعش ..

وجرى زى الفار ... و ... ما بأش على بقه غير كلمة واحدة ..

شو .. شو .. شو .!

ينفجران فىضحكة طويلة حتى تغرورق عيناها بالدموع .. تربت على كتفه بحنان .

ماما نوننا جالسة وحماده بجوارها على فوتيه فى الحجره .

نوننا : زمن .. أيام ماحدث عارف لها حاجة يا حماده .. أول ما

إتولدت نوال بنت عمك .. أمها الله يرحمها تعبت زى ما إنت

عارف .. إنت كنت لسه صغير .. كنت أقضى الليل كله

سهرانة جنبها أغير لها وأديها الرضعة .. نوال ما وعيتش على

أمها .. يوم ما نطقت كلمة ماما .. قالتها لى أنا .. وده اللى حازز

فى نفسى .

حماده : يا ماما .. إنتى مستغربة على إيه .. وهى من ساعة ما سافرت

كلمتك ولا سألت عليكى كام مرة نوال عزو يا ماما .. ما إنتى

عارفة عيلة عزو كلهم .. ماحدث فيهم بيفكر غير فى نفسه .

نوننا : زمان وهى صغيرة .. وإنتوا بتلعبوا مع بعض .. كنت
أبصلكوا وأقول يا ريت .. ياريت تبأوا البعض .
حماده : أنا .. أنا أتجوز دى؟! يا شيخة حرام عليكى .
- مجئ نوال من السفر -

وفى ذروة الأزمة التى تهدد بطرد ماما نونا من القصر تأتى نوال من ألمانيا .
ماما نونا وقد أعدت حقيبتها .. وهى تمسح دموعها خارجة من حجرتها .. تسمع
صوت الشجار .

نوننا نازلة من على السلم .. والشجار قد زاد بين حماده وعلاء .

علاء : أنت ما تزعليش .. أنت مالكش أى حقوق هنا .. أنت عايش
عالة ع العيلة .. أنت ولا حاجة .. ولولا ماما نونا كان زمانك
بتشحت فى الشوارع

كهمال : عيب يا علاء .. ما يصحش؟! .

علاء : كنت عاوز أبيع البيت وأديكى شفتى بنفسك يا نوال المسخرة
الى هنا .. كنت لازم أقولك نبيع يا نوال .

صارخة ..

نوننا : بس .. بس .. أسكتوا .. خلاص .. أنا ح أريحكوا مننا .. أطلع
جهاز شنطتك يا حماده .. بيعوا البيت زى ما أنتوا عاوزين .. ده
برضة بيتككوا .. الحق حق .. وعمره ما يزعل .. إرتاحى يا
نوال .

وتقول ذلك من أمام حجرتها مروراً بالكوريدور حتى السلم حتى الجملة الأخيرة ..
إرتاحى يا نوال .. هنا تظهر ماما نونا .

نوال بمجرد ما أن تراها .. تجرى نحوها وهى فى قمة التأثر والشوق والحنين .

نوال : ماما نونا؟! .

تعانقها عناقاً طويلاً وتبكيان بكاءً مُراً .

نوال : وحشتينى .. وحشتينى قوى .. قوى! .

بتحفظ .

- نوننا : إنتى أكثر يا نوال .. حمد الله ع السلامة .
- نوال : أنا مش ح أبيع البيت يا ماما نونا .. ولا عمري فكرت أنى أبيعده .. وأنتى لا يمكن تخرجى من البيت ده أبداً .. أبداً .. ده أنتى أمى؟! .
- نوننا : أمال إيه اللى كانوا بيقلوه ده؟! .
- حماده : ده مشروع علاء بيه لخصخصة بيت عزو .. كان عارضه للبيع من ورا نوال يا ماما .
- كمال : خلاص بأة يا حماده .. الحمد لله .. البيت مش ح يتاع .. المشكلة إتملت .
- نوال : البيت ده يعنى ماما نونا .. وأنا لا يمكن أبيعك يا ماما نونا؟! .
- نوننا : الضفر عمره ما يطلع من اللحم يا حبيبتى .. وفين ولادك أمال؟! .
- نوال : جاين .. زمانهم فى الطريق .. أصلهم خدوا طيارة تانية .. ح يكونوا هنا بعد ساعتين .
- نوننا : يا لهوى .. وجاين من ألمانيا لوحدهم .
- تنظر نحوها بحب شديد .
- تقبل يديها .
- نوال : آه طبعاً يا ماما .. ولادى بأوا رجالة .. أنتى لسه حنينة كده .. واحشانى .. وأنتى إزاي صحتك يا ماما نونا .. عاملة إيه؟! .
- نوننا : بأيت كويسة لما شفتك يا نوال .. لسه زى ما أنتى العُربة ما غيرتكيش يا نوال .
- تنظر نحوهم .
- نوننا : إيه مالكووا كلكووا واقفين كده زى ما تكونوا بتفضوا خناقة .. ما تقعدوا .. تعالى يا إناس تعالى يا جى جى .. أنت معرفتهمش بيعض يا حماده! .

حماده : هما إتعرفوا لو حدهم يا ماما نونا .. من أول ما شافوا بعض
أخدوا على بعض علطول .

إيناس : عاوزاك يا حماده .

إيناس تختلى بجماده جانباً .

نوننا : تعالوا يا حبايب من زمان البيت ما إتملاش كده علينا ..
أقعدوا يا ولاد .

جى جى : طيب .. أنا لازم أمشى بأة يا ماما نونا .. القعدة بأة عائلية
وما يصحش أنى أبأة زى العزول فى وسطيكم؟

نوننا : ليه يا جى جى .. هوه إنتى غريبة .

جى جى : معلش يا ماما نونا .. مرة تانية بأة .. النهاردة كفاية قوى كده
.. سلام .. باى يا أنوسة .

جى جى تخرج .

كورنر إيناس وحماده .

إيناس : أسمع يا حماده .. أنا لا يمكن أقعد تانية واحدة فى البيت ده بعد
كده .. أنت ما شفتش عملت فىا إيه ؟. ده هيثم أتصرع ..
الولد أما شافها بتزعق لى حسيت إنه ح يحصل له حاجة

حماده : أنا ح أمشى معاكى .. أنا لا يمكن أسيبك أبداً .

إيناس : لو عاوز تقعد أنت أقعد يا حماده .. أنا ما بجر كرش .!

حماده : وأقعد عشان مين يعنى ؟. أحناح نسيب لها البيت ونمشى أنا
وأنتى وماما نونا ؟!

إيناس : أنا طالعة أجهز شنطتى .!

إيناس تطلع غاضبة .

نوننا : ما تيجوا يا حماده .. إيه يا إيناس .. ما لها دى طالعة واخدة فى
وشها كده ليه ؟!

حماده : طالعة تحضر شنطتها يا ماما نونا .

نوننا : شنطتها .. ليه ؟. هيه ح تسيب البيت .. حد زعلها ؟!

تنظر لجماده .

- نوال : ده الوضع الطبيعي يا ماما نونا .. كل واحد لازم يقعد فى بيته .
- حماده : بلاش تلقيح الكلام ده يا نوال .. أنا كده كده كنت ماشى ..
- إيناس بتحضر لى شنطتى أنا كمان .
- نونا : شنطتك إنت كمان ؟. أنت ح تسيبنى يا حماده .. ح تسيبنى
وتروح فىن ؟!.
- حماده : لأ طبعاً مش ح أسيبك .. أنتى ح تيجى معانا .. أحنا خلاص
مابالناش مكان فى البيت ده
- نوال : إتكلم عن نفسك يا حماده .. ماما نونا لا يمكن تسيب بيتها
مهما حصل ؟!.
- نونا : وأنا مقدرش أسيب حماده يا نوال .. هوه أنا عندى غيره .
- علاء : يا ماما نونا فكرى إنتى فى نفسك بأه .. ما هو طريقتك دى اللى
ودتنا فى داهية .. سيبه يستقل بحياته .
- حماده : ما تتحشرش أنت فى اللى مالكش فيه .. أنت مش مكسوف من
نفسك بعد اللى عملته .
- كمال : خلاص بأه يا حماده .. ما قفلنا الموضوع ده
- نوال : حماده .. ممكن أسألك سؤال ؟!.
- حماده : نعم .
- نوال : أقعد بس أحنا ولاد عم مش غرب عن بعض يعنى !.
- حماده : عاوزه تقولى إيه ؟!.
- نوال : هى إيناس دى الزوجة رقم كام فى حياتك يا بن عمى !.
- حماده : الخمستاشر .. أنا محدش له حاجة عندى .. أنا أرفض أن أى
حد مهما كان يتدخل فى حياتى .. أنا أكبر واحد فيكم مش
أنتوا اللى ح تيجوا تعلمونى .. ياللا يا ماما نونا .. حضرى
نفسك .. شنذلتك أهيه جاهزة .. أنا طالع أجيب شنطتى
ونازل علطول .. دى جاية تفتح لى محضر .. على آخر الزمن ح
تحاسبنى .. هوه أنا شوية .. لا .. ده أنا حماده .. الجامد قوى .

يغمغم بالجمل الأخيرة وهو طالع .

حماده يطلع إلى الدور العلوى .

نوننا : إيه بس يا نوال يا حبيبتي .. أنتى داخلة شايلة كده من حماده
زى ما يكون مزعلك ولا حاجة .. ولا تكونوا مولودين فوق
روس بعض .. أنا مش فاهمة إيه اللي بيحصل بس .. ده أنتوا
طول عمر كوا أخوات وحبائب .. ده حماده طيب وما
يستاهلش كده أبداً .

نوال : أنتى السبب فى ده كله يا ماما نونا .. دلحك ليه ومعاملتك ليه
على إنه طفل صغير خلته يفضل طفل صغير .. ما كبرش ..
شايفه .. بيتقمص بالظبط زى ما كان بيعمل زمان .

نوننا : أنا ؟. والنبي أنا عمري ما دلعته .. ده أنا بديله كلام فى عضمه
ساعات بأهدله .

نوال : حماده مش ح يتعدل يا ماما نونا إلا لما يخرج من البيت ده
ويعتمد على نفسه .

كمال : نوال بتتكلم صح يا ماما نونا .. لو بتحبى حماده خليه يستقبل
بحياته ؟! .

نوننا تبكى .

نوننا : مقدرش .. مقدرش يا نوال .. مش هارين عليا أقعد هنا
وأسيبه يمشى لوحده ! .

نوال : لوحده إزاي ؟. ما معاه شحطة زى الهجمة .. أهيه متجوزها
أهى تونسه ، وبعدين ما أنا كنت عايشة لوحدى بطولى بعد
جوزى الله يرحمه ما مات وفى الغربة أنا وتلات صبيان ما
أشتكتش ولا خُفتش ليه ؟ .

بخبيث .

علاء : إنها إيه سبب القرار المفاجئ إنك تيجى مصر يا نوال ؟! .

نوال : أنا أخذت قرار السفر من ألمانيا في نص ساعة .. لميت اللي
قدرت ألمه وجريت على المطار أنا والأولاد .. مالقيناش غير
تذكرة واحدة في الطائرة اللي طالعة ديركت للقاهرة ..
حجزتلهم في الطائرة اللي بعدها .

كمال : وإيه سبب الربة دي كلها؟! ..

نوال : أكتشفت بعد عشرين سنة في الغربة إن أحنا مهها عملنا عمرنا
ما حناخد ولا ح يدولنا أكثر من اللي هما عاوزين يدوهولنا !
حماده خارجاً بحقييته وإيناس خارجة بحقيبتها وكل منهما في قمة الغضب والثورة
وهيثم .

حقيقية حماده تفتح وتسقط منها الهدوم بعد حشوها بها .. إنه حتى لا يستطيع أن يجهز
حقيته دون مساعدة ماما نونا وهي تتوسل لنوال أن تتمسك بقاء حمادة في البيت .

نونسا : لو ليا عندك معزة .. لو أنا غالية عليكى يا نوال .. توافقينى
على الطلب ده .. ده حماده مالوش حس .. هو بينزل من
صباحية ربنا .. وما بيعجيش غير ع النومه .

نوال : إنتى بتقولى إيه يا ماما نونا .. يقعد فين بس .. ده راجل
متجوز .

نونسا : ده إيناس ست، طيبة وأميرة يا نوال والنبي .. أهم يقعدوا في أى
أوضة البيت كبير ويساع الكل .

نوال : أقعد واحدة غريبة إزاي بس يا ماما؟! ..

حماده نازلاً وإيناس خلفه وفي يد حماده حقيبة وإيناس أيضاً .

حماده أثناء نزوله على السلم .

مغلولاً يوجه كلامه إلى نوال ..

حماده : أسمعى .. أنا أخذت شوية حاجات .. وحاجى بكرة آخذ

الباقى .. والأوضة بتاعتى لو سمحتى محدش يفتحها ولا

يلعب بالحاجات اللي فيها .. عشان ده شغل .. بعد إذتك يعنى

نوال : حاضر! ..

حماده : أنا حتى .. مش حآجى .. ح أبعت لك عم سيد اللي شغال
عندى فى المحل بعربية نص نقل .. أبأى أديله الحاجة لو
سمحتى .

نوال : حاضر .

حماده : آه .. فيه قطر مفكوك .. ومحطوط على الترابيزة .. لو سمحتى
محدث يلمسه عشان ده مفكوك بطريقة معينة .. يعنى محدش
من الولاد يعلب بيه .

نوال : أنا ولادى ما بيلعبوش يا حماده .

حماده : ياللا يا ماما؟! .

تهم بالقيام .

نوننا : حاضر يا حماده .

نوال : ماما نونا مش ح تتنقل من البيت ده ! .

حماده : ياللا مش ناقصين ذل ولا معايرة من حد يا ماما .

كمال : ما يصحش اللي بتقوله ده يا حماده

نوننا : معلش يا نوال .. أنا ح أروح أقعد مع حماده كام يوم كده ..

وح أجيلك .

نوال : لأ يا ماما نونا .. أنتى ح تقعدى معايا هنا .. طلع الشنطة يا

كمال .. الأستاذ حماده لما يباة يحب يزورك فى أى وقت أهلاً

وسهلاً بيه .

نوننا : بس يا جماعة .

كمال يأخذ الشنطة .

كمال : خلاص بأة يا ماما نونا !

نظرات متبادلة بين نونا وحماده .

نظرة من ماما نونا بمعنى .. ح تسيبنى يا حماده .. تتوسل له ألا يتركها .

نظرة من حماده وهو فى قمة الحيرة

ثم نظرة من ماما نونا .. تتكلف فيها الإبتسام لكي لا يحمل همها .. تحاول أن تقول له
أنها سعيدة هنا .. ثم حماده يومئ لها برأسه بأن خليكى هنا .. وهى فى قمة الحيرة .
نونا تقوم فى إتجاه إيناس .

نوننا : يا إيناس .

إيناس : نعم يا ماما .

نوننا تهمس لها .

نوننا : أنوسة .. حماده أمانة فى رقبتك .. تاخدى بالك منه .

إيناس : فى عينيا يا ماما .

نوننا : أبأى شقرى عليه بالليل وهو نايم .. أحسن على طول بيزق

الغطا برجليه يوقعه .. وأوعى تنزليه من غير فطار أحسن ده

بينسى نفسه .

مبتسمة .

إيناس : حاضر يا ماما .

نوننا تعانقه وكأنه مسافر .

نوننا : مع السلامة يا حبيبى .. على مهلك وإنت سايق .. لا إله إلا

الله .

علاء يبتسم .. ثم يكتفم إبتسامته .

حماده : محمد رسول الله .

يهمس لكمال .

علاء : ده ولا كأنه طالع الحجاز .

ماما نونا تذهب وتنظر من النافذة على حماده وإيناس والحقائب معهم وهيشم .. حتى

يركبوا السيارة وتمضى بهم ويمكن أن نصور هذا المشهد من وجهتى النظر .

يمكن أن تفتح شنطة حماده مرة ثانية .

كمال : قلب الأم بأه .

علاء : وقلب ماما نونا حالة خاصة جداً .

نوال : لا .. ده مريض .. مريض بجد .. مش ممكن راجل فى سنه
ولسه متدلح كده .. ده ولا كإنى غبت عشرين سنة .. الناس
بتكبر وده بيصغر .

علاء : جالك كلامى يا نوال مش ده اللى كنت بأقولهولك

نوال : واللى بيتجوزوه دول .. بيتجوزوه على إيه .

علاء : ده لقيه .. فيه واحدة تلاقى واحد زى ده وتسيبه ؟

علاء ينهض واقفاً .

نوال : إيه .. على فين ؟!

علاء : طيب أنا ح أمشى أنا كمان .. مش جاى يا كمال ؟!

كمال : لأ .. أنا ح أقعد شوية مع نوال وماما نونا عشان أشوف الولاد
كمان .

علاء : طيب بعد إذنكوا .. حمد الله ع السلامة يا نوال .. أبأة أجى
أشوفهم بكرة إن شاء الله .

يخرج .

ماما نونا تعود ثم تجلس وتمسح دموعها بمنديل .

نوال : إيه بس يا ماما نونا بتعطى ليه هو مهاجر .. مش رايح مع
مراته لبيته .. مش ده الطبيعى ؟

نوننا : مش عارفة ح أعيش إزاي من غيره يا نوال .. ما أعودتش إنه
يبأة بعيد عنى .

وهى تمسح دموعها .

ويأتى أولاد نوال الذين تربوا فى المانيا .. فكيف أستقبلتهم ماما نونا .

جرس الباب .. كمال يفتح الباب لنجد هشام وعصام وإمام ١٨ سنة ، ١٢ سنة ، ٦
سنوات .. يرتدون ملابس نظيفة ومكوية .. يبدون كأبناء الأمراء يبدو عليهم الالتزام
الشديد .

كمال : حمد الله ع السلامة يا ولاد .. إيه الشطارة دى .. لأ .. ما شاء
الله .. كبرنا قوى .. أزيك يا عصام .

هشام : أنا هشام يا أونكل .
كمال : أمال فين عصام .
عصام : أنا يا أونكل .
كمال : يباة أنت إمام باة .. هات بوسة يا وحش .. يا نوال .. الولاد
جم .!

كمال يحمل إمام ويقبله .
ماما نونا .. خارجة من الصالون .. تمد ذراعيها لهم .
نوننا : تعالوا في حضنى .. تعالوا .. أنا مين ؟!
الجميع : ماما نونا .
نوال : شفتى باة أن صيتك وصل ألمانيا يا ماما نونا
نوننا : إيه يا ولاد الطعامة دى .. لأ .. دى حلوة مش ألمانى خالص ..
دول كلهم عزو .. مناخير عزو وعينين عزو بالظبط .. الواد
إمام ده طالع لعمك الله يرحمه أبو حماده .

بأوامر صارمة .

نوال : ياللا يا ولاد .. أطلعوا غيروا هدموكمم .. وخذوا شاور .. كل
واحد يرتب أوضته كده ويطلع هدموه يحطها في الدولاب ..
بسرعة

هشام : أوكيه يا ماما .

يطلعون بانتظام ونوال ترمقهم بسعادة

نوننا : ربنا يخليهم لك ويفرحك بيهم .. أستنى دول حظهم حلو ..
أنا شاوية بطاطا .. ح تعجبهم قوى .. أما أروح أسخنها لهم .
وكانت أول ليلة بيت فيها حماده .. خارج البيت بعيداً عن حضن ماما نونا .
ماما نونا جالسة على السرير لا تستطيع النوم من فرط القلق .
تتنهد في أسى .. نسمع صوت تفكيرها

ص. نونا : البيت وحش من غيرك يا حماده .. يا ترى إنست عامل إيه

دلوقتي يا حبيبي .. ربنا يهديكى ليه يا إيناس ويحط الحنية في

قلبك .. والنبي يا رب تحفظه وتبعد عنه كل شر وتحبب فيه خلقه.

ثم يفاجئ الجميع في الصباح بإختفاء ماما نونا .. لم تطق صبراً .. ذهبت إلى حيث حماده مقيم .. مع إيناس .

حماده نائماً أمام التلفزيون على الكنبه في الريسبشن والتلفزيون شغال .. تتحرك الكاميرا إلى حجرة النوم وإيناس نائمة .. جرس الباب .. إيناس تستيقظ بصعوبة وبعصبية .

إيناس : يووووه .

تقوم في ضيق لتجد حماده نائماً في الصالة وقد وضع المخدة فوق رأسه لكي لا يسمع جرس الباب .

إيناس : إيه يا حماده .. كل ده ومش سامع وسايب التلفزيون شغال طول الليل .

تغلق التلفزيون .. ثم تتجه نحو الباب وهي تصرخ في غلظة .

إيناس : حاضر حاضر .. قلت حاضر .. إيه قلة الذوق دى

تفتح الباب لتجد ماما نونا وفي يدها ضوان وطعام وأشياء .

إيناس : ماما نونا !! . معلىش أنا آسفة .

نوننا : إمسكى منى يا أنوسه .. الصينية ولعت إيدى .. أصلى لسه

مطلعاهامن الفرن حالاً .. عاملالكوا فطيرة ح تاكلوا

صوابعكوا وراها .

نوننا تدخل لتجد حماده نائماً .. تقترب منه .. وإيناس تأخذ الأشياء إلى المطبخ .

نوننا : إنتى نايمه يا طعمة .. إنتى لسه نايمه يا كميلة .. قوم يا حماده .

حماده : ماما نونا .

نوننا : إيه اللى نيمك على الكنبه يا حماده .. دى تقسم الظهر ! .

حماده : أصل جوه مفيش تلفزيون .. وإنتى عارفة أنا ما بانامش إلا

على التلفزيون .

نوننا : آه .. كانت مستخبيالك فين الشحططة دى .. أصبر .. هما كام يوم .. ونوال بنفسها ح تيجى تقولك تعالى يا حماده إنت ومراتك

حماده : ما تجيبيليش سيرتها .. أنا مش طايقها .

تدخل إيناس وقد وضعت الفطير والعسل والجبنة فى صينية .

إيناس : ماما نونا جايبالك فطير معتبر .

نوننا : والنبي أبدأ .. ده أنا جايباهولك إنتى عشان عارفة إنك بتحبيه

إيناس : لا ما هو البيه ودانى محل حلويات إمبراح وكلت قد كده ..

مش ناقصة تُخن ده أنا باعمل ريجيم .. البيت بيتكوا يا ماما نونا

.. أنا لازم أدخل أنام شوية أحسن دماغى ح تتفرتك ولازم

أروح المحل أفتح الساعة ١٢ .

نوننا : نوم العوافى يا حبيبتى .. إلا بأقولك يا أنوسه .. ما تدخلوا

التليفزيون ده جوه أوضة النوم .. الدنيا برد .. والصالة عندكوا

رطبة قوى .

وقد فهمت .

إيناس : حاضر .. عينيا يا ماما نونا .

تدخل إلى حجرة النوم .

نوننا : خد بأه معلقة العسل دى عشان دى اللى فيها الفائدة.

حماده : يا ماما .. أنا عندى السكر .

تعطيه المعلقة .

نوننا : ده عسل أبيض شفا .. ده علاج للسكر .. كل ياخويا .. مطرح

ما يسرى يمرى .. ده عسل أول قطعة .

حماده نائماً .. ونونا تغطيه .. إيناس تقوم لتجده نائماً .. ونونا تحسس له على شعره .

إيناس : إيه ده هو نام تانى يا ماما نونا ؟ .

هامسة .

نوننا : كويس اللى نام .. يريح جتته شوية .. النوم حلو .. والنبي يا

أنوسه ناولينى الشلت دى .

تناولها الشلت .

- إيناس : ليه يا ماما نونا ؟ .
نونا : أحسن يتقلب يقع من على الكنبه .. أهو يلاقى حاجة طرية تحت منه .
إيناس : طيب ما يخش ينام جوه فى السرير .. أنا خلاص قمت .
نونا : لأ .. خليه .. ده أنا ما باصدق إنه بينام .. تعرفى لو صحى .. يقعد بأه مش عارف ينام طول اليوم .. إوعى تزعلى يا أنوسه من نوال .. أنا عارفة إن كلامها كان ناشف .
إيناس : أنا مش عارفة عملت معايا كده ليه .. دى أول مرة أشوفها ! .
نونا : أصل الواد علاء أخوها كان موقع بينها وبين حماده وماليها من ناحيته .
إيناس : طيب وأنا ذنبى إيه ؟ ! .

ضحكة .

- نونا : غيرة بنات بأه .
إيناس : غيرة من إيه بس يا ماما نونا .. هوه أنا أخذت منها حماده ولا حاجة ؟ ! .
نونا : ما هى أصل نوال كانت حاظة عينها عليه وهما صغيرين .. ده تاريخ قديم .
إيناس : هى نوال بتشتغل إيه يا ماما نونا ؟ .

.....

ماما نونا مندهشة من إعتقاد الجيل الجديد على نفسه .. ومن تربية نوال الحازمة لأولادها .

نونا نائمة فى حجرتها .. تدخل نوال لتوقظها .

نوال : ماما نونا .. ماما نونا ! .

تنهض .

نونا : أيوه يا حبيبتي .. قايمة أهوه .. هى الساعة كام دلوقت ! .

- نوال : الساعة خمسة .
- نوننا : يا لهوى .. الساعة خمسة العصر .. معلىش راحت عليًا نومة ..
حالا أقوم أحضرلكوا الغدا .
- نوال : غدا إيه يا ماما نونا .. الغدا جاهز وع السفره
- نوننا : ومين اللي عمل الغدا .
- نوال : الولاد .
- نوننا : أزاى يا نوال .. شوية عيال يخشوا المطبخ .. ويولعوا البوتاجاز
.. أنتى قلبك جامد كده ليه ؟
- نوال : يا ماما نونا .. ولادى بيعملوا كل حاجة .. أتعودوا على كده ..
البنى آدم لازم يعرف يأكل نفسه .. يغسل الطبق اللي أكل فيه
.. ينضف المكان اللي عايش فيه .. الناس كلها فى أوروبا كده
.. وأنتى بأة إيه اللي نزلك من الفجر كده .. زوجتى روحتى
فين ؟
- نوننا : روحت أطل على حماده .
- نوال : تطفى عليه .. ليه .. هو فى الحضانه .
- ضحكة .
- نوال : والله أنتى عليكى حاجات يا ماما نونا .. ياللا .. ياللا عشان
عاوزين ناكل .
- تخرجان من الحجرة .
- السفرة مُعدة بشكل أنيق للغاية .. والأولاد يروحون ويحيئون يحملون الأطباق ..
والحلل .. ويقومون بالخدمة على المائدة .
- نوال : أقعدى يا ماما نونا .!
- نوننا : ياختى حرام عليكى .. هما بينفذوا حُكم .. ده ولا الأشغال
الشاقة .
- هشام : دوقى بأة يا ماما نونا الشورية دى وقوليلى رأيك .. انا اللي
عامل الشورية .

يدخل إمام الصغير بطبق السلطة .

إمام : السلطة يا تيتا .!

نوننا : حتى إنت يا إمام مشغلينك .. ربنا يحرسك ويحميك يا حبيبي

عصام يقدم طبقاً با خضروات .

عصام : الخضار يا تيتا .. الطبق ده بأة لازم تخلصيه كله .. ده خُضار

سوتيه .. معمول بالبُخار .

نوننا : يا حلاوة .. بالبُخار .. إزاي يا عصام ؟!

عصام : حلة مية بتغلى بيطلع منها البخار ومصفة فوق الحلة فيها

الخضار متقطع حتت صغيرة .. كُلى بس وقولى لى رأيك ؟!

نوننا تتذوق الشوربة .

نوننا : إيه ده ؟!

هشام : إيه مالها .. الشوربة ما عجبتكيش ؟!

نوننا : يا خويا عادم قوى إنت مش حاطط ملح .

هشام : ملح .. لأ طبعاً .. حاطط لمون .

نوننا : وماها خفيفة كده ليه ؟!

هشام : أصل أنا شايل الفاتس يا ماما نوننا .

نوننا : شايل إيه يا حبيبي .!

نوال : الدهون يا ماما نوننا .

نوننا : وهو الأكل بيآله طعم من غير ما الدهن يكون على وش

الشوربة .

نوال : دى شوربة صحية يا ماما نوننا .. فيه حاجتين أتمنعوا خالص

من برة دلوقت .. السكر والملح

نوننا : آمال الناس تاكل إزاي .. لا .. سيونى أنا أعملكوا أكلة

تاكلوا صوابعكوا وراها .

نوال : لا والنبي .. أحنا مش عاوزين ناكل صوابعنا .. خلينا ماشيين

على الأكل الصحى ده .. عشان إنتى كمان صحتك مش

عاجبانى .

نوننا : ده جدك الله يرحمه .. كان ياكل ساندوتش الزبدة وعليها
السكر .. ياكل منها أربع أرغفة .. وعاش ٩٠ سنة .
نوال : أيام جدى الله يرحمه ما كانش لسه الأمراض طلعت .

طرق على الباب .. جرس .

نوننا : حاضر .. أنا جاية أفتح أهوه .!

نوال : رايحة فين يا ماما نونا .. أصبرى .. أفتح يا عصام .

عصام يجرى ليفتح الباب لتأتى فوزية

فوزية تدخل .

نوننا : تعالى يا فوزية .. حماك بتحبك .. تعالى كلى معانا .. ده أكل
صحى .!

فوزية : أزيك يا ماما نونا .. إيه ده .. نوال .. حمد الله ع السلامة .!

نوال : أزيك يا فوزية .. وأزى الولاد .

فوزية : الحمد لله كويسين .

نوننا : أيه مالك يا فوزية .

فوزية : أمال فين حماده .

نوننا : حماده .. حماده قاعد فى شقته .

فوزية : هو له مكان يقعد فيه غير ده .

نوننا : فيه إيه يا فوزية .

فوزية : أنا عاوزة أتكلم معاكى يا ماما نونا وكويس إن نوال موجودة

عشان تباة شاهدة ع الكلام .

نوال : بعد ما تخلصوا أكل .. تشيلو السفرة وسيبو أكل ماما نونا ..

عشان لسه ما كملتش أكلها

نوننا : لأ يا حبيبتى .. أنا شبعت خلاص .. الحمد لله .

عصام : أحنا خلصنا أكل يا ماما .

نوال : طيب .. شيلوا الأطباق وودوها المطبخ .

نونا ونوال وفوزية يجلسن فى كورنر من الرسيشن .

- نوننا : إيه يا فوزية اللي حصل .. مالك؟! .!
- فوزية : حسام يا ماما نونا أتقل جنوب سينا راح شرم الشيخ .
- نوننا : يا لهوى .. وليه الشحطة دى .. ما يكلم حماه سيادة اللواء
يتوسط له ويقعده هنا .
- فوزية : سيادة اللواء هو اللي وافق له ع النقل .. لأن حسام هو اللي
طلب يتقل .. عارفة ليه يا ماما نونا .. عارفة مين السبب؟ .
- نوننا : مين يا فوزية .
- فوزية : حماده .
- نوال : حماده .. وحماده إيه دخله بنقل حسام .
- فوزية : سيادة اللواء جاب ملفه وتاريخه الأسود .. البيه أتجوز خمس
مرات .. ثلاثة رسمى وإثنين عرفى وعليه ديون ح توديه
السجن .
- نوال : ما تقوليش كده يا فوزية .. الديون اللي على حماده أتدفت ..
حماده ما عليهوش مليم يا فوزية .
- فوزية : ومين بأة اللي دفعهاله .. مراته الجديدة .
- نوننا : أهى أتدفت وخلص .
- فوزية : والبيه أتجوز مرتين عرفى يا ماما نونا .. أتجوز واحدة رقاصة .
نوننا تصمت شاعرة بالذنب .
- نوننا : أهى غلطة وصلحها وكل واحد راح لحاله ؟
- نوال : هى كام غلطة .. ده حماده مقضى حياته كلها غلطات .. هو
مفيش حد قادر يقف قصاده .
- نوننا : والنبي يا نوال ما له ذنب .. هى البنت الرقاصة دى اللي لفت
عليه كام يوم .. وقالت له إنها ح تبطل .
- فوزية : أنتى لسه بتدافعى عنه يا ماما نونا .. ده راجل دمر حياة ابنه ..
حسام كان بيعحب ميرفت .. وكان مستريح فى شغله .. حسام
طفش .!

نوننا : إذا كان سيادة اللواء زعلان من حماده أنا أروح له وأكلمه يا فوزية .. حماده أتعدل خالص عن زمان .. وربنا هداه .
نوال : أنتى لسه ح تلمى وراه يا ماما نونا .!

جرس الباب .

نوال : شوف مين يا إمام ؟!

إمام يجرى ويفتح الباب لنجد أمامه عيشة .

عيشة : الست نونا موجودة ؟!

إمام : أيوه .. نقولها مين ؟!

عيشة : عيشة .!

إمام : تيتا نونا .. واحدة إسمها عيشة عاوزاكي .!

نوننا : تعالى يا عيشة .. هوه إنتى غريبة .. ماتحشى يابت إنتى .!

فوزية : أدي تانى ضحية من ضحايا حماده .. ضرتى جات .

عيشة تدخل .. فى خجل .

عيشة : لا مؤاخذة أنى جيت على غفلة كده يا ست نونا .. ست فوزية

.. أزي حضرتك .!

فوزية : إزيك يا عيشة .

نوال : إيه مش عارفانى يا عيشة .!

عيشة تنظر نحو نوال .

تقبلها قبلات كثيرة .

عيشة : معقولة .. الست نوال .. ألف حمد الله ع السلامة .! . ده البيت

نور والنبي .

طيب .. أسيبكوا بأة .. أنا طبيت عليكوا كده زى القضا

المستعجل .. أنا ح أستنى ماما نونا عشان بس كنت عاوزاها فى

حكاية كده .!

نوال : تمشى تروحي فىن يا عيشة .. أقعدى .. أقعدى معنا هنا .!

فوزية : أيوه .. أقعدى يا عيشة .. أنا قايمة علطول .. بس فيه حاجة
عاوزه أقولها لك يا ماما نونا قبل ما أمشى .. وح أتكلم قدام
عيشة .. ما أحنا خلاص بقينا أهل .. مفيش حد غريب .. أنا
جاية علشان أقولك حاجة واحدة بس .. وكويس إن نوال
موجودة عشان تباة شاهدة على اللي ح أقوله .. حسام إبنى
طفش خلاص وساب له البلد باللى فيها .. أنا مش عاوزاه
يطفش لى داليا كمان .. قوليله يبعد عننا خالص
نوننا : وده كلام اللى بتقوليه ده يا فوزية .. عاوزه تحرمى أب من
ولاده .!

صارخة .

فوزية : أنا قلت لك وخلاص .. أحنا نسينا إن لهم أب هو كمان ينسى
إن له ولاد .. سلاموا عليكموا .. بعد إذتك يا نوال .
فوزية تمضى غاضبة نحو الباب .
نوال : إستنى يا فوزية .. ما يصحش كده .!
نوال وراءها .

نوال : مفيش حاجة تتاخذ بالعصبية دى ؟!

تحتلى فوزية بها من الباب .. ويتها مسان

فوزية : شوفى يا نوال أنا قاعدة وماسكة نفسى ومش عاوزه أضايقها
.. الست دى هى السبب فى اللى حصل لنا ده كله .. محدش
وصلنا لكده غيرها .. وأنا أحتراماً لسنها مارضيتش أواجهها
بالجُرم اللى هى عملته .

نوال : معلش .. معلش يا فوزية .. مش كده .!

كورنر نونا وعيشة .

نونا جالسة وهى فى قمة الحزن وقد أحست بأنها أهينت .. عيناها مغرورقتان بالدموع
.. وعيشة بجوارها

عيسشة : معلش يا ست نونا .. هى الست فوزية عصبية كده إنها طيبة .

نوننا : خلاص يا عيشة .. الظاهر إن أحنا كبرنا وبنتهزأ .. ما بالناش
قيمة .!.

عيشة : ما تقوليش كده يا ست نونا .!.

نوال تعود .

نوال : إزيك يا عيشة .. لسه زى ما أنتى ما عجزتيش

عيشة : العجز جوه البنى آدم يا ست نوال مش براه

نوال : ليه إنتى روخرة .!.

عيشة : إبراهيم .

نوال : طفش هوه كمان زى حسام .

عيشة : طفشان علطول يا ست نوال .. وبيبات بالليلتين والتلاتة بره

.. وما عدتش قادرة عليه .. لازم سى حماده يبجى يشخط فيه

شخطة ولا يعقله

نوال : أستنى يا عيشة .. أنا عاوزة أسألك سؤال يا ماما نونا .. لما

حماده سايب ولاده كده اللي طفشان والى ح يطفش .. أمال

حماده بيعمل إيه فى حياته .!.

إن حمادة لا يفعل شيئاً سوى اللعب .. حتى علاقاته بالآخرين الذين يتعامل معهم ..

ما هم بالنسبة له إلا مجرد لعب كبيرة وتعود نوال إلى بيتها بعد يوم عمل شاق فى مركز

الطاقة الذرية .

نوال تدخل لتجد هيصة فظيعة .. وهم يصرخون أولادها وحماده وعم سيد .

نوال : (صارخة) .. فيه إيه ؟. إيه اللي بيحصل هنا ؟!.

الأولاد ما أن يرونها .. يرتجفون من الرعب وعصام يلقي بريموت البلاى ستيشن .

نوال : أنتوا لسه ما غيرتوش هدومكوا .! وطبعاً لا إتغديتوا ولا

بدأتوا مذاكرة .. مش كده .. أتفضلوا .. كل واحد على أوضته

.. ياللا .!.

خارجاً .

عم سيد : طيب أسبق أنا بأة يا حماده بيه .. أنا مستنيك برة فى العربية .

حماده : أنا جاى معاك يا عم سيد .

نوال : أستنى إنت يا أستاذ حماده .. عاوزاك .

حماده يتوقف .. بزهق .

حماده : نعم .!

نوال : أظن اللى حصل ده مايصحش .. ولا يمكن أقبله أبداً .

بإقتضاب وإستهانة .

حماده : هوه إيه اللى حصل .. أنا جاى أخذ حاجتى وأمشى

تشير الى آثار أقدام العمال .

نوال : واللى جاى ياخذ حاجته وماشى يخللى البيت مداس كده لكل

واحد .. العمال اللى عندك يخشوا البيت ويدوسوه .. وجزمهم

مش نضيفه وأدخل ألاقك عمال تعطل ولادى وبتلاعبهم ..

أولاً دول مش أطفال يا أستاذ حماده .. ثانياً ...

يقاطعها .

حماده : أنا ما قولتلهمش يلعبوا معايا .. هما اللى جم لوحدهم .!

نوال : ما هى دى ح يتعاقبوا عليها .

نوننا : والنبي دول حبوا بعض قوى يا نوال .. فيها إيه يعنى لما الولاد

يلعبوا شوية مع خالهم .

نوال : الأستاذ حماده مش خالهم يا ماما نونا .

حماده : أنا عموماً ما كنتش جى لهم .. أنا جاى أشوف ماما نونا .. وأنا

من حقى أجبى أشوفها فى أى وقت .!

نوال : لأ .. مش فى أى وقت .. تتكلم وتقول إنك جاى .. تستأذن .

حماده : ح أستأذن عشان أشوف ماما .. ده اللى ناقص .

نوال : وأنت اللى جايب التورته دى معاك .

نوننا : لا والنبي .. ده أنا نفسى راحت لها .. قلت أعملها يا نوال .

نوال : وإزاي تعملى كده يا ماما نونا .. أنتى عندك السكر وأنا قايلة

الحاجات دى ماتدخلش البيت

حماده : لا .. أنتى ذوتيهها قوى .. أنتى ح تتحكمى فى أكلنا وشربنا
كمان .

نوننا : أنا عارفة أنا بأعمل إيه كويس .. أنا خايضة على صحتها ..
الكوليسترول على عندها والدهون الثلاثية

حماده : والله دى أمى أنا .. مش ح تخافى عليها أكثر منى .

نوال : (بعنف) بتخاف عليها قوى .. وأدى النتيجة .. أسمع يا حماده
.. أنا بحاول أنى ما أحتكش بيبك من ساعة ما جيت .. أنت
تصرفاتك كلها غلط .. ومش من النهاردة بس .. طول عمرك
مُستهتر .. وعمرك ما كنت متحمل للمسئولية فى حياتك .

حماده : أنا حُر ..!

نوال : أنت حُر فى نفسك .. أنها جوه البيت أنت مش حُر .

نوننا : أهدى بس يا نوال ؟!

نوال : لا يا ماما .. لازم حماده يعرف حدوده كويس .. لازم يعرف أنه
طول عمره ماشى غلط .. من أيام جدى الله يرحمه وأنتوا
كلكوا كنتوا بتطبطبوا عليه .. كفاية بأة .. أنت لسه فاكِر
نفسك إيه .. نُغة .. أنت عندك ستين سنة .. بص لنفسك فى
المرايا .. عاوز تقضى على نفسك أقضى نفسك بعيد عننا .. أنها
ماما نونا لأ .

الأولاد ينظرون من فوق على السلم .

نوال : أنتوا واقفين بتبصوا على إيه .. أنجروا على أوضكوا

الأولاد يدخلون فى رعب .. وحماده قد أسقط يده تماماً ولا يستطيع الرد .

نوال : أسمع يا حماده .. البيت ده ما بأش زى ما كان الأول .. هنا فيه
مواعيد .. فيه إنضباط .. فيه نظام ..!

حماده : ولما فيه نظام .. شلتوا ليه القطر من مكانه .

نوال : قطر .. قطر إيه ؟ . ده ح يجننى .. أنا بأقولك إيه وأنت بتقول
إيه ؟ . أنت باين عليك مش فى الدنيا خالص .. ده أنا لو بكلم

إمام إبنى كان فهم .. أسمع يا حماده .. الزيارات هنا يوم الجمعة والسبت بس .. يوم الجمعة من بعد الصلاة للساعة ٨ مساءً .. مفتوحة الزيارة .. يوم السبت .. آخر ميعاد الساعة خمسة عشان صابح شغل ومدارس .. بالنسبة للتليفونات .. مسموح لك تظمن على ماما نونا مرة واحدة فى اليوم الصبح بس .. مفيش مكالمات بالليل .. وحسك عينك فى الزيارة تجيب أى حلويات ولا تورتات لماما نونا .. ولا أى أكل من برة .. وبالنسبة لولادى مفيش كلام بينك وبينهم خالص أثناء الزيارة .. مفهوم .

حمادة يهم بالحديث .. ولكن نوال تحسم الموقف .

نوال : المقابلة إنتهت .!

حماده يخرج ويصفع الباب وراءه بعنف .

نوال تجرى وتفتح الباب وهى تصرخ فيه .

نوال : الباب يتقفل بشويش .. ده مش باب زربية .

تلتفت لتجد ماما نونا فى قمة الحزن .

نوال : أنا آسفة يا ماما نونا .. كان لازم أقوله كده .. أنا بأكلمه

لمصلحته ولمصلحتك إنتى كمان .

ويعود حمادة لبيت إيناس والعمال يدخلون الكراتين داخل البيت وحماده بينهم .

تدخل إيناس تفاجأ بالكراتين التى بها اللعب .

إيناس : إيه ده .. إيه الحاجات دى يا حماده .

حماده : دى حاجتى .. روحت جبتها من عند ماما نونا .

إيناس : وح تسيبها هنا .

حماده : أيوه .. أنا البيت اللى هناك ده قطعت علاقتى بيه خالص .

إيناس : أنت إتخانقت مع نوال بنت عمك .

حماده : أتخانقت .. ده أنا بهدلتها .. صوتى كان جايب آخر المعادى .

إيناس : إيه اللي حصل !؟

حماده : مفيش .. لقيتها داخلة لاوية بوزها .. أنا شفت وشها من هنا
وركبنى ميت عفريت .. وإديتهم لها بأة .. قلت لها أسمعى ..
أنتى لازم تعرفى حدودك كويس قوى .. وتتكلمى معايا بأدب
وأنتى باصة فى الأرض كمان .

إيناس : وسكتت .!

حماده : مقدرتش تفتح بئقها .. قلت لها بصى لنفسك فى المرايا .. أنتى
فاكرة نفسك إيه ؟. أنتى باين عليكى مش عايشة فى الدنيا
خالص .. ولو مش عارفة حماده يباة إيه بالظبط أنا أعرفك ..
أنا من حقى أزور ماما نونا فى أى وقت .. يوم الجمعة والسبت
.. والسبت ح أمشى بدرى عشان عندى شغل تانى يوم ..
وحسك عينك ألقى ماما نونا بتاكل تورتة ولا حلويات .

إيناس : وإيه اللي جاب موضوع التورتة والحلويات .

حماده : روحت لقيتها جايبه تورتة آيس كريم .. وبتاكل .. الدكتور
مخرج على ماما نونا زى ما إنتى عارفة إنها تاكل حلويات ..
مش واخدة بالها من ماما نونا .. أنا شفت ده إتجننت .!

إيناس : طيب أهدا بس يا حماده .. العصبية وحشة علشانك .

حماده : لا .. ده أنا هديت كمان .. أنا كنت هناك طايح

يطرق الباب .. وعلى الباب إيناس تفتح لتجد ماما نونا أتت ملهوفة على حمادة كالعادة

إيناس : ماما نونا .. أتفضلى .

نوننا : حماده هنا .

إيناس : أيوه يا ماما .. أتفضلى .

نوننا : هو كويس .

إيناس : لا .. كويس قوى .. هدى خالص .. تعالى .. دى ماما نونا يا

حماده .

نوننا ترى حماده .

نوننا : أوعى تزعل يا حماده من نوال .. أنا عارفة إنها زودتها شوية .
حماده : زودتها إيه .. هي نطقت .!
نوننا : والله يا إيناس أنا كنت واقفة مش عارفة أقول إيه ؟ . كنت
حاسة أن ح يحصل لى حاجة .. أنا مش عارفة إيه اللى يحصل
لها بس لما بتشوف حماده .. دى شافته من هنا ومترليوز أتفتح
ياختى ..

حماده : هي اللى أتفتحت .. ده أنا اللى ...
نوننا : قعدت تشخط فيه وكان بينهم تار بايت ..
حماده : مين دى اللى تشخط فيا .. ده أنا ..
نوننا : أنت إيه ؟ . ده أنت طيب وغلبان .. والنبي يا إيناس ده هو يا
حبة قلبى .. قعد واقف الجدع اللى ما فتح بُّقه .
حماده : لا يا ماما .. هوه أنا سكت لها .. ما أنا رديت عليها .!
نوننا : لا والنبي ما رديت عليها ولا جرحتها بكلمة .. علشان مؤدب
.. تربيتى .. ده أنا بعد ما مشى .. مسكتها وهزأتها .. قلت لها
هو حماده صغير علشان تكلميه كده .

حماده : (مغتاظاً) .. يا ماما .
نوننا : قال إيه عاوزاه يدخل بمواعيد ويخرج بمواعيد .. حد برضة
يقول كده .. هوه حماده غريب .. ده بيته .. على آخر الزمن
تقوللى يستأذن قبل ما ييجى جمعة وسبت .. البت دى ما كانتش
كده قبل ما تسافر .

إيناس تبتسم فى حُبث .

إيناس : الله .. أمال إيه يا حماده اللى أنت قولتهولى .. أنت كنت بتحلم .
حماده : يا ماما .. مش أنا زعقت لها .. بدمتك .. هو إيه اللى عصبها ..
مش لما شخبطت فيها ؟ !.

نوننا : أنت بتعرف تشخط ولا تقسى على حد يا حماده .. هوه فيه
أحن منك .. أنا مش عاوزاك تشيل في نفسك ولا تزعل .. أنا
أخذت لك حقك تالت وملت .

حماده يجلس في آسى وقد إنكشف أمام إيناس التى تبتسم في حُبث .

إيناس : أنا قاعدة كده من الصبح ولا قدمت لك حاجة يا ماما نوننا ..
أسمعى .. أنا عندى تورتة شيكولاتة .. أجيب لك حته ..
ممكن يا حماده بعد أذنك .. ولا نكلم الدكتور نوال تدينا الإذن
حماده : لأ .. الشيكولاتة وحشة ع السكر .!

كم هى رائعة وبسيطة هذه السيدة .. إنها براءتها ودون أن تقصد تفضح كذب حماده
الطفولى أمام إيناس .!

إن كل مشكلة يقع فيها حماده يلجأ إلى ماما نوننا وحينها أراد أن يسافر إلى شرم الشيخ
مع إيناس ذهب إليها .. فوضعت يدها في صدرها وأخرجت رزمة مالية وأعطتها له
.. وحينها فشل في شرم في أن يدفع حساب الاوتيل .. فقط كلمها .. وألقى عليها
بهمومه .. وهى كالعادة .. تدخلت .. كلمت حسام .. أبته العنيف الذى لا يقف في
وجهه أحد .. ولكن .. بالنسبة لماما نوننا .. الأمر يختلف .. وكأن هذه السيدة .. قد
نومتهم جميعاً مغناطيسياً .. لا أحد يرفض لها طلباً .. لأن رصيدها من الحب بداخلهم
أكبر من كل شىء .

ويأتى حماده من شرم ليفاجأ بأن إيناس قد أخذت المحل .. وغيرت أسمه ومعالمه ..
ويُصدم حماده وينهار .. وعلى الفور من سيكلم ؟ . وهل يوجد غيرها .. ماما نوننا ..
طوق النجاة الوحيد .

الوقت عصراً وحماده وحده على الكورنيش بجواره الحقيبة ويبكى كالأطفال .. ثم
يجلس على الدكة وحده وهو لا يصدق، ما حدث .. تظهر صفحة النيل من وراءه ذهبية
اللون .. ولا أحد على الكورنيش .

تاكسى يقف .. وتنزل ماما نوننا .. مهرولة نحوه .. حينها يراها .. ينفجر في البكاء ..
تربت عليه .

حماده : طلقته .. النصابة المجرمة .!

نوننا : ربنا ينتقم منك يا إيناس .. وما تشوفي يوم حلو أبداً .. أهذا يا حماده .. ماتعملش كده .. فداك ستين محل .. بكرة يقعد لها في عينها وعافيتها .

حماده : أنا .. أنا ينضحك علياً كده يا ماما نونا .. في السن ده ؟! .
نوننا : في داهية المحل يا حماده .. المهم إنت .. عاوزنى أخسرك أنت يا ضنايا .. ولما يحصل لك حاجة دلوقت بيأه كويس .. تعالى ..
تعالى معايا

حماده : على فين يا ماما .
نوننا : على بيتك .
حماده : بيتى .. أنا ماليش بيت .
نوننا : مالكش بيت إزاي ؟ .

حماده : عاوزانى آجى معاكى عشان نوال تقعد تهزأ فياً يا ماما .!
نوننا : ما عاش اللى يهزأك ولا يمسك بكلمة .. ياللا يا حماده .. مش ح نفضل واقفين في الشارع كده نفرح الناس علياً .
حماده : معلش يا ماما .. أنا أول ما حصل اللى حصل لقيت نفسى مش عارف أفكر .. عشان كده كلمتك علطول .

نوننا : أمال ح تقول لمين يا حبيبي .. هو أنت ليك غيرى في الدنيا دى
حماده : روحى أنتى يا ماما نونا .. روحى .
نوننا : أروح وأسيبك .. أنت بتقول إيه ؟! .

ويذهب حمادة إلى سليمان صديقه الذى يعيش وحده .. ويتردد سليمان البخيل في أن يقبل حماده ليقيم معه ولكن تتدخل ماما نونا بعصاها السحرية كالعادة .
سليمان يقشر برتقالة واحدة .. بحرص شديد ثم يرن جرس الباب .. ينزعج .. يذهب إلى الباب .. بعد أن يغطى البرتقالة بطبق .

سليمان : مين ؟!
ص حماده : أنا حماده .. أفتح يا سليمان بيه .!
سليمان يفتح الباب فيجد حماده ويجواره حقييته .

سليمان : ده إيه المفاجأة الحلوة دى يا حماده .. أتفضل أتفضل .. إيه جايبلى إيه معاك من شرم .. كل دى هدايا .. تعبت نفسك ليه بس؟! .

حماده يدخل .. ويجلس فى الصلاة .

سليمان : أبوه يا سيدى جاى من شرم وشك مورد .. أسبوع غسل مع المدام وأنا هنا قاعد لوحدى زى قرد قطع بأكلم الحيطان .. والمدام إزيها .

حماده : ربنا يحرقها بجاز .!

سليمان : يحرق مين ؟ . أنت أتجننت يا حماده .

حماده : أنا خلاص .. سيبتها .. طلقته .

سليمان : طلقت إيناس .. أنت أتجوزتها فى إيه وح تطلقها فى إيه؟! . وطلقتها ليه؟! .

حماده : أهو اللى حصل .

سليمان : أوعى تكون طلعت كده ولا كده .. إنت عرفت عليها حاجة

حماده : ح أقولك يا سليمان بيه .. ح أحكيك كل حاجة .. بس أنا مش قادر أتكلم دلوقت .

حماده متردداً لا يعرف كيف يبدأ الكلام .

حماده : أنا .. أنا جاى و .. عاوز أطلب منك طلب .

سليمان : أوامر يا حماده .!

حماده : أنا .. عاوز أقعد معاك هنا لغاية ما أدبر أمورى .. لو ما كانش يضايقك يعنى .!

فى ضيق .

سليمان : نعم .!

حماده : مش أنت قلت لى إنك قاعد لوحدك .. أنا خلاص كمان بأيت لوحدى وآهو نسلى بعض .

سليمان : والله يا حماده أنا الحقيقة .. مش عارف أقولك إيه ؟ .

يرن تليفون المنزل .

سليمان : ثابته واحدة بس أرد على التليفون .

آلو .. نعم ..!

نوننا تكلم لسليمان .

نوننا : سليمان بيه .. أرجوك ما تقولش لحماده إن أنا اللي بأتكلم

دلوقت .. أنا عارفة أنه عندك .

سليمان يتحدث في التليفون إلى ماما نوننا دون أن يفصح لحمادة أنها هي .

سليمان : إزيك يا عبد الحفيظ .. أوامر يا عبد الحفيظ .

حماده يرمقه بنظره .. وقد شعر بالخجل وأحس أن سليمان ليس مرحباً بوجوده .

نوننا تكلم لسليمان .

نوننا : حماده أمانة في رقبتك يا سليمان بيه .. تحطه في عينك الأثنين ..

أنا عارفة أبني حساس قوى والكلمة الصغيرة تكسر نفسه ..

وأنا طول ما حماده عندك ما تشيلوش هم لا أنت ولا هو .. ح

أبعث لكوا الأكل علطول كل يوم إنتوا ما تعملوش أى حاجة

.. حتى هدومكواح أبأة أبعث السواق ناخدهم نغسلهم

ونكويهم هنا في البيت .. وبالنسبة لفواتير المية والكهربا والغاز

دول كلهم عندي يا سليمان بيه .

ويظهر خطر جديد على حماده عزو .. أبنه إبراهيم .. الذى عاش حياته كلها في فقر مع

أمه .. وفاض به ويذهب إلى أبيه في المحل لكي يهدده بالقتل .. وقد صار شرساً دمويّاً

.. ويصاب حماده بذعر وهلع فماذا يفعل ؟ . يكلم ماما نوننا .

حماده يكلم ماما نوننا .

نوننا : أجيلك يا ضنايا ؟ .

حماده : تيجي فين يا ماما بس .. بقولك الواد المجنون ده عاوز يقتلنى

.. ما أنا كلمت حسام .. ومش حسام بس .. أنا كلمت اللواء

إيهاب بنفسه .. أنا مش ح أسيب المحل ولا ح أفتح الباب إلا

لما يمسكوه .

نوننا تتحدث فى التليفون .

نوننا : أنت مادام سبيت سليمان .. تيجى تقعد هنا جنبى فى البيت ..
زى ما بقولك .. أمال أسيبك تنام على كنبه فى المكتب ..
مالكش دعوة بنوال .. أنا ح أكلمها .. وح أخليها هية بنفسها
اللى تطلبك وتقولك تيجى تقعد هنا .. ده بيتك يا حماده .. أنا
ح أكلم عم سيد ييجى يقعد معاك دلوقت .. مع السلامة .

تدخل نوال .

نوننا : يادى المصايب اللى نازلة ترف على دماغنا .. أستر يارب .!

نوال : إيه .. فيه إيه يا ماما نونا ؟!

نوننا : شفتى اللى حصل يا نوال .

نوال : إيه اللى حصل يا ماما نونا ؟!

نوننا : الواد إبراهيم .. عاوز يقتل أبوه .

نوال : مش ممكن .. إبراهيم لا يمكن يعمل كده .

نوننا : زى ما بقولك .. كلمه فى التليفون وقال له ح أقتلك

نوال : أنا ح أروح لإبراهيم وأكلمه .

نوننا : تروحيه إزاي يا قلبك يا نوال .. أحسن يضربك سكينه ولا

يخبطك بحاجه .. بقولك أتجنن .!

نوال : وإيه اللى خلاه يعمل كده ؟!

نوننا : أنا عارفة .. المهم دلوقت .. أحنا لا يمكن نسيب حماده .. لازم

نجيبه يقعد هنا معانا فى وسطينا .. عشان خاطرى يا نوال .. لو

ليا معزة عندك .. تكلميه .. عشان ييجى .

نوال : يا ماما .. أنا لما أعترضت إن حماده يقعد فى البيت كان أعتراضى

على إنه متجوز واحده غريبة ح تقعد معانا وهى بصراحة

ماكانتش عاجبانى .. وطلع كلامى صح فى الآخر .

نوننا : صح يا ختى .. أنها كلميه .. وغلاوتى عندك لتكلميه .. ح

أطلبهولك .

نونا تطلب حماده وتجبر نوال برقة شديدة على أن تدعو حمادة لكي يقيم في قصر عزو ..
ويعود حماده إلى قصر عزو .. بكارت من ماما نونا كالعادة ويعيش مع ماما نونا ومع
نوال .. ولكن بشروط نوال .

نوال واقفة .. وحماده جالساً وحقيبته بجواره .. ونونا واقفة .

نوال : أول شرط عشان تعيش معنا في البيت ده يا حماده الإلتزام ..

الإلتزام بالمعنى الحرفي للكلمة .. فيه هنا مواعيد نوم .. مواعيد
صُحيان .. مواعيد أكل .. لازم الكل يلتزم بيها .

حماده ينظر نحوها شذراً .

نونا : وماله .. هو الإلتزام وحش .. ده أنا حتى صحتي جت على

الإلتزام والنبي يا حماده .. ده أنت لو سمعت كلام نوال وشك
ح يورد كده والدم ح يجرى فيه .

نوال : الحاجة الثانية يا حماده .. أحنا هنا معندناش شغالين في البيت ..

كل واحد بيخدم نفسه .. الجزمة بتتقلع ع الباب وليها مكان
بتتخط فيه .. البيجاما اللي تقلعها لها مكان .. محدش هنا شغال
عندك .

حماده يهم بالإعترض .

حماده : معنى إيه ؟ أنا عايش في معسكر كشافة .

نونا : يا حبيبي .. نوال ما تقصدش .. قصدها يعنى نعاون بعضينا ..

إيد على إيد تساعد يا حماده .

نوال : الشرط الثالث .. مفيش حد في البيت ده قاعد عاطل .. أنا

ولادى في الأجازة الصيفية .. إننا بيدرسوا كمبيوتر ..
وأختزال ولغات .. نظام البيت ده يا حماده .. إننا بعد ما نطفر
كلنا كل واحد بينزل على شغله .

حماده : أنا برضة مش عاطل .. وعندى المحل بتاعى .. أحنا مش

فاضين برضة .

نوال : الأكل في البيت ده يا حماده .. أكل صحى .. للجميع .. ممنوع دخول أى أنواع من الأطعمة اللي فيها سُكريات أو دهون أو أملاح زيادة .

حماده : أنتى عاوزة تأكلينى على مزاجك كمان .. لا .. أنتى فاكرة نفسك ح تتحكمى فىا .. أنا ماشى .

نوننا : أستنى يا حماده .. ده الأكل الصحى ده حلوقوى وح يعجبك .. أنا فى الأول عملت زيك كده .. أنها بعد كده أخذت عليه ومابقتش أكل غيره .

حماده : فيه شروط تانية كمان حضرتك عاوزة تقوليها .

نوال : طبعاً .. أنا لسه ما خلصتش كلامى ..!

ويبدأ الصراع بين المدلللة التى هى ماما نونا .. والحازمة التى هى نوال . حماده نائماً .. ونونا تتوسل إليه أن يستيقظ حتى لا تثور نوال .

نوننا : قومى يا طعمه .. قومى يا كميله .. عشان خاطر ماما ..!

حماده : (صارخاً) .. يا ماما أنا ما بأصدق أروح فى النوم .. سيبنى بأه .. أصحى أعمل إيه الساعة ستة ونص .. هوه أنا فى الجيش .

نوال تدخل الحجره .
صارخه .

نوال : الساعة سبعة إلا ربع .. قولنا البيت كله بيصحى الساعة ستة . حماده يلتفت لها فى ضيق .. وهو ينفخ .

حماده : إيه فيه إيه ؟ . بتزعقلى ليه ع الصبح .. دى مش عيشة دى .. حد يقوم من النوم ع الزعيق ده .. هوه أنا نايم فى الشارع .

نوننا : يا حماده .. نوال عاوزاك تصحى بدرى عشان .

تقاطعها .

نوال : عشان فيه نظام يا ماما .. قلت لازم نلتزم بيه .. الولاد لما يصحوا بدرى ويلاقوا الأستاذ نايم .. ممكن بعد كده يقلدوه .. التسيب بيحجب تسيب .. والفوضى بتجيب فوضى .

نوال تفتح ستائر الحجره فيملأ الحجره ضوء الصباح .

- حماده : يوووه .. إيه النور ده ..!
- نوال : ده نور ربنا يا أستاذ حماده .. ربنا قال .. (وَجَعَلْنَا النَّهَارَ مَعَاشًا)
نوننا : صدق الله العظيم .. ونعم بالله .
- نوال : أنفضل حضرتك أغسل وشك .. عشان أحنا بنفطر كلنا مع بعض تحت .
- نوننا : طيب بس ح أجيب له أنا يفطر في السرير لحد ما يفوق كده ويقوم علطول .
- نوال : معنديش حد بيفطر في السرير يا ماما نونا .. الفطار تحت .
نوال تخرج غاضبه .
حماده ينظر في أثرها .
- حماده : جتك القرف في شكلك .. وشها يقطع الخميره من البيت .
- نوننا : والنبي دى طيبه يا حماده .
- حماده : طيبه إيه يا شيخه .. أنا بالطريقة دى مش ح أستحمل أقعد أنا وهى فى بيت واحد .. أنا بقولك أهوه .. أنا عندى أروح أنام فى المحل أحسن لى .
- نوننا : وتسيبنى يا حماده .. ده أنا ما صدقت رجعت لى يا حبيبي .. قوم بس كده وصلّى ع النبي .. ده الصحيان بدرى حلو ويخلى وشك مورد كده .
- حماده : أنا ما حبش حد يتحكم فيّا .. أنتى عارفانى .
- نوننا : كتر خيرها اللي شايلانا يا حماده .. أحنا لولا وقفة نوال جنبنا كُنا أتسوحنا .. كُنا شحتنا .. ما أنت عارف البير وغطاه .
- حماده : دى مسألة أيام وكل حاجة ح تتحل .. مش ح تذلى يعنى عشان قاعد عندها ولا بأكل لقمة فى البيت .. أنا مستعد أدفع لها تمن ده كله .
- نوننا : قوم بس .. قوم ربنا يهديك ..!

وتظهر الكارثة الكبرى .. ولكنها هذه المرة خاصة بنوال وليس حماده .. منظمة كبيرة تهددها .. إن لم تسلم السى دى الذى يحتوى على معلومات قيمه .. فسيقتلونها .. فلمن تلجأ؟! وهل هناك غيرها .. ماما نونا طبعاً حتى نوال القوية الحازمة العملية .. لا تجد ملاذاً إلا صدر ماما نونا .. وتأخذ ماما نونا السى دى لتخفيه فى شكمجة قديمة تحتفظ بها مع ما تبقى من ذكريات الأيام الجميلة .

وكان يجب على نوال أن تكمل مسيرتها العلمية .. والعلم يحتاج إلى المال وهنا فقط .. وافقت ماما نونا على بيع القصر .. أى حكمة وأى تفهم وأى نظره مستقبلية تملكها هذه السيدة؟! .

نونا ونوال وعاطف حوشان .

نونا جالسه فى قمة الإكتئاب ونوال جادة جداً شاعرة بالذنب .

عاطف : أنا يا دكتورة نوال لى الشرف أنى أشتري قصر عزو باشا لأنى أكثر واحد عارف قيمة ها الأثر .. وأنا بأوعد حضرتك أن أسم عزو باشا يظل على واجهة القصر .. ده تاريخ .. قيمة كبيرة .

نوال : أنت طبعاً ح تدينا فرصة عشان ننقل من القصر .

عاطف : خدى الفرصة اللى بدك إياها .. أنا ما أقدر أزعلك ولا أزعل ماما نونا .. ست كريمة كتير

نونا تقوها بلا روح .. مضطرة لذلك .

نونا : الله يخليك يا أستاذ عاطف .

عاطف : أرجوكى يا ماما نونا .. ما تكونى زعلانة منى .. أنا عارف قد إيه أنتى مرتبطة كتير بها المكان .. إنها والله لو ما عندك مانع تخليكى فيه قد ما بدك .

نونا : (بمرارة) .. عاوز تشترينى مع القصر يا أستاذ عاطف !! .

عاطف : العفو .. العفو يا ست الكل .. ده أنتى على راسى .!

نوال : حضرتك ح تدفع جزء من المبلغ .. والباقى عند التسجيل .

عاطف : ولو .. تحت أمرك .. بس أنا ليا طلب عندك يا دكتورة نوال .

- نوال : أتفضل .
- عاطف : نمضى عقد البيع ونسجله وتأخذى الفلوس اللى أنتى عاوزها ونكتب فى العقد المهلة اللى أنتى عاوزها عشان تسيبى القصر .
- نوال : وهو كذلك .
- عاطف : وعندى إلك مكان يجنن بياخد العقل .. هنا فى المعادى .. فيلا صغيرة محندقة جاهزة .. يا دوب تحطى عفشك فيها .. وسعرها مهاود كثير .. أنا ممكن أديالك من حساب القصر .. عشان ما أعذبك فى التدوير على مكان تانى .
- نوال : كويس .. أشوفها .
- عاطف : بكره بعون الله .. أفرجهالك .. ونروح نمضى العقد فى الشعر العقارى .. ألف مبروك .!
- نوال : الله يبارك فيك .
- عاطف : بخاطركم .. راضية عنى يا ماما نونا .. والله ما بأخرج إلا لما تقوليهاالى .
- نوننا : ربنا يوفقك يابنى .
- عاطف خارجاً .. فى دخول حماده .
- عاطف : حماده بيك .. كيفك .. والله واحشنى .
- حماده : أهلاً يا عاطف بيه .
- عاطف : وحياة والدك .. وصى ماما نونا عليه .. ما عاوزها تكون زعلانة .
- حماده : هو أنت فيه حد يزعل منك يا عاطف بيه .
- عاطف : سلامو عليكم .
- عاطف يخرج .. حماده يدخل إلى غرفة الصالون ليجد نوال ونونا صامتين .
- حماده : خلاص .. الراجل ده حياخد القصر ؟! .
- بين دموعها .

نوال : أنا يا جماعة .. مقدرة جداً قد إيه أنتوا زعلانين عشان القصرح
يتباع .. بس أؤكد لكم إن أنا يمكن زعلانة أكثر منكم .. أنا
أتولدت هنا وعشت طفولتي وشبابي هنا .. وليا في البيت ده
ذكريات يمكن هي أحلى أيام أنا عشتها في حياتي .. كنت وأنا
في ألمانيا كثير قوى بأفكر بيتنا ده .. اللي عمري ما حسيت إنه
برد أبداً حتى في عز الشتا .. أنا بأخذ القرار ده غصب عنى ..
وأنتوا عارفين الموقف اللي أنا فيه .. أنا عاوزا كوا تساعدوني
وما تحسسونيش بالذنب أكثر ما أنا حاسه بيه .

تنفجر في دموعها .

نونا تأخذها في أحضانها .. وتربت عليها وعلى شعرها .

نونا : لا يا نوال .. أوعى تعيطى أبداً .. أبداً .. كلنا معاكى يا نوال ..
وإذا كان ع البيت .. آدينا عيشنا فيه أيام لا يمكن ح ترجع تانى
.. أنتى عاملة على زعلى أنا .. ولا يهملك .

حماده ينظر إلى الموقف بضيق وهو يتنهد .

نونا : أنا !. والنبي ما زعلانة .. أحناح ناخذ زماننا وزمن غيرنا ..
وبعدين صحيح البيت كبير قوى علينا .. ده أحنابنغلب في
تنضيفه !.

حماده : خلاص يا ماما مامنوش فايده بأه الكلام ده .

نوال : ما تزعلش منى يا حماده .. الظروف اللي أنا فيها أقوى منى
بكتير .

حماده : كلنا في ظروف يعلم بيها ربنا يا نوال .

نونا : ظروف إيه يا ولاد .. الحمد لله .. ده أحنأحسن من غيرنا
بكتير .. ياللا .. ياللا يا نوال أطلعى صحى ولادك عشان
يتسحروا .. الساعة بأت ١٢ .

نوال تتحرك خارجة وهى فى قمة الحزن .

حماده يجلس أمام نونا .. حماده ينظر نحو نونا ونونا تنظر نحو حماده .

- نوننا : بتبص لى كده ليه يا حماده .. زعلان عشان ح نسيب البيت .
- حماده : يعنى أنتى مبسوطة قوى .
- نوننا : مش مبسوطة .. أنها كمان مش زعلانة .. أنا كنت زعلانة لما
علاء كان ح يبيع البيت .
- حماده : ليه بأه إن شاء الله .. ما هو الإثنين زى بعض .. سواء نوال ولا
علاء .. الإثنين بايعين .
- نوننا : لا يا حماده .. نوال غير علاء .. نوال حاجة تانية .. اللى بتعمله
نوال حاجة كبيرة قوى تستاهل تضحى بأى حاجة .
- حماده : حاجة كبيرة إيه يا شيخة .. أنتى بتصدقى .
- نوننا : نوال فهمتنى على اللى بتعمله يا حماده .. وأنا شجعتها وبأدعى
لها كل يوم فى صلاتى إن ربنا يوفقها فى اللى هى ماشية فيه .
- حماده : دى مجنونة .. دى ح تضيع نفسها وح تضيع البلد كلها .
- نوننا : ما تقولش كده يا حماده .. نوال عاقلة وعارفة كويس هى
بتعمل إيه؟! .
- حماده يقترب منها ويجلس بجوارها ويهمس لها .
- حماده : طيب أنا ح أقولك بأه على حاجة بس بينى وبينك .. ماكتش
عاوز أقولها .. إنها لازم تعرفيها .
- نوننا : حاجة إيه؟! .
- حماده : أنا .. جانى واحد من ألمانيا من المركز اللى كانت بتشتغل فيه
هناك .
- نوننا : وعاوز إيه منك ده؟! .
- حماده : بيهددنى .. بيقول لى أنهم ممكن يفجروا البيت باللى فيه لو نوال
ما سلمتهمش السى دى اللى معاها .. ومدينى مهلة عشان أرد
عليه؟! .
- نوننا تجبظ على صدرها .
- نوننا : يالهوى .. وأشمعنى جالك أنت بالذات .

حماده : عاوزنى أقنعها عشان الموضوع يعدى على خير .. وكلمتها
ميت مرة وهى راكبة دماغها .. ولا هائمها حاجة .
نوننا : يبأه اللي عملته نوال صح .. لازم البيت ده يتباع يا حماده ..
ونوال تكمل مشروعها .
حماده : أنتى معايا ولا معاها يا ماما؟! .
نوننا : أنا معاها .. وأنت كمان لازم تكون معاها يا حماده ..
وماتسيهاش فى المحنة اللي هى فيها دى أبداً .

نوال تأتى .

نوال : أتفضلوا .. السحور جاهز يا ماما .
يتحركون إلى ترابيزة السفارة .. يرن تليفون نوال .
نوال : آلو .. أيوه يا أستاذ عاطف .. لا مفيش حاجة .. أحنافى
رمضان وكلنا بنسهر .. حُجة البيت .. مش عارفة .
تنظر إلى نونا .

نوننا : موجودة يا نوال .. بكرة ح تكون معاكى .
نوال تنظر لها بحب وحماده فى قمة الضيق .
نوال : ح تكون معايا بكرة إن شاء الله يا أستاذ عاطف .. الساعة ٨
مساءً أح أكون جاهزة .
الوقت رمضان .. وحماده يريد أن يفطر قبل أن يصوم .
نهاية آذان الفجر .. ونونا تصلى على المصلية .. وتسلم .. يدخل حماده .
نوننا : السلام عليكم ورحمة الله .
السلام عليكم ورحمة الله .
إنت لسه ما نمتش يا حماده؟ .

حماده : مش عارف مالى يا ماما .. حاسس بحرقان فى الحتة دى وريقى
ناشف قوى .

نوننا : تبقى أكلت حاجه بره قبل ما تيجى .
حماده : دى حتة كنافة كده .
نوننا : طبعاً لازم تعمل لك حمو .

حماده يبلى ريقه .

- حماده : شكلى مش ح أقدر أكمل اليوم .
نوننا : هوه أنت بتصوم .. ده أنت طول النهار نايم وبتصحى ع المدفع
حماده : ريقى ناشف قوى .
نوننا : خلاص .. أشرب يا حماده .. ما أنت عيان وربنا يغفرلك ..
ومن كان مريضاً .
حماده : فعلاً مش قادر يا نونا .. أستغفر الله العظيم .
يمسك بالدورق ويصب كوب ماء ويشرب .
حماده : ياااه .. ده أنا كنت ح أموت .
نوننا : معلىش يا حبيبي .. لازم بأه تكفر عن فطارك وتطعم ستين
مسكين .
حماده : تصبى على خير يا نونا .
نوننا قبل خروجه .
نوننا : يوه .. والنبي يا حماده .. أفتح الدولاب وهات لى الصندوق
بتاع الصور .
حماده : ليه؟! .
نوننا : نسيت أطلع لنوال الحجة .
حماده يفتح الدولاب .. ويخرج الصندوق .. ونونا تفتحه بمفتاح صغير فى رقبتها ..
وتبحث عن الحجة .. وتخرج الصور .. والسى دى .. ثم الحجة .
نوننا : أهيه! .
حماده تقع عيناه على السى دى .
حماده : إيه ده يا نونا .
نوننا : ده .. السى دى بتاع نوال .. أصلها شايلاه معايا .
رد فعل على وجه حماده ويبلع ريقه .
نوننا : إيه مالك .. ريقك نشف تانى .. ما تقيس السكر يا حماده
لتكون تعبان .
حماده : لا .. لا .. أنا كويس .. كويس .

تغلق الصندوق .

نوننا : طيب خذ حط الصندوق في مكانه في الدولاب .. وشوف نوال
لوسه صاحية إديلها الحجة بتاعة البيت أحسن دي نازلة
الصبح بدري .. لأكون نايمة ولا حاجة .. ماترضاش
تصحيني .

حماده يضع الصندوق ويخرج وقد إتخذ قراراً بينه وبين نفسه ..
حماده يقرر أن يبيع السي دي .. للغرب .. للأجانب .. لأعداء الوطن .
حماده يكلم عماد في التليفون .

حماده : أيوه يا دكتور عماد .. خلاص .. وصلت للسي دي .. تقدر
تعتبره معايا دلوقت .. أنت جاهز بالفلوس .. طيب .. لا
دلوقت ماينفمش .. أنا ح أجيلك وقت الفطار عشان الشوارع
بتبأة فاضية .

تدخل نونا .

نوننا : أنت صاحي يا حماده .. ده أنا فاكراك نايم .!

حماده يرتبك وينهى المكالمة مع الدكتور عماد .

حماده : طيب .. مع السلامة .. مع السلامة .

نوننا : شفت قدرة ربنا .. خلاص البيت مش ح يتباع .. نوال لسه
طالبانى وقايلالى .. ألف حمد وشكر ليك يا رب .

حماده : طيب كويس بأه .. تبأه صرفت نظر عن الجنان اللي هي كانت
ناوية تعمله .. أكيد قعدت مع نفسها وفكرت بالعقل .

نوننا : مش عارفه .. هي قالت لي فرجت .. أما تيجي ح تحكيلى .

حماده : هي شكلها فرجت فعلاً يا ماما .

نوننا : ح أعمل لك طبق بأه شوية خيار على جزر على خس .. لغاية
المدفع ما يضرب .

حماده : يا نونا أنتى عاوزه تفضحيني .. العيال يقولوا عليا فاطر وأنا في
السن ده .. ما تخللى الطابق مستور .

نوناً : ح أجيبهولك من وراهم .. من غير ما ياخذوا بالهم .

حماده : هو فاضل قد إيه المدفع .

نوناً : فاضل ييجى ساعتين كده .. قوم أغسل وشك كده وفوق ..

أنا بعد اللي قالتهولى نوال الفرحة مش سايعانى .. أنت تريد

وأنا أريد والله يفعل ما يريد .. والله أول ما قالت لى صليت

ركعتين شكر لله .

نوناً تخرج .. حماده يرمقها بنظره .

نوناً تخرج صينية من الفرن .. وتضعها على المنضدة .

هشام : إيه يا تيتا .. الحاجات الحلوة دى كلها .. ما هى ماما مش ح

تفطر معانا النهاردة .. ناكل اللي أحنا عاوزينه بأه؟! .

نوناً : منابها متشال .

عصام : عامل لكوا شويه سلطة بأه يا تيتا .. ح تاكلوا صوابكم وراها

إمام : ياللا بأه ح أموت من الجوع .

نوناً : أصبر يا إمام .. خلاص ده فاضل نص ساعة .. صبرت كثير ما

بأش إلا القليل .

إمام : هو أونكل حماده صايم يا تيتا .

نوناً : آه .. طبعاً صايم .. آمال برضه ح يفطر ..

هامسة لنفسها .

نوناً : أستغفر الله العظيم يا رب .

إمام : أصل أنا عدت جنب أوضته سمعته بياكل جزر! .

نوناً : يا واد حرام عليك .. تلاقيه صوت كده فى التلفزيون .. ياللا

.. ياللا يا ولاد حطوا الأكل ع السفره .. بس غطوه عشان ما

يردش .

تخرج من المطبخ .

حماده يحاول فتح الصندوق .. ثم يكسره .. ليخرج السى دى .. يمسك بالسى دى .

نوناً تفتح الباب .

نوننا : أنت فين يا حماده .. ياللا المدفع ح يضرب

تنظر لتجد الصندوق مكسوراً والسى دى فى يده .

نوننا : إيه ده يا حماده .. أنت بتعمل إيه ؟!

مرتبكاً .

حماده : أنا .. أنا ما عملتش حاجة .

نوننا : أنت كسرت الصندوق يا حماده .. وإيه اللي فى إيدك ده ؟!

حماده : أسمعى بأه يا نوننا .. السى دى ده لا يمكن يبأه موجود فى

البيت ده .. ده لازم يرجع لأصحابه .

نوننا : أصحابه مين يا حماده .. ده بتاع نوال .. ده شقاها وتعبها هى

وجوزها عشرين سنة .. واخده وموديه فين يا حماده .

حماده : لو سمحتى يا نوننا .. أنا عارف بأعمل إيه ؟!

يتحرك .. تمسك به .

نوننا : أستنى هنا .. أنت رايح فين ؟ ح يدفعولك كام عشان تبيعنا

كلنا ؟!

ببجاجة .

حماده : أيوه ح يدفعولى .. ح يدونى ٦ مليون دولار .

نوننا تنظر لحماده وهى غير مصدقة لما يقول .

نوننا : إنت متفق معاهم يا حماده .. بأه نوال هارية روحها عليا

وعليك وأنت رايح تبيعها بالفلوس .

حماده : أنا ما بعتهاش .. أنا كنت ح أديها حقها .. هى ليها

٥ مليون دولار .. وبعدين أنا بأنقذها من الجنان اللي هى

عايشة فيه .. الدكتوراة فاكرة نفسها ح تقف قدام الدنيا كلها ..

وهية مش قدهم .. ح يقتلوها لو ما أديتهمش السى دى .. أنا

عارف بعمل إيه .. واللى بأعمله ده عين العقل .

صارخة .

نوننا : أنهو عقل .. أنهو عقل يا حماده .. رايح تخون الأمانة اللى نوال
مستأمنانى عليها ؟

حماده : أسمعى بأه يا ماما .. أنتى بدل ما تقوللى أخون الأمانة
والكلام الفاضى ده .. المفروض تساعدنى .

نوننا : أساعدك .. أساعدك على إيه ؟ . على إنك تسرق .. على إنك
تخون .. هى دى آخرة تربيتى ليك يا حماده .. أنت تعمل كده
.. ده أنا عمري ما حرمتك من حاجة .. ده أنا بعث عليك كل
اللى ورايا واللى قدامى .. والبنت اللى شالتنا فى أزمتنا ومقعدانا
معاها معززين مكرمين نعمل معاها كده .

حماده : هوه مين فينا اللى إبنك .. أنا ولا نوال .. هو أنتى ما بتفكريش
غير فى نوال .. المحل محجوز عليه وعليها شيك لو ما دفتوش
ح أخش السجن .. ح تبسطى قوى لما أخش السجن .

نوننا : (صارخة) .. تخش السجن ولا تتحرق بجاز .. يا ريتنى ما
خلفتك ولا جيبتك للدنيا دى .. قلبى وربى غضبان عليك
ليوم القيامة .

حماده وقد شعر بالإهانة .

حماده : لا .. أنتى كبرتى بأه وخرفتى .. وأنا مش قاعد لك فى البيت ده
يحاول الخروج .. تمسك به .
فى قسوة وحزم مفاجئ يظهر عليها لأول مرة .

نوننا : أستنى هنا .! . هات السى دى .. هات .!

حماده : خرجى نفسك أنتى من الموضوع ده .. مالكيش دعوة .. أنا ح
أبأه أتكلم مع نوال وأفهمها .

نوننا : تفهمها إيه ؟! . الولية تقول أنا وأنت متفقين عليها يا حماده .

حماده : (صارخاً) .. قلت لك مالكيش دعوه إنتى .

نوننا تنهال بصفعة مدوية على وجه حماده .

حماده يتلقى الصفعة .. كالصاعقة .. لأول مرة يتلقى صفعة من ماما نونا بعد ستين سنة ..
أنه ينظر نحوها غير مصدق .. وهى أيضاً لا تصدق أنها فعلت ذلك .
لحظة صمت وكل منهما عيناه مغروقتان بالدموع .. حماده يأخذ بعضه ويتحرك خارجاً
بسرعة .. نونا تلاحقه .

نوناً : إستنى يا حماده .. عشان خاطرى يا حماده .. أنا أمك .. لو أمك
غالية عليك ما تفرط فيه يا حماده .

نرى سيارة حماده وقت الغروب وهى تسير وحدها فى شوارع القاهرة .. تطلع على
كوبرى .. وكأنه الوحيد الذى يمشى فى مصر الآن .. الصائمون يفطرون .. ولكن
حمادة لم يصم أساساً ..

نتوقف هنا .. لأعرض لكم المشهد الذى أبكى العالم العربى كله .

نوال داخله بسرعة .. والأولاد فى قمة الأكتئاب والأكل لا يزال على السفرة .
نوال : فيه إيه .. مالها ماما نونا .

هشام : تعبت يا ماما .. وكلمنا الدكتور إسماعيل جه يشوفها .

نوال : هوه معاها فوق .

عصام : أيوه يا ماما .

نوال تطلع مسرعة .. لتجد الدكتور إسماعيل خارجاً وهو يمسخ موعه .

نوال : مالها يا دكتور ؟ إيه اللى حصل لها ؟

إسماعيل : (باكياً) .. البقية فى حياتكوا .

نوال : لا .. لا .. مش ممكن .. لأ .

نوال تنفجر فى البكاء .

نوال منهارة تماماً ولكن تحاول أن تتماسك .

نرى الأولاد منفجرين فى البكاء .

الدكتور إسماعيل جالساً كأنه جثة هامدة .. وهو يبكى .

نوال تمسح دموعها .. ويرن التليفون .. إنه حمادة ولكن نوال لا تستطيع أن تصدمه
بالخبر المفجع .

سؤال : أنت فين يا حماده .. تعالى يا حماده .. لازم تيجى دلوقت ..
أصل ماما نونا تعبانه .

حماده يتكلم فى التليفون .

حماده : (مقموصاً) .. لا .. هيه مش تعبانه .. أنا عارف حركاتها دى
.. أصل أنا وهى إتحانقنا قبل ما أنزل .. طيب .. طيب ..
عموماً قوليلها إني ح أنفذ لها اللي هى عاوزاه .. قوليلها كده
بس ح تلاقىها قامت علطول .. مع السلامة .

عماد آتياً باللاب توب .. وخلفه البيل مان بالحقائب الأربعة التى تحتوى على ملايين
الدولارات .. حماده يتحرك نحو الباب .

عماد : أستاذ حماده .

حماده ينظر نحوه .

حماده : معايش حاجه .. السى دى اللي معايا طلع عليه فيلم كارتون .

عماد مندهشاً .. وحماده يمضى مسرعاً خارجاً من الأوتيل عائداً إلى قصر عزرو ولا
يدرى بالفاجعة التى تنتظره ..

كمال يعانق نوال وكلاهما منفجر فى البكاء .

سؤال : خلاص يا كمال .. ما تعملش كده .. أنا مش قادرة أتحمّل .

كمال : (باكيةً) .. كانت حبيبة الكُل .. دى هى دى أمنا يا نوال ..

عمرها ما زعلت حد فينا .. طول عمرها مضللة علينا
بجناحاتها .

الأولاد يبكون .

يرن تليفون نوال .. نوال تنظر فى التليفون .

سؤال : (باكيةً) .. ده حماده .

كمال : (باكيةً) .. هو عرف ؟ .

سؤال : (باكيةً) .. لأ .. لسه معرفش .. مقدرتش أقوله فى التليفون .

كمال ينفجر في البكاء .

كمال : الله يكون في عونته .

نوال ترفع سماعه التليفون وهي تحاول أن تتمالك نفسها .

نوال : ألو .. أيوه يا حماده .

حماده يتكلم في السيارة بسعادة .. وقد شعر أن حملاً ثقيلاً رفع عن كاهله .

حماده : أديني نونا .. قوليلها بلاش سلبطة بس .. هي جنبك .. خشى

بس طمنيتها .. قوليلها كده .. حماده سمع كلامك .. وأنا

مستنى ع التليفون .. ألو .. يا نوال .. نوال .. السكة أنقطعت

!!

نوال منفجرة في البكاء .. وكمال أيضاً .

نوال : مش قادرة .. مش قادرة أتكلم معاه .

إسماعيل : يا جماعة أرجوكوا تتهاسكوا .. العياط ده مش كويس .. الست

نونا طول عمرها تحب الضحك . وما بتحبش العياط ..

العياط ده يتعبها .. أرجوكوا .. أمسكوا نفسكوا شوية .. ع

الأقل عشان خاطر حماده .

كمال : ح نعمل إيه يا دكتور إسماعيل .

إسماعيل : أنا بعثت أطلع تصريح الدفن .. والمغسلة ح تيجى دلوقت

عشان تغسلها .

حماده يركن سيارته أمام القصر .. وينزل منها ويطلع جارياً .

إضاءة القصر من الخارج خاتفة حزينة .. حتى القصر حزين على رحيل ماما نونا .

حماده داخلاً .. ليجد هشام وعصام وإمام جالسين وهم منفجرون في البكاء .. وكمال

أيضاً .. ونوال والدكتور إسماعيل .. حمادة ينظر نحوهم مندهشاً .. أنه لا يفهم سر

إجتاعهم هنا في تلك اللحظة ..

حماده : ماما فين .. ماما نونا .

ينظرون نحوه وينفجرون في البكاء .

حماده : هي تعبانة بجد .. مالها يا دكتور إسماعيل ؟!

إسماعيل يربت عليه .

إسماعيل : البقاء لله .. شد حيلك يا أستاذ حماده .

حماده ينظر مشدوهاً إلى إسماعيل .. وإلى نوال وكمال .

الكل ينهار تماماً .. ولكنه لا يسمعهم .. ولا يصدق ما يقولونه وما تقوله أعينهم ..

حماده : لا .. لا .. هي تلاقيها بس عشان زعلانة منى ..

يحاول الطلوع .

حماده : أنا عارفها .. بس أنا طالع لها .. هي لما تشوفنى ح تخف .

نوال : تعالى يا حماده .!

حماده : أستنى بس يا نوال .. أنتوا فاهمين غلط .. أصل فيه موضوع

كده بينى وبينها .. لو إتجمل خلاص .

إسماعيل : سيبه يا نوال .. سيبه يطلع يشوفها .

حماده طالعاً بسرعة .. وكأنه يريد أن يلحقها ..

حماده يفتح الباب ويدخل ليجد ماما نونا .. وقد رقدت في سبات عميق ..

حماده : خلاص يا نونا .. خلاص يا ستى .. عملت اللي أنتى عاوزاه ..

السى دى أهوه .. أنا مقدرش أزعلك يا نونا .

يضع السى دى فى الصندوق .

حماده : حتى نوال معرفتش حاجة .. مبسوطة منى .. أوعى تكونى

لسه زعلانة .. وبعدين ده إنتى لطشتينى حته قلم .. أيديكى

ثقيلة قوى يا نونا .. ما تقومى بأه .. لسه زعلانة يا ستى .. أنا

آسف .. آدى إيدك أبوسها آهى وآدى راسك أبوسها ..

معلش بأه يا نونا .. هوه أنا ح أتدلع على مين غيرك .. قومى بأه

يا نونا .

ح أحط لك فيلم الجيل الجديد بتاع حسين صدقى .. حبييك .

يتحشرج صوته وقد بدأ يدرك .

حماده : نونا .. إنتى ما بترديش عليا ليه يا نونا .. تبأى لسه زعلانة .. يا رب أموت لو ما رديتى عليا

باكياً .

حماده : ما أنا ياما غلطت وأنتى ياما ساحتينى .. ياما عملت بلاوى وياما داريتى عليا .. وبعدين إيه اللي قاهولى الدكتور إسماعيل بره ده .. الراجل ده أهبل .. بيقوللى شد حيلك .. لا أنا ولا أنتى عمرنا إرتحننا للراجل ده .. لا أنتى بتحبى الدكاترة ولا أنا .. طول عمرنا عايشين بالبركة .. أنتى بتنامى يا نونا وأنا بأكلمك .. تعرفى إن أنا ما نمتش من إمبراح .. مطبق بقالى يومين .

يخلع حذاءه والشراب وهو يتكلم .

حماده : أنا ح أمدد جنبك .. أحلى نومة فى الدنيا كلها لما أنام فى حضنك

حماده ينام بجوارها واضعاً يده على كتفها .. محتضناً إياها .

حماده : ياااه يا ماما .. ده أنا هلكان .!

فى هول القصر تدخل المغسلة .. سيدة محجبة .. ومعها حقيبة .

السيدة : السلام عليكم .

نوال : وعليكم السلام .

السيدة : شدو حيلكوا .. البقاء لله .!

نوال : أتفضلى .

تأتى فوزية ومنير وحسام يدخلون من الباب والجزع على وجوههم .

فوزية : (باكية) .. البقية فى حياتك يا نوال .

نوال تحتضن فوزية .

فوزية : بس .. بس ما تعملش كده .. أقريلها الفاتحة يا نوال .. ماما

نونا طول عمرها ست طيبة ومؤمنة ، وراحت فى أيام

مفترجة، فى الجنة ونعيمها .. يا بختها .. ده بكرة ليلة القدر .

منير يسلم على كمال ويجلس .

أما حسام فقد أغرورقت عيناه بالدموع .. ويحاول التماسك .

حسام يجلس بجوار كمال ومنير .

منير : وحصل إمتى ده يا كمال بيه ؟!

كمال : (باكياً) .. بعد الفطار علطول .. ماتت وهى صايمة .

منير : فى الجنة إن شاء الله .. إنها المرحومة ماكانتش عيانة ؟

كمال : مكلمانى أمبارح وعمالة تهزر معايا وتواسينى .. عشان سبت

الشغل وقالت لى ح أدعيلك فى ليلة القدر .

حسام يمسح دمعة تنزل من عينيه رغماً عنه .. ويحاول أن يبدو رجلاً .

حسام : وبابا فىن يا عم كمال .

كمال : عندها فوق .. تايه يا عينى .. مش دريان بروحه ..!

فوزية ونوال والمغسلة .. يفتحان الحجر ليجدا حماده راقداً بجوار ماما نونا على السرير

محتضناً إياها .. نائماً فى وداعة كطفل صغير ..

فوزية تنفجر فى البكاء .. لا تستطيع أن تتمالك أعصابها من المنظر .

حماده يلتفت ليجد فوزية .. ونوال والمغسلة .

حماده : إيه يا فوزية .. دى نايمة .. سيوها يا فوزية .. إنتوا إيه اللى

جابكو دلوقتى ؟!

حماده وهو فى قمة الذهول .

نوال : تعالى يا حماده .. تعالى بس .

فوزية : البقية فى حياتك يا حماده .

حماده : هى نايمة يا جماعة ..! هى مش نايمة ..! هى مش ح تصحى

تانى .

فوزية تأخذ حماده .. لتخرج به .

فوزية : تعالى بس كده وإستهدا بالله .. أقرأها الفاتحة يا حماده .

حماده خارجاً وهو لا يشعر بما يحدث حوله .. وكأنه أنفصل عما يرى ويسمع .. ونوال

تدخل مع المغسلة .

حماده نازلاً بملابس الخروج التي كان نائماً بها ولكن في قدمه شبشب زنوبة إرتداه في
خروجه من الأوضة وفوزية ممسكة به .

منير : (لكمال) .. خلاص يا كمال بيه .. أنا كلمت واحد صديقي في

الأهرام .. النعي ح ينزل بكرة إن شاء الله في الطبعة الثانية .

كمال : متشكر يا منير بيه .

منير : على إيه بس ؟. دي الست نونا دي حبيبة الكُل .. الله يرحمها

ويحسن إليها .

منير يبكي .. وكمال يربت عليه .

لا يزال حسام متماسكاً .. وكأنه قنبلة ستنفجر .

يظهر حماده .. على أول السلم تحت في الهول .. الكل يقف .. كمال ومنير وحسام ..
ويذهبون نحوه .

حماده يمر بهم واحداً واحداً بالترتيب دون شعور يسلم عليهم بلا أى مشاعر .. كأنه
جثة متحركة .

منير : شد حيلك يا حماده .

كمال : (يبكي) .. راحت يا حماده .. راحت الحبيبه .

حسام ينظر إلى أبيه .. ثم ينفجر في البكاء ويحتضنه بقوه .. وحماده لا يشعر بأحد .

حسام : بابا .. شد حيلك يا بابا .. تيتا ماتت يا بابا .. كنت بحبها قوى

.. قوى ..!

حماده يتركه .. ويمضى نحو الباب .

منير : شوفه رايح فين يا كمال بيه .

كمال : خليه يخرج يشم الهوا في الجنية .. ربنا يكون في عوناه .

منير : ربنا يصبره .

حماده ماشياً .. خارجاً من القصر .. وتدخل في نفس الوقت سيارة سوداء (سيارة
تكريم إنسان) .

تقف وينزل منها إثنان .. يمسكان بالخشبة ويدخلان إلى القصر .

حماده ينظر إلى ذلك كله ويمضى خارجاً .

حماده ماشياً في الشارع وقد تحجرت الدموع في عينيه .. يرتطم بالناس دون أن يدري ..
وكأنه لا يرى أحداً .

ويظل حماده هائماً على وجهه .. أنه لا يستطيع أن يواجه الحياة بدونها ..
حماده ماشياً .. وقد بدا عليه الإرهاق الشديد .. صار أشبه بشيء مشوه .. مثل أحدب
نوتردام .. أشعث .. حافي القدمين .. لم يأكل منذ يومين .. يبلع ريقه .. في حالة مرضية
حقيقية .

نرى بائع البليلة والحلوى .. حماده يقترب منه بلا وعى ولا إرادة وبعض الواقفين أمام
العربة .. المنطقة شعبية بعض الشيء .. عربة بليلة وحلويات وزلابية ومهلبية .
حماده يخرج كبشة فلوس من جيبه ويرميها للبائع الذي ينظر نحوه بإستغراب .
البائع : فيه إيه يا حاج ؟!

حماده : هات بليلة .

البائع : وإيه اللى مطلعته من جيبك ده كله ؟

حوش فلوسك يا عم .

البائع يأخذ تمن البليلة وهو ينظر بشك إلى الرجل الحافي الواقف أمامه .
الفلوس تسقط منه .

الرجل يعطيها له .. ويقدم له طبق البليلة .

حماده يأكل بنهم مرضى .. بغريزة البحث عن الطعام .. كأنه يرضع لآخر مرة في
حياته .

وتنزل البليلة على ملابسه .. تليفزيون صغير بجوار العربة .. يعرض فيلم تمر حنه ..
وأغنية تمر حنه بصوت فائزة أحمد وحماده تتساقط دموعه في طبق البليلة .

ص فائزة : يا تمر حنه .. يا تمر حنه

خليتي بينا وبعدتى عنا

السورد كله كسا الجنائين

وإشمعنى إنتى اللى شارده منا

كنتى شمعتنا .. كنتى نور بيتنا

كنتى سامرنا .. وأنفض سامرنا

سرادق العزاء .. منصوباً في حديقة القصر للرجال والسيدات داخل القصر .. نرى في الخارج .. حسام وكمال يستقبلان المعزين وشادى .. وسليمان جالساً في العزاء .. ومنديله في عينيه .

المقري : وَوَصَّيْنَا الْإِنْسَانَ بِوَالِدَيْهِ حَمَلَتْهُ أُمُّهُ وَهْنًا عَلَى وَهْنٍ وَفِصَالُهُ فِي عَمِيمٍ أَنْ اشْكُرْ لِي وَلِوَالِدَيْكَ إِلَيَّ الْمَصِيرُ .

يدخل أشرف ويعانق كمال بحراره .. ثم يجلس بجواره .

أشرف : (هامساً) .. الشركة محتاجالك يا كمال بيه .. أحنا مانقدرش نستغنى عنك أبداً .

كمال يربت على يده في حنان .

السيدات جالسات يرتدين السواد على باقى الآية الكريمة .

تدخل عيشة .. وترقع بالصوت .. وتلطم على خديها .

عيشة : لا .. لا يا حبيبتى .. ح نعيش من غيرك إزاي يا حبيب

تزجرها .

فوزية : بس يا عيشه .. ما تصوتيش هنا .

عيشة : مش قادرة .. مش قادرة يا ست فوزية .. دى هى اللى ربتنى ..

دى هى أمى اللى شايلانى طول عمرها .

شفيق زوج عيشة يدخل متأثراً للغاية .. ويسلم على الواقفين ليأخذوا العزاء ..

ويجلس في صمت .. ثم بعد لحظة صمت .. نرى إبراهيم .. بذقنه الكبيرة وجلبابه

البيض داخلاً إلى العزاء .. متماسكاً للغاية مومناً بقضاء الله .. يدخل ليسلم على كمال .

إبراهيم : البقاء لله .

ويسلم على شادى .

إبراهيم : البقاء لله .

ثم يسلم على حسام .

إبراهيم : البقاء لله .

كل منها ينظر للآخر .. ثم يتعانقان بحراره شديده .

إبراهيم يجلس ممسكاً بالسبحه .. وهو يتلو بعض الأدعية .
ويعود حماده بعد أن يفقد وعيه .. يعود إلى قصر عزو .. ولكن لأول مرة .. بدون ماما
نوننا !.

حماده داخلاً إلى القصر .. وداليا ممسكة بيده وحسام باليد الأخرى .. ونوال وفوزية
وشادى .

حماده ينظر نحو القصر وهو لا يتخيل أنه لن يجد ماما نوننا بداخله .
حماده مستلقى على سريره .. وهم جميعاً بجواره .

نوال : ريح يا حماده .. أنا ح أعمل لك شوية شوربة فراخ عشان تاخذ
الدوا ..

حماده يهز رأسه رافضاً .

نوال : ما تزعلنيش بأه يا حماده .. داليا هي اللي حتشربهملك .
داليا : مش أنا حبيتك يا بابا .. مش أنا دوده !.

حماده ينظر نحو داليا في حزن كبير .. ثم ينظر خلفهم ليجد صورة ماما نوننا في الحجرة
صورة كبيرة يراعى في تصويرها أن تنظر فيها نوننا بعتاب .. هنا .. فقط حماده يجهد
بالبكاء .. ينظرون نحو الصورة وهم في قمة الحيرة والأسى .

فوزيه : شيلوا الصورة من هنا يا جماعة .. طول ما هو شايفها قدامه ح
يتعب أكثر .

حسام يحاول أن يرفع الصورة .. حماده يقوم في غضب ويكاد يضربه ويمسك منه
الصورة .

نوال : خلاص .. خلاص يا حسام .. سيب الصورة .

حسام : خلاص .. خلاص يا بابا .. مش ح أشيلها .

حماده يثبت الصورة وداليا تبكى وتأخذه في أحضانها .

داليا : أحنا عمرنا ما ح ننسى ماما نوننا يا بابا .. عمرنا ما ح ننساها ..

لو سمحتوا يا جماعة .. سيونى مع بابا .. لو سمحتوا .

يخرجون .. وتظل داليا واضعة رأسه في صدرها وكأنها هي التي صارت أمه .

حماده يفتح عينيه بعد نوم طويل .

ينظر أمامه .. فيجد نونا تنظر نحوه في الصورة نفس نظرة العتاب .

ص حماده: إنتى لسه زعلانة منى .. ده أنا كنت جاى علشان أفرحك .. ما أستنتيش ليه لغاية ما آجى يا نونا .. ده أنا عمري ما إتأخرت إلا ورجعت لقيتك مستنيانى .. أهو أنتى باه كده اللى غلطانة المرة دى .

ينظر بجواره ليجد طبقاً به برتقال وسكين .. ينظر نحو السكين .. ثم تمتد يده .. ويلتقط السكين .. وينظر نحوه .

ولا يجد حماده شيئاً يفعله .. سوى أن يصنع عروسة لماما نونا وكأنه يحاول أن يجسدها من جديد .. وتنجح العروسة وتشتهر ويسدد ديونه .. حتى وهى راحلة تساعده .
وفي وسط الإحتفال بالنجاح يتسلل خارجاً .. وحده .. وكأنه على موعد معها .. أنها اللحظة التى يريد أن يختلى بنفسه وبها أيضاً يذهب إلى قبرها .. ويكلمها .

ص حماده: خلاص يا ماما نونا .. كل حاجة بأت تمام .. العيال مبسوطين .. ونوال عملت مشروعها .. كل حاجة كويسة يا نونا .. إلا أنا .. حاسس بوحدة صعبة قوى .. الدنيا بأه دمها ثقيل قوى يا نونا .. واحشاني قوى .. قوى يا نونا .

يوسف معاطى

- روح ماما !! -

يا أختي .. كل ما تقوله لنا أمهاتنا ينحفر في الذاكره ولا ينمحي أبداً .. ربما ننسى ما درسناه في المدارس .. ربما ننسى كلام السياسيين وحتى كلام الأغاني التي أرتبطنا بها في طفولتنا .. إلا كلام ماما .

أن صوت الأم وكلامها حاله من حالات الإدمان تبدأ مبكراً جداً .. لا أحب أن أستطرد في وصف الطريقه التي أتيت بها إلى الدنيا .. فلا شك أن رجلاً هو أبي كان له يد في ذلك .. عرفت ذلك بعد ولادتي .. أنه أحب أمي وتزوجها - كم يملؤني الغيظ والغيرة حينما أتذكر ذلك - وفي ليلة عاطفية ملتهبة بالأحاسيس .. حدث ما حدث .. وماذا فعل أبي بعد ذلك .. تركني بداخلها .. كان ينزل من صباحية ربنا ليعمل .. ويبحث عن لقمة العيش .. وهي .. أمي حبيبتي .. تحملني وتعاني أشد المعاناة .. ترجيع وغيثان ودوخه . ثم يعود حضرته في آخر اليوم يريد أن يأكل .. ويريد ملابسه نظيفة ومكوية .. ثم يتركها مرة أخرى ليجلس مع أصدقائه يضحك ويتسلى ولا كأنه عمل شيئاً .

لم أكن أسمع في تلك الفترة صوتاً غير صوتها .. ولم أكن في الحقيقة أفضل كثيراً من أبي .. فكنت أحياناً أرفسها بقدمي في بطنها .. تصوروا !! هل رأيتم سفالة أكثر من ذلك .. وهي بكل صبر وحنان كانت تضحك .. بل أنني إذا أخذت لي تعسيلة كده يومين ولا حاجه .. كانت تقلق وأسمعها تقول لأبي .. الواد بقاله يومين ما بيتحركش؟! لم تكن هي ولا هو يعرفان من أنا .. ولداً أم بنتاً .. كان هو بأنانية مفرطه يريدني ولداً مثله .. وهي كانت تقول كل اللي يجيبه ربنا كويس .. أنا نفسي لم أكن أعرف هل أنا ولد أم بنت .. كنت ما زالت في طور التكوين .. سعيداً جداً بأنني كل أسبوع أنمو .. ويظهر في جسدي شيء جديد .. وكنت أجبر أمي على أن تأكل ما أريده أنا وليس ما تريده هي .. مثلاً نفسي راحت لأن أكل بطاطا .. أخذت أرفسها وأنا أصرخ .. بطاطا .. بطاطا .. وأكلت المسكينة البطاطا .. وأنا ظللت أمتصها من داخلها بكل إستمتاع .. وفي اليوم التالي صرخت فيها بكل وحشية .. عاوز تونة .. تونة .. وهكذا .

وأراد أبى أن يطمأن .. هل سأصبح ولداً يحمل أسمه ويزيد فى نرجسيته وإحساسه بذاته أم بنتاً ستتزوج من آخر .. ويضيع الأسم .. أخذ أمى وذهب إلى الطبيب .. جلست ماما على السرير وكشفت عن بطنها فوضع عليها مادة لزجة .. ثم وضع عليها يداً معدنية متصلة بجهاز مثل جهاز الكمبيوتر .. وأخذ يحركها على بطنها .. كانت أول مرة فى حياتى أشعر أن أحداً يراقبنى .. مسألة سخيفة حقاً أن تكون جالساً فى أمان الله داخل بطن أمك .. وتجد من يتلصص عليك .. وقررت أن أنتقم من هذا الرجل الذى أتى ليعرف نوعى .. فأغلقت ركبتى ورفعت كفى فى وجه الكاميرا .. لالن تعرفوا من أنا؟! .. بعينكم وظل الطبيب يحاول جاهداً .. ويحرك اليد بلا جدوى .. قفلت معايا بأه .. يضحك الطبيب قائلاً لأبى .. ده عنيد قوى مش عاوز يفتح رجله .. يضحك أبى ضحكة متباهية .. مخه جزمة قديمة طالع لى .. هاهاها .. وأنا أقول لنفسى .. والله لما تعملوا إيه ما أنا مريحكم .. وفجأة سمعت الطبيب يقول .. بس .. هوه .. مبروك .. بنوته زى القمر ..! فقالت أمى .. يا روح قلبى .. وقال أبى .. كل اللى يجيبه ربنا كويس .. البنات رزق .. وأنا .. سخسخت على روحى من الضحك .. لأننى خدعت الجميع .. ورغم شرى وخبثى وشقاوتى إلا أن شعوراً بالذنب تملكنى تجاه تلك المرأة الطيبة التى تحملنى بداخلها كم كنت أود أن أهمس لها على إنفراد .. يا ماما .. أنا ولد بس ما تقوليش لحد وبالذات الراجل ده !! .. ولكن كيف أضمن أن تكتم سرأ .. ستذهب إليه فوراً وتقول له كل شىء .. وأنا .. لا أريد أن أريحه هذا الرجل .. أبويا .. عقاباً له لأنه الذى أقتحم خلوتى .. وأراد أن يصورنى دون أن يأخذ رأى .

مشاعر غريبة أنتابتنى هذا اليوم .. مشاعر متناقضة فأنا أقيم فى هذا المكان منذ حوالى تسعة أشهر .. ولا ينقصنى أى شىء .. أكل ما أريد .. وألعب وأتنطط وأنام نوماً عميقاً .. منتهى السعادة .. ولكننى اليوم .. لا أعرف ماذا أريد حقاً .. تصوروا .. أريد أن أخرج؟! .. كيف لقد كبر حجمى نوعاً ما .. أنا لا أنكر .. ولكننى متكيف مع المكان ومستمتع تماماً بوجودى .. فلماذا أريد أن أخرج من هنا؟! .. والأغرب من ذلك .. أننى لا أعرف ما الموقف بالخارج؟! .. هل المكان بالخارج أوسع من ذلك أم أضيق .. هل الطعام متوفر .. هل درجة الحرارة ملائمة لى .. ومع ذلك أريد أن أخرج .. التناقض الأكبر .. أننى بداخلى قبضة غريبة .. وخوف يصل إلى الهلع .. من المجهول

الذى أنا ذاهب إليه بكامل قواى العقلية .. طوال الشهور الماضية لم أكن أعرف شيئاً سوى السعادة حتى ظننت إن هذه هى الحالة الثابتة ولكن شيئاً غريباً يتسلل بداخلى الآن وأنا أتأهب للخروج .. أو الدخول إلى الدنيا .. شئ غامض يشعرنى .. أن الأمور ليست على ما يرام .. أريد أن أصرخ هذه أول مرة أشعر بالرغبة فى الصراخ .. لم أبك ولا مرة قبل الآن .. كيف أبكى؟! هل هو هكذا.. واء .. واء .. واء .. من هؤلاء؟! .. وعلام يضحكون?! ..

الطبيب المغفل يقول لأبى .. مبروك .. ولد ..
وأبى أدرك اللعبة التى عملتها فيهم وصرخ من الفرحه ..
ألف حمد وشكر لىك يا رب .

وذهب ليصلى ركعتين شكراً لله .. بعد أن كبر فى أذنى .. وبعد أن صلى ورفع يديه بالدعاء .. جاءه رجل أنيق ووقف بجواره ممسكاً ببعض الأوراق .. وقال له .. حرماً يا بو محمود وألف مبروك .. يتربى فى عزك .. ثم ناوله الأوراق .. وقال .. حساب المستشفى .. معلىش عشان بنقل الحسابات .. نظر أبى إلى الورقة .. وتحولت ملامح السرور التى فى وجهه إلى ملامح أخرى .. وعرفت أن هذا المكان الجديد الذى أتيت إليه .. يدفعون فيه ثمن كل شئ .. ونظرت إلى ماما .. الراقدة على السرير هزيله متعبه واهنه .. والتى ظلت تطعمنى تسعة أشهر دون أن تطلب أى ثمن .. وأدركت كم كنت وغداً معها .. وكم أرهقتها .. ومع ذلك .. كانت تنظر نحوى وتبتسم .. إنها تحجلنى هذه السيدة بنظرها الحنونة .. أشعر أننى مبتل من الخجل .. لا ليس من الخجل .. أعتقد أننى عملتها على روحى .. أريد أن أغير هذه الكوافيل واللفف فوراً .. أنتى يا ست أنتى .. يا ماما .. ألا ترين أننى عملتها .. أتصرفى بأه .. ثم أننى جوعان .. مالكم تنظرون نحوى هكذا .. تحملنى ماما .. ثم تقدم لى صدرها .. الله .. حلو قوى الأكل ده .

.....

كنت فى الخامسة من عمري حينما دخلت فراشه ذهبية اللون إلى البيت طائره .. تحوم حول المصباح الذى فى الحجره .. حاولت أن أمسكها بعبث طفولى .. ثم أخذت أهشها بيدي .. ثم بقسوة حاولت أن أضربها أن الطفل لا يطيق مخلوقاً أصغر منه فى البيت .

قالت لى أمى .. بحنان .. حرام عليك يا حبيبي .. دى روح .
قلت لها مندهشاً .. روح .!. روح مين ؟!.
قالت .. هى روح أختك الله يرحمها .. نوسه .
نظرت إلى الفراشه غير مصدق .. دى نوسه ؟!.

قالت .. لابد وأن أختك أحببت أن ترانا وتطمأن علينا فجاءت على شكل فراشه هكذا
قلت لنفسى .. أختى عادت فى شكل فراشه .!. وأبتسمت للفراشه إبتسامه طفولية
خبيثة وكأننى أقول لها عرفتك يا نوسه يا شقيه .. أنتى أختى فإذا بالفراشه تقف على
يدى آمنة هادئة .. وأخذت أتأملها بحب .. وأدللها .. إلى أن طارت خارجه من
الشباك .. فبكيت .!.

قالت لى أمى .. لا تزعل .. ستعود مرة أخرى .
ومن يومها كلما دخلت فراشه ذهبية اللون إلى بيتنا .. تأكدت أن أختى نوسه أشتاقت
لرؤيتنا فجاءت لتطل علينا .
وحينما وقفت يمامه على النافذه .. وأخذت تحملق فيا .. وأنا أتخين الفرصه لكى أنط
وأقبض عليها بيدى .. وما أن اقتربت منها طارت ووقفت على أعلى النافذه فناديت
أمى .

ماما .. إلحقى يمامه .!.

قالت .. أوعى تأذيها يا حبيبي .. دى روح أبوك الله يرحمه وأكد أشتاق عشان يشوفك
وجاى يظمن عليك .
ومرت سنوات .. وكبرت وعرفت .. وظل ما قالته أمى لى يقيناً ثابتاً كانت دائماً تؤكد
لى أن الأحباب الذين يرحلون عن دنيانا .. يشعرون بنا .. يفرحون لفرحنا ويحزنون
لآلامنا .. أنهم حولنا دائماً .. فراشات أو يمام أو حتى زهور تميل نحونا أحياناً برقه
ووداعه لا يفعلها إلا الأحباب .
وزاد يقينى بأننى سأرى كل ما فقدت من الأحباب .. إنهم يعودون يظهرن للحظات
خاطفة فى حياتنا .. كالفراش .. أو كاليمام ثم يختفون فهم غير مسموح لهم بالظهور
أكثر من ذلك .

كنت ماشياً في الحديقة .. فهبط أبو قردان بجوارى .. بريشه الأبيض الجميل ومنقاره
الطيب الظريف .. فابتسم له .. والحسنى يا للى والله .. وحينا لمر الهدلهد بجوارى
.. حيثه بإيماءه من رأسى .. الله يرحمك يا خالى وحينما مر سرب العصافير طائراً في
نشوه .. لمحت بينهم حسين وأحمد أخواى اللذان توفاهما الله .. قبل أن يبلغا السادسة
.. لا بد أنهما آتيا لزيارتى مع شله من الأصدقاء .. قال لى أحد المثقفين .. لا تصدق يا
أخى هذه الخرافات .. إنها مجرد ميراث شعبى فرعونى الأصل .. حيث كان الفراعنة
يؤمنون بعودة الروح فى شكل طائر أسمه الكا وطائر آخر أسمه البا .. وبدأ يفلسف لى
الموضوع وأنا .. أنا فى وادى آخر .. يا عزيزى دى ماما اللى قالت كده .. يعنى أنت ح
تعرف أكثر من ماما؟! ..

.....
كنت فى باريس مستقلاً المترو ذاهباً من محطة شارديجول إلى محطة ميني مونتان .. وكان
أول يوم رمضان .. كنت مضطراً للبقاء فى باريس بسبب بعض الفحوصات الطبية ..
شارداً فى المترو أتذكر وليمة أول يوم رمضان .. وماما عاملة البدع .. وأصناف الطعام
وروائحه الرائحة ومائدته العامره والشيخ النقشبندى ملعلع فى الإذاعة .. وماما ..
رايحه جايه .. تضع الأطباق والحلل .. ونحن فى إنتظار مدفع الإفطار .. وأنا أصرخ ..
ماما .. فى الخشاف؟! .. وعادل يصرخ .. الشورية يا ماما .. وميمى يصرخ .. كأننا لم
نخرج من بطنها بعد .. وهى .. بنفس الأبتسامة المعجزة .. رايحة جاية ..
وأفقت على صوت المترو يعلن عن المحطة القادمة .. والأبواب تفتح وتقفل فى ثوان
معدوده .. فيخرج ما فى جوفه من البشر ويدخل آخرون ..

وفجأة .. أنفتح باب المترو فى أحد المحطات .. ورأيتها .. تبسم تلك الإبتسامة التى
عشقتها طول عمري .. إبتسامة مليئة بالطيبة والحنان والطعامه هى .. أقسم أنها هى ..
ووقع قلبى فى قدمى .. ونهضت من مقعدى ذاهباً نحو الباب .. ماما! .. وأنغلق الباب
بلا رحمة .. فالأبواب تفتح وتغلق أوتوماتيكياً .. ولكن المشاعر لا تفتح وتغلق
أوتوماتيكياً .. نسخة طبق الأصل من ماما .. أم هى ماما؟! .. جريت إلى النافذة بعد
أن تحرك المترو مسرعاً وبقسوة وهى أخذت تبتعد بسرعة عن ناظرى .. حتى أختفت
تماماً .. لم أتأكد منها .. هل خيل لى؟! .. هل أنا أحلم؟! .. وقفت متسماً من هول

المفاجأة .. لقد جاءت لى .. هنا يا ماما .. فى باريس معقولة !. أنتى عارفه إنك
وحشتينى جداً .. وأكيد أنا كمان وحشتك .. عشان كده جيتى .. أنا عارف إن مش
مسموح لك الظهور أكثر من كده أنتى قايلالى .. اللى بيرحلوا من الأحباب بيرجعوا
.. بس ما يقدروش يظهر واللى بيحبوهم .. كنتى أستنى شوية .. شوية صغيرين بس
يا ماما .

.....

ونزلت من المترو .. وتمشيت فى الحديقة .. وأنا أسترجع اللحظة أنا واثق إن أحداً لن
يصدقنى .. ولكن ما فائدة أن يصدقنى أحد؟! . ده موضوع بينى وبين ماما .. وبيننا أنا
سائر .. وجدت فراشة ذهبية تحوم حولى وتقف على يدى .. فأبتسمت لها .. قالت لى
أبنتى الصغيرة (هيا) .. إيه دى يا دادى؟ . قلت لها دى روح .. روح يا هيا .. روح تيتا
الله يرحمها .. وحشناها فجأت عشان تظمن علينا .

يوسف معاطى

باريس - مبنى مونتان

١ رمضان ٣ سبتمبر ٢٠٠٨

صدر للكاتب

- ١- نجوم فى عز الظهر .
- ٢- تحب تكره أمريكا (باللغة الإنجليزية) .
- ٣- آه يا دماغى .
- ٤- حصل خير .
- ٥- طقت فى دماغى .
- ٦- ماتشليش فى نفسك .
- ٧- اسأل مجرب .
- ٨- غير يابنى .
- ٩- سكوت ح نزور .
- ١٠- حكاية ماما نونا .

ألبوم الصور





بتقربى وتطيطبى
ولا تأمرى ولا تطلبى
غير الزيارة للنبي
ولا تشخطى ولا تضربى
وأنا لسه فى عيونك صبي
مهما كبرت

حببتي أمى صاحبتي
يامنورالى دينتي
ومعرفانى سكتي
مهما كابت

أنا لوف يوم ما طلبتكيش وما شفتكيش
كأنى متغرب .. هاجرت
بحب فى عنيكى الحنان
وبحب فى عنيكى الرضا
مقدرش أحب حببتي أكثر من كده
لكن قدرت



شعرك شاب
ولبستي حجاب
وشك نور

وبقى مدور
رايحه العمرة مع الأحباب
بس أنا جنبك نفسى أتصور
أبقى ها تيلي طاقية وسبحه ومصليه
وأبقى ادعيلي عند الكعبة فى الفجرية
بس أنا ليه بأطلب طب ما أنتى
عشتى حياتك كلها ليا...

نور القمر حالك
وأنا حالي من حالك
بتجيني ساعة الضيق
وبتفتحيلي طريق
وتخللي قلبي جرىء
والرب أوحالك

يبقى الحنان والدفء والحب رسمالك
دايما قصاد عينك
دايما على بالك
ومسهمة علطول
يا أمي أيه.. مالك
ما تطلبيش النجوم
لحسن ح أجيبها لك
مشغولة بس بإيه؟!
مشغولة بعيالك

حببتي الوحيدة
حقيقتي الوحيدة
وأنا لسه (بيبي) في بطنك زمان
عرفت أنك أنتي اللي ح تكوني أمي
عرفت الحنان
وحسيت بأني بحبك بجد
وشفتك لوحدك
ولا شفت غيرك
ولا شفت بابا
ولا شفت حد
ولا كنت لسه سمعت الأغاني
ولا عشقت تاني
وباكل في أكلك
وصعب وأنا ناني
ومستحملاني



حببتي الوحيدة
حقيقتي الوحيدة
برغم إنى يعنى معودش صغير
ولا عودت واقف بشورتى القصير
وما سك فى ديلك
برغم إنى بكبر
وباعرض وبأطول
لكن لسه عيل
باعيط واجيلك
وتاعبك
وراعبك
وهادد فى حيلك



حببتي الوحيدة
حقيقتي الوحيدة
أنا شلت منك فى يوم السبوع
وعيطت جدا وسحيت دموع
ما أنا كنت نايم ومرتاح فى صدرك
وهايم فى حبك وكنت فى أمان
لقيت بيتنا فجأة بقى مهرجان
قرايبك وأهلك وحتى الجيران
وأنا جوه منخل ولا البهلوان
ودق أغانى وتعبت ودانى
وملح ف قفايا ونار الشموع
أنا شلت منك فى يوم السبوع



حبيبتى الوحيدة

حقيقتى الوحيدة

بحبك ومنك عرفت الحنان

وصوتك فى ودنى ولا اسمهان

ياريت دعوتك تبقى ساعة الأذان

عشان السما تبقى فاتحة البيان

بحبك ومنك باعيش وار توى

ياريت تغفريلى

ساعات كنت منك كده باقلوى

أنا مش ح أقولك جبال المشاكل

عشان أنتى عارفه أن أنا مستوى

بحبك .. بحبك .. بحبك قوى







